

萬 有 文 庫

第 二 集 七 百 種

王 雲 五 主 編

湖 海 詩 傳

(五)

王 昶 輯

商 務 印 書 館 發 行

湖海詩傳

(五)

王昶輯

國學基本叢書

湖海詩傳卷二十三

吳泰來

字企晉號竹嶼長洲人乾隆二十五年進士二十七年召試賜內閣中書有淨名軒集

蒲褐山房詩話企晉繼期清曠意致蕭閒咸謂東晉許元度劉真長之比少中副車選校官俯仰仕途非其好也特以松滋山水之佳勾留竟歲旋以病歸其大父吉安太守銓歸築遂初園於木瀆雲林杏靄花葯參差有柳堤鶯轉竹溪烟雨平橋夏漲爽壑秋月古堂晚香涉邨觀刈松門夕照松閣聽濤巖東霽雪諸勝其尊人用儀復購書數萬卷於其中多宋元善本遂與江浙諸名士流連觴詠座無俗客惟李布衣果惠徵君棟王光祿鳴盛錢詹事大昕曹學士仁虎趙少卿文哲張舍人熙純朱明經方霽上舍昂凌孝廉應增汪良外棟張崗沙維杓兩布衣及名僧逸雲念亭畫師則王存素琴師則周紫芝皆一時之選也如是十餘年後雖成進士以召試賜中書而少無宦情壯而彌甚東南人士望之如仙既而兄弟爭析產出藏書而貨之并售其園於是同年舉公沅招主關中書院攜家而往後又適至開封年六十餘而卒企晉才情明秀尤嗜徵君所注精華錄訓纂故作詩大指一本漁洋吳中數十年來自歸愚宗伯外無能分手抗行者中年自定其詩十卷為硯山堂集徵君序之餘稿皆藏於家予與訂交將及四紀向所同遊者零落殆盡金谷玉山之雅集不可復得今取其詩而吟諷之不啻山陽之笛矣

十八盤

蒼崖破天根壁立生萬象丹梯垂鐵鎖猿鳥不敢傍天闕鬱嵯峨風雲日摩盪仰穿但壁削俯視驚滂瀆孤松倒千尋天矯忽奔放飛泉劈陰崖石角皆怒向凌虛步彌跼造極神乃王冥思真宰理雕鏤窮異狀遐哉七十君靈蹟空想像云亭尚崔嵬簡冊應淪喪吾將採瓊甃高臥觀疊嶂

虎山夜泊

月白江氣寒。秋波澹容與。征帆投遠村。哀雁尋荒渚。惟見打魚人。隱隱烟中語。

月夜遲過湘雲不至

皓月映池水。竹柏生清寒。幽人何時至。悵望孤雲端。蘭蕙亦已歇。羅幕驚秋殘。舞瑟感幽獨。永夕起長歎。

西齋夜宿有懷朱孔林

木末斂餘照。宿鳥投深烟。寒山上微月。流影西齋前。竹柏稍掩映。池塘人悄然。翛寥感晨風。淅瀝聞幽泉。良宵復何爲。寤歎懷前賢。遙知掩關者。高詠南華篇。

天井灘

五里聞灘聲。驚雷聒晴晝。行人戒戩楫。欲往不敢驟。蚤緣涉葭葦。倏忽抵巖竇。洪濤傾山來。萬竅各奔湊。仰窺若建瓴。直上比縣溜。石如癡龍蟠。水作外蛇鬪。中流入盤渦。震蕩幾致覆。馮夸憫其勞。靈風幸相佑。千搖遂出谷。迴波帶清瀉。長年顏始開。鄰榜曲已奏。迴思踏奇險。失足那可救。停橈一長思。久客悲老瘦。

皮篷

千山路盤紆。一徑行屈曲。疎鐘杳然至。隔水見茅屋。扣關聞經聲。入院但喬木。廣除沐新雨。春草芳更綠。道人頗忘機。深山伴麋鹿。手持貝葉書。招我松下讀。會心在雲林。眞賞愜幽獨。長林暝色來。人語雜樵牧。

歸路沿溪聲。泠泠出空谷。

四宜堂翫月

夜靜羣籟息。松門起疎煙。寒鐘響崖谷。月出山蒼然。清暉映庭際。水石皆澄鮮。遠火照深樹。流雲澹遙天。平生素心侶。塵網欣齊捐。逍遙永今夕。試鼓風中弦。

游隘口諸山作

羣山爭崕呀。路入土囊口。雲影移東西。峰勢轉前後。兩岸逼天光。中斷若杵臼。奔騰春湍豪。突兀青壁陡。野人愛巢居。鑿翠開戶牖。山田錯基枰。溪石碎星斗。長松架短壑。下有飢蛟守。林昏怪鳥啼。日落驚麝走。暗谷明雜花。清渠帶疎柳。錯疑仇池穴。此地通小酉。平生山水興。絕景遇非偶。哀猿喚離心。欲去更搔首。願言隱浯溪。蹤蹟同漫叟。

早春山居張崑南沙斗初朱適庭黃永夫王德甫錢曉徵曹來殷枉過草堂留宿

屏跡還舊山。柴門謝賓客。空林恣偃蹇。樂意在泉石。春至草木繁。微雨杏花坼。東臬農事起。荷鋤行阡陌。一笑逢故人。握手破岑寂。啼鳥思舊侶。停雲感陳跡。相遇敦古歡。剪燈話疇昔。池月松際來。竹露衣上滴。偶揮嵇生琴。復蠟阮公屐。明當追良辰。嘯傲倚青壁。

湖樓曉起

白雲不歸山。化作湖中雨。曉景極空濛。離離辨洲渚。鳴榔稍欲散。水禽相與語。高樓忍春寒。坐對西冷浦。幽興不可窮。烟中羨漁父。

對雪獨坐有懷

同袍各雨散。苔徑無行迹。微雪被堦除。空齋坐岑寂。希聲靜始領。寒色陰逾積。凍鳥不聞喧。風竹稍淅瀝。餘香散幽幌。遠漏沈遙夕。悠悠千里心。誰是山陰客。

斑竹嶺

連山如奔濤。高下入蒼靄。潛行因谷底。直上俯鼇背。鑄鏘翠屏列。崩岌青壁對。路盡峰始迴。潭空水交會。萬竹蒙崇岡。錯磨天影碎。陰厓臨大壑。神物想狡獪。噴沫驚蛟涎。藏形駭龍蛻。虬枝走長根。童童掩車蓋。何人架巖屋。簷楹割蒼黛。羈心厭津梁。投蹟遠湫隘。穴知仇池近。洞喜桃源大。山月忽照人。悲風戛羣籟。幽探厲前蹤。獨往符勝概。明當攬芙蓉。簪身凌鬢鬣。

晚坐法螺徑待月夜歸作

涼風歇鳴蜩。烟靄山欲暮。暝色隨孤筇。沿溪信微步。不知西峯陰。竹月已流素。青林深幾重。暗泉自奔赴。經聲隔翠微。僧房杳何處。歸來坐盤石。葛衣灑清露。夜深羅徑寒。時見流螢度。

沙孤堆舟行閣淺感賦十八韻

潞水多廢閘。淤泥積深窪。橫亘類洲渚。波面迷三叉。扁舟之字行。往往膠於沙。篙師競邪許。揮汗到日斜。搖兀不自由。推挽爭諠譁。有如仄行蟹。俄作倒退蛇。開頭若旋磨。荇帶相牽拏。來船乘長風。時送回颺颺。咫尺判遲速。物理何參差。我今溯歸程。捷徑非所誇。終朝對葭葦。隨意撈魚蝦。長征豈不快。小住亦復佳。世兒矜疾走。倏忽騰天涯。豈知呂梁險。積石如莫耶。不有忠信軀。失足空驚嗟。水行雖淹滯。早暮吟雲霞。跋鼈自云樂。不羨追風騶。誰能脫繯鎖。共此不繫查。

送過湘雲之松陵

春風楊柳堤。細雨蘼蕪路。扁舟五湖口。遙指松陵樹。烟波下長川。孤帆渺何處。不知葦鱸鄉。漁師幾家住。三高祠前春水深。垂虹橋外夕陽沈。君今短棹唱歌去。予亦迢迢烟水心。

林屋洞歌

左神古洞幽且虛。金庭玉柱惟神居。丙門陽谷連屋閭。洞口仰窺如覆盂。蛇行百步猶崎嶇。陰氣晦昧慘不愉。石乳巧詭誰所鑿。林立玉笏翹犀株。神漢噴礮成沮洳。雪色蝙蝠蒼鱷鮑。飛鳴跳擲猿猱狙。我來欲進仍趑趄。腰懸辟邪金虎符。火鈴照耀前後驅。走避罔兩潛夔魑。豁然中開八奧區。銀房一曲竊而迂。隔凡之字青模糊。天章雲篆不可摹。石壇上接天帝都。帝觴百神於此俱。撞鐘擊鼓吹笙竽。綠毛仙人來徐徐。青童倏忽馳飈車。乖龍日暮銜明珠。神光迴合羣靈趨。吁嗟此地洵可娛。僊源地肺交縈紆。東通海岱

西荆巫雲氣直達巴陵湖。洪濤隱翻軸轡。僊人几席羅方壺。平生蕭然山澤臞。崑崙弱水應可踰。置身塵垢徒區區。石牀苔蘚宜掃除。願留此中讀禹書。

吳越王廟

異人初起天目峯。金戈百戰揮羣龍。羅平妖鳥一朝盡。峨峨王業錢塘宮。紇千山頭凍雀死。碭山小民作天子。丹書鐵券渡江來。尙父空名真足恥。惜哉不用羅江東。交臂事賊非英雄。子孫相承六十載。落人掌握何匆匆。當年萬弩射濤處。鐵幢高聳樟亭路。英姿颯爽已千年。至今吳越蒙安堵。吳越江山總寂寥。錢塘宮闕草蕭蕭。荒碑獨立表忠觀。古祠空對浙江潮。潮生潮落悲今古。運去時來何足數。一聲白雁下江南。臨安又作降王七。

將遊黃山前一日宗人湛若攜黃海圖見示漫題長句

先生昔隱天都峯。彩鸞黃鶴紛相從。醉上丹臺弄星漢。一聲長嘯驚洪濛。嗚來人間玩朝市。桑田滄海觀匆匆。芒屨萬里探靈笈。金箱五嶽圖真容。五丁斧斤巨靈掌。驅來筆底真神工。化人樓臺倚空碧。晴天照耀金芙蓉。蓮花石筍勢雄峙。中有雲氣噴長虹。銀河倒流萬仞峽。海門日射玻璃紅。松根老人妙點綴。丰格似是浮邱翁。緣知坐臥三百日。羅此萬態蟠心胸。我來獨宿碧溪口。對之夢落軒轅宮。紫袍仙人九節筇。朱幡前導雙玉童。貽我劍佩蒼精龍。丹泉石髓尋可逢。覺時已是換凡骨。徑思鶴背超天風。平生當著

幾兩屐。忍令絕景淪虛空。捲圖大笑出門去。明朝高臥蒲團松。

蒲團松在平天紅其上可容坐臥

臥龍松歌

長松捲地如臥龍。鱗而爪鬣蟠虛空。虬枝偃蹇二千尺。古榦倔僵無春容。根纏古藤走奇壁。苔作霜皮石爲骨。忽然昂頭出碧霄。下瞰蒼崖萬重裂。清風謾謾當晝來。交柯接葉高崔嵬。山猿野鶴助長嘯。怒濤晴捲青天雷。或云其下藏魍魎。大壑陰霾氣淒愴。或云此下流金精。千年琥珀龜蛇形。仙人夜過餐五粒。月明彷彿吹鸞笙。我思此山奇秀甲海內。浮邱容成昔高會。得無軒皇遺手種。長令空山閱人代。雨露潛滋元氣長。鬼神呵護靈根在。客來婆婆三歎息。此樹人間應難得。他年汗漫訪天都。只恐神龍去無蹟。

登閣觀水漲和沙斗初

闌風伏雨昏復朝。鶉鳩喚婦沙雞號。小樓獨宿烟霧裏。臥聞百谷生波濤。輶雷濺雪不可禦。但訝衆水喧璈嘈。河魚大上水入市。天意亦助鼉鼉驕。烟沈萬瓦晝寂寂。雲壓獨樹風蕭蕭。何人山根架水檻。有客野岸尋漁舫。滄溟咫尺入圖畫。水光雲影紛周遭。忽思吾廬在何處。靈崖山畔香溪坳。菱湖晴漲三萬頃。芙蓉七十波中搖。答簪隨意掛烟雨。水村沙戶相招邀。採蓴剝芡四時足。棹歌一曲青天高。江山如此不歸去。自甘形役徒心勞。髻翁髻翁詩酒豪。不須相對吟牢騷。水雲千里江南夢。黃帽同攜青竹篙。

題王德甫三泖漁莊圖

幽居圓柳烟水橫。九峯一髮遙天青。高人移家入圖畫。菰蘆深隱門常扃。平生讀書破萬卷。興酣落筆摧堅城。湘江雨暗鼓瑤瑟。緱嶺月白吹鸞笙。清詞琳瑯叶風雅。會須揚藻摩天庭。何爲抑鬱作窮士。樵兒漁弟尋閒盟。君言草堂有佳趣。吳淞百里波紋平。小橋遙隔蝦菜市。迴溪近接鳧鷖涇。枳籬宛轉護門巷。蘆簾紙閣風泠泠。松聲滿院鶴唳起。竹影倒地茶鐺鳴。據梧隱几人事絕。時有沙戶相逢迎。鉤簾遙瞰澗山麓。釣篷移處斜陽明。風荷千柄響秋雨。沙鷺一足翹涼汀。此中嘯傲足永日。夜窗燈火聲啾啾。人間萬事不掛眼。驂騑跋鼈誰虧成。吾家亦住香水曲。門前欸乃漁榔停。三年流浪走塵土。歸來負杖親巖耕。崦東崦西春水生。柳芽蘆葉波冥冥。釣徒招手烟際語。兩舷脚叩搖笮簪。雲山如此共來往。不妨唱和隨松陵。題詩一笑息壤在。他年載酒窺柴荆。

灘行偶述短歌六首

漸江滂滂勢屈曲。名灘逆溯三百六。錦峯繡嶺誰削成。石黛參差浸蒼玉。翠屏中開間茅屋。帶以清泉映修竹。來船去舸不暫停。安得拏舟弄飛瀑。月明歸來濯我足。

兩山如門巨石衝。驚波駭浪迴長空。懸流轟轟瀉百里。失勢欲撞蛟人宮。篙師瞑目忽大叫。一夫前推九夫謀。迴船入峽神始愉。夕陽沈沈野猿嘯。渡頭漁燈忽相照。

一峯前開一峯合。清溪萬轉深不測。深林處處啼鷓鴣。水遠山長行不得。冷風暗雨飄白日。林昏無人虎

欲出舟師搖手情慘慄。此時欹枕魂欲消。灘聲入夜方嘈嘈。

淳安郭邊清可憐。山樓粉堞臨深淵。浮橋不鎖待斜日。時有來往江山船。茅舍高低連阡陌。雞犬歸途暮相識。武陵豈必皆寓言。流水桃花迴非隔。他日攜家就魚麥。

羅山打鼓船始開。孤篷細雨風吹來。人家三五住篁竹。幽禽相喚聲悲哀。酒帘搖颺青半幅。榜人繫纜沾村醅。小桃花紅李花白。推篷見之三歎息。故園明朝作寒食。

新安江水清見底。百尺游鱗數魴鯉。扁舟彷彿落鏡中。玉沙磷磷石齒齒。平生愛山兼愛水。此中垂釣真已矣。剪茅三間縛樹底。射鴨撈蝦捕烏鬼。倦插綸竿臥沙紫。

由上方廣寺至華頂歷覽茅篷有作

天台茅篷百四十。高踞華頂蒼崖顛。銀峯金地勢環拱。俯視塵海兜羅綿。倚巖架壑少結構。枳籬宛轉香茅編。六時法侶行道處。落花堆徑喧岩泉。我從石梁探方廣。徑思絕頂攀青蓮。披除榛莽走磴确。足繭不惜雙行綽。青泥盤盤蹋虎蹟。白水激激窺龍涎。振衣萬仞下危石。忽訝皎鏡開淪漣。花龕三五綴深樹。鐘魚出屋聲泠然。杪羅萬本蔭礪戶。小橋獨木當門前。連居小築更幽寂。縱橫十笏宜安禪。山僧煮茶拾松子。靈山雲液消塵臆。華頂茶雲霧結成者爲山中精品空階法雨忽霑灑。迴瞻歸路橫蒼烟。飄然四大無住着。此境無乃超人天。祇洹精舍夢不到。適逢佳處差安便。五邱十岳徒浪語。須彌芥子誰真詮。願依蒲團坐小劫。乞分

芋火消殘年。

讀少華餽酒歌戲贈

新詩百篇酒一斗。羨君雄才世希有。我生不飲三蕉葉。自笑玉山頽已久。一醒一醉各陶然。流俗紛紛誇好醜。大千巨細本相形。謾以云亭羞培塿。至人熟視將無同。蓮社竹林均不朽。讀君新詩論酒趣。似遇麴車涎挂口。我非酒人得酒意。愛詠君詩當擊缶。清秋涼雨洗孤桐。遙夜疎星挂高柳。綠蛆浮甕香噴唇。紅玉花莖長在手。百觚痛飲是我師。千載渴羞宜尙友。相着臭味詎差池。夢到華胥真樂藪。拍浮晨夕潤枯腸。未許崢嶸起堆阜。醉鄉日月自蕭閒。坐覺浮雲變蒼狗。破除萬事得此君。小築糟邱鎮相守。兀兀俱成無漏僊。不須更乞聲聞酒。

蔣蓀湄招同諸子集繡谷出桃花溪水圖索題漫成

闔閭城頭暑雨微。古堤楊柳烟霏霏。幽人招我出繡谷。方塘一曲搖紅衣。青溪宛轉深不測。千樹鴨頭遮舍北。仙源不遣誤漁郎。溪上沙鷗總相識。

畫師好手不可遇。咫尺忽覩滄洲趣。桃花流水望杳然。想見伊人結茅住。紅雲夾徑翠影重。柳絲風急喧鳧翁。隔溪欸乃一聲靜。遙夜月明收釣筒。

壓簷竹翠連梧葉。小院幽香蕩簾蘿。當年風雨宿秋聲。一鐙閒勘官奴帖。披圖忽訝春光好。照眼繁紅明

翠沼花前想見苦吟人。夢繞池塘生碧草。

細林山人出世姿。

少華

王郎斫地歌淋漓。

風階 德甫

曹侯宛委探仙籍。

來因

四賢迭奏瓊瑤詞。溪水如雲香不斷。柳

陰藏屋春星亂。何當浣筆試新圖。重向蘇齋呼舊伴。

君家三徑我舊諳。閒庭竹石交參覃。松關晝掩少剝啄。午風吹蝶春酣酣。圖成自擬輞川宅。茗椀鑪香好留客。落紅如雨點清樽。醉掃花陰臥苔石。

題山夫兄所撰金石存卷尾

虛簷午霽風鳴鐸。古色熊熊嘆籬箔。蟠螭奇士開素械。黃白下覆雲垂幕。羽陵蠹簡何處來。良常新銘伊誰作。銀樞木直盡補綴。缺月嘉禾半斑剝。歐陽不作廣川亡。郭髯趙頡俱寂寞。後生未識嫺嬛編。遺蹟誰探金石略。高人酷似楊南仲。遠紹旁搜精且博。拈捭星宿到羲娥。考論山川辨垠堦。頡書史篆形倔奇。禹鼎湯盤制淳樸。規模蟲蹟蝌蚪垂。扁列螺書鸞鳳泊。乙尊癸鬲紀歲年。雌敦虎彝稽尺度。岐陽獵鼓太磬牙。峒嶺神書苦躡駁。嶧碑出火光陸離。泗鼎敲雲氣騰躍。奇文屈曲識雲雷。古鑑模糊驗龍雀。塵封壞壁強名碑。苔蝕碎泉微露廓。分書流轉蔡與韓。隸變根原斯逮逸。輕摩蟬翼耀銀鈎。半裂薑文雜金錯。漢唐以降蹟更夥。碑洞如林恣尋拓。浮圖像記高龕窳。樓觀經幢精鑿鑿。開成巨刻照千春。繼蹟鴻都尤卓犖。俗書墳碎嗤換鵝。舊榻荒唐傳瘞鶴。山經海誌有缺遺。一一駢收古錦囊。看君嗜好與俗殊。頭白汗青殊

矍鑠自言壯歲客燕雲。匹馬短衣經朔漠。荒岡斷隴走狐兔。關塞蒼涼山峩嶻。風號月黑不見人。往往深
林逢不若。無終亭障古荒陲。短碣叢殘自捫摸。推尋點畫考跟肘。剗剔泥沙安節角。嵩陽石闕華陰碑。下
視歐虞較孱弱。歸來杖策尋岱宗。日觀天門氣磅礴。云亭金冊虛無間。劫火留餘更搜索。杏壇片石比瑯
琳。讀史真堪佐商榷。江湖飄蕩復幾載。單舸不畏鯨波惡。南尋禹穴窺窆石。宛委藏書盡羅絡。輕囊自詫
千金裝。坐擁何如百城樂。飄然更作逍遙遊。傲吏漆園同寄託。雲烟過眼總須臾。人世茫茫風捲擗。乞兒
一物語太癡。至竟風流照幽壑。定知此癖亦復佳。障簾錢奴真握齏。伊子好古生已晚。日注蟲魚非磊落。
六書八體強纂排。略識漏痕并釵脚。常嗟行草競姿媚。倒薤懸鉞夫矩矱。忽披此本還舊觀。快若霜篔刮
眼膜。寶函疑有鬼神護。祕笈莫遭雷電攫。金庭玉笥未遑窺。緣字赤章誰共學。得君一語當津逮。辨覈井
然豈影掠。連朝載酒問元亨。似向雲林登闕閣。摩挲古器發高論。妙解神明棄糟粕。老顛拜石世誰知。市
上庸兒空駭愕。最愁別思苦相催。樽酒離亭還罷酌。後約殷勤君記取。檢點金箱圖五嶽。好從林屋探遺
書。應有龍威啓靈鑰。

蔣紹初自蘭州歸將返吳中賦贈

結交廿載骨肉親。相去萬里猶比鄰。屋梁落月夢顏色。茫茫遠道馳心魂。今朝晴鵲忽大噪。見子披豁開
天真。行空天馬脫羈勒。西征浩蕩忘艱辛。潼關四扇射朝旭。華岳萬仞摩秋旻。皋蘭策馬攬形勢。塞垣無

際河流渾。唐營漢壘莽蕭瑟。終古戰骨埋荆榛。聖人御宇擅雄略。盡化金甲開邊屯。移軍絕漠不知遠。但有耕鑿無煙塵。或虞積久易生變。豈知勝算垂千春。羌渾雜處稟漢法。款塞部衆皆良民。君行周覽發深慨。傳諸歌詠彰皇仁。歸囊爲我一啓讀。壯志直欲排天門。方今海寓正無事。航浮索引皆來賓。班生投筆竟何補。底用汗漫窮三秦。勸君息機謝塵鞅。閉門高枕桃溪濱。五湖烟月無恙在。好待西風理釣綸。

蘇文忠壽讌詩爲畢秋帆中丞作

歲惟元默。月在丑。弁山公爲蘇公壽。黃柑丹荔羅中庭。酌以寒泉薦清酒。先生逝世後七百年。身翳白鳳翔雲烟。文章風節不磨滅。凜凜浩氣騰星躔。早年解讀范滂傳。垂老盡和淵明篇。平生自詡萬事足。玉堂茅舍皆隨緣。熙豐擾擾更朝局。天遣斯人頻放逐。歸計終虛陽羨田。傷心不獨烏臺獄。瓊崖萬里依窮髮。瘴雨蠻烟經歲月。當代誰憐宰相才。此身自抱神仙骨。縑素曾傳笠屐圖。老蓮妙筆添毫活。秦關雲氣接岷峨。再拜靈旗猶恍惚。君不見騷人揆攬徵初度。磨蝎命宮多觸忤。至今俎豆配潮州。章蔡紛紜何足數。又不見東湖祠宇埋榛莽。公來丹刻陳椒馨。千古瓣香酬夙願。風流肯讓宋中丞。商邱宋公撫吳曾邀東南名士于誕辰設祀並刻施元之注東坡詩集行世

對琴丈招同閔蓮峯處士蔣春農舍人程魚門上舍筠榭司馬泛舟紅橋漫成短歌卽以言別

飛蓬隨風不自由。平地瀉水東西流。浮雲聚散本無定。何意共作紅橋游。紅橋三月春可憐。綠楊旖旎浮

春烟千紅萬紫太撩亂。隔林處處聞啼鵲。鵲聲喚客欲歸去。鴻爪春泥還小住。樵兄漁弟齊拍肩。日向花前集。簪屨木蘭艇。子移沙岸。匝地東風搖酒幔。吟興還尋皂莢橋。閒情欲問瓊花館。君不見楊花吹雪覆白蘋。隋家古堤愁煞人。又不見歐公昔醉平山麓。苔蝕荒碑臥陵谷。盛衰哀樂總須臾。世事茫茫同轉燭。人生只合長相覓。錦瑟年華莫輕擲。但憑綠酒發朱顏。忍聽黃雞催白日。興酣日落風滿湖。樓臺倒影凌虛無。水晶宮闕忽湧現。竟思濯髮窺冰壺。高歌今夕樂莫樂。醉拂花茵坐盤礴。相逢苦少別苦多。奈此月落烏啼何。

鄂城喜晤王大令少林屬題東園圖卷

我生好作汗漫游。挂帆西登黃鶴樓。故人一別歲月逾。意外握手心綢繆。塵簪乍解百不憂。相與嘯傲凌滄洲。新圖示我巒翠浮。元氣噴礴蒼巖幽。靈區咫尺藏阻修。榛莽虧蔽颺颺愁。多君選勝窮冥搜。斧鑿似欲開金牛。苔痕淨洗石骨嶠。犀株象笏排琳瑯。陰崖下瞰百尺湫。墜葉一片驚潛虬。茅亭虛敞竹木稠。羅列圖史供研求。放衙吏散羣動休。一燈午夜聲呶嘍。文章緣飾政事優。枳棘豈久栖鸞儔。脫然捨去不自由。圖畫已足傳千秋。君不見堂堂坡老來黃州。當年卜築親鋤耰。雪堂繪壁烟靄流。迄今文采垂山陬。至人寓物無滯留。迴視好景俱浮漚。向平婚宦願可酬。他年與子期丹邱。

秦中寒食臥病獻之秋塋淵如同過敝齋看花小飲各賦七言古詩一首次昌黎寒食日出游韻

百五風光嗟旅病。花驄懶逐遊人盛。籬撻六枳少經行。一樹瓊瓏梨雪映。冷雲結夢依修篁。豔紫天紅羞與競。幽人未厭貧家春。並軫聯翩發高詠。飲醇氣味和不流。琢玉詞章雅能正。醉敲銅斗記前晨。裘履重邀時已更。奔湍飛電苦難追。作達何妨委時命。座間幸免元規塵。一任雄談揮塵柄。白髮渾忘異地愁。青袍恰有同升慶。謂獻之秋勝深慙折節拜龐公。竊比登堂呼子敬。英英幕府羅羣賢。照坐瓊枝高且竄。天球光氣耀岩壑。餘事詩豪兼草聖。中朝名德萃此邦。謂秋帆述莊兩先生唱于唱喁樂事併。籥雲快覩驂騑姿。食野自甘麋鹿性。故山雖好未思歸。臥聽林鳩呼雨橫。遙憶青門連綺陌。楊柳蘸水芹芽迸。黃犢犁翻三尺泥。白鷗波拂千層鏡。相逢田父多好懷。泥飲猶能頌仁政。他時授簡擬梁園。掉鞅前茅與後勁。勝游更指曲江頭。石泉槐火催新令。

秋勝淵如辱和拙詩。斐然競美。翌日攜酒見邀。同過廉讓堂。奉陪述庵前輩。讌談竟日。因三疊前韻。

新篇快愈頭風病。鄴下才名應比盛。清門文采各翩翩。秋月琅玕忽輝映。令嚴細柳旌旗翻。氣攝景宗筵鼓競。偶從谷口訪烟霞。還向山陰繼觴詠。素筭濁酒倚門閭。問字元亭欣就正。山桃吹雪辛夷殘。燕賞遼時恐難更。儒林丈人大雅宗。繡斧西來承簡命。雙清心蹟擬冰壺。坐閱春風移斗柄。名流爭識題襟樂。舊雨頻占盍簪慶。苔岑結契偶然同。車笠論交久而敬。柏臺晝靜吏人稀。寶篆縈香度幽篔。冠裳脫略敦古

權三爵陶然時中聖。欣看酥雨潤芳田。樂事賞心真可併。斜陽返照射籬櫺。林外晴光悅鳥性。忽憶家鄉春正濃。藤蔓成陰竹鞭橫。寒山小築傍芙蓉。清泉漱玉雲根迸。寒山雲根泉出芙蓉峯下流注漱玉山房爲遮庵讓書處閒雲出岫本無心。彈指霜華點清鏡。天教勝地暫迴翔。未覺栽花妨美政。更向前除展數弓。留取簪笈節竿勁。時庭前木并移竹數十根相看幸有此君同。妙語至今思大令。

中丞祈雨得雪再疊前韻

荒園春槁草木病。青野空占麻麥盛。宵分望澤驗江星。依舊楓林月華映。曉窗欹枕聞好語。林外晴鳩聲不競。淒淒有渰起南岑。雲漢詩篇當罷詠。陰靈繞樹昏連晨。急溜排簷斜復正。山僮縛帚詫奇事。銀霰繽紛晚來更。聞道郊壇禮數虔。岳牧齋心通帝命。垂山太乙闕靈湫。滋液羣生握其柄。扶犁已解老農憂。買甕爲增寒士慶。定知物力荷神庥。展幣用牲宜致敬。中丞檠戟劇清嚴。簾閣微香度幽篋。神功收歛寂如無。僉頌臣賢由主聖。況聞屈宋列銜官。蘭茝同心欣合併。道山延閣筵鷓鴻。愧我閑鷗莖心性。雅材百五競扶輪。不許狂瀾恣豪橫。園林過雨樂事濃。滑澗春泥竹胎迸。海棠洲畔胭脂紅。鳥弄屏風拂明鏡。願公高會執牛耳。檢點詩盟理觴政。仁心及物蔀屋歡。餘事加人詩筆勁。風流倘紹聚星堂。白戰還來聽號令。

晚過白雲寺

松谿行不盡。石窟叩禪扉。空谷聞清響。孤雲在翠微。樵歸山逕寂。鳥下竹林稀。向夕跣趺處。涼生蘿薜衣。

晚過中峯古公禪院

松門空翠滴。竹塢夕陽遲。偶愛東林路。言尋慧遠師。風泉發清響。山月照華池。回首重來逕。蒼蒼白露滋。

谷口送念亭上人歸中峯

虎溪分手罷。隱隱望中峯。石路留殘照。楓林度遠鐘。遙憐清夜月。獨倚碧溪松。靜境誰同賞。空懷物外蹤。

懷璞函

故人滄海別。寥落掩孤村。一夜吳淞雨。春波直到門。抽帆應未得。把卷共誰論。落月屋梁滿。知君勞夢魂。

過朱孔林新居追悼惠松厓過湘雲二處士

閒雲無定蹟。寂寞閉柴門。已息塵中駕。還居谷口村。青山君輩在。白社幾人存。愁絕黃墟畔。難招千古魂。彈指驚前夢。淒涼廿載餘。鄭公還薄宦。杜老未寧居。沙社堪投蹟。蘇門好結廬。他年尋息壤。把臂狎樵漁。

蒙陰

亂石敖陽道。人行紫翠中。嶽雲晴繞郭。沂水遠連空。暝色催征騎。長天落斷鴻。那能佩含景。結屋向東蒙。

清口

地扼東南險。黃淮走一門。接天桃浪暖。到海箭流渾。木石功非細。魚龍氣自尊。茫茫九河道。禹蹟共誰論。

讀史有感

朱轡鐵甲擁旌幢。揚僕樓船下楚江。萬里懸師衝瘴癘。千夫輓粟廢耕耨。珠崖未能還催戰。銀印初頒更受降。爭似璽書問南粵。文禽象齒貢蠻邦。首宿蒲桃繞漢宮。玉關葱嶺使長通。貳師驅馬初論賞。校尉屯田已奏功。自古邊庭須魏尚。至今父老怨唐蒙。輪臺詔罷烽烟息。王會依然萬里同。華陽黑水古梁州。絕域蒼茫萬里秋。戰壘新增巴子戍。降王舊拜夜郎侯。籌邊樓上傳烽急。大渡河西落日愁。多少材官兼技擊。幾人飛矢射旄頭。

九日期王德甫不至

楚天寥闊惜分襟。木落亭皋秋正深。遠道關河頻悵望。重陽風雨罷登臨。板橋花月愁中賦。笠澤蓴鱸夢裏尋。珍重前期莫相負。草堂猿鶴伴秋吟。

舟中讀適庭鳳啣德甫璞庵來殷送行之作卻寄

烏鉢峯頭曳杖遲。故山香雪繫人思。春來忍負探花約。酒罷空吟折柳辭。寒雨離亭聞笛夜。早潮江岸挂帆時。銷魂幾度中年別。一榻茶烟颺鬢絲。

露

月華如練夜霽靈。梧竹庭幽捲幔看。響滴清荷人未寢。涼生白苧漏初殘。飄零舊苑銅仙淚。冷落秋江楚

客蘭最是懷人增遠思。蒹葭無際雁聲寒。

萍

迴塘千點綠周遮。密映苔磯拂釣查。盡日參差依荇菜。經年飄泊怨楊花。鴨頭漲合柔藍繞。燕尾又分翠帶斜。愁入汀洲春又晚。亂紅流水各天涯。

舟中寒食同趙升之陸璞堂作

孤篷小泊練湖南。百五風光客裏諳。欹枕乍聞鶯細細。開簾無那柳鬢鬢。歸心空羨尋巢燕。倦態真同上簇鷁。花外鞦韆墻外路。可堪回首隔江潭。

雅雨使君招飲官署訂平山看花之約以事牽率弗獲如願賦此誌謝

載酒江湖興未窮。片颿斜掛柳絲風。倚門自笑同元叔。投轄何期有孟公。檀板金樽花影外。湘簾銀燭雨聲中。南樓賓從推羣雅。深愧憐才到阿蒙。

和張漁川法雲寺次溫飛卿韻

扶筇蕭寺喜同羣。懷古空吟月二分。漫以園林思太傅。欲將詞賦擬參軍。六時猊座飄香雨。百尺虬枝冷暮雲。何限中年哀樂感。願依初地證聲聞。

王林屋輓詩存素

廿載論交識素風。逃名白社兩心同。閑身已自全三樂。薄命終難送五窮。北郭詩篇清興在。南皮樽酒舊遊空。披帷何限人琴感。都付零縑醉墨中。

和習庵前輩歸家述懷之作次韻

潞水輕颿破暝烟。家山指點練祁前。好尋摩詰還山詠。未過羲之誓墓年。清夢定應常戀闕。素心終不負歸田。相看暫脫金門籍。浪蹟江湖號樂全。

青山歸夢隔楓宸。到及田園正餞春。鳥語花香消永日。詩瓢酒盞度兼旬。壯遊差了平生願。靜退還成自在身。茶塢山頭好風景。他年真作兩閑人。

王禮堂同年移居郊墅與敝廬相近賦此以寄

廿年龍腹忝齊名。結宇相望倍有情。兩岸人烟分市色。一溪燈火共書聲。卜鄰乍喜來王翰。遊岳終須約向平。許我元亭頻問字。好攜濁酒叩柴荆。

武昌覽古

浩浩江流繞鄂州。晴川烟靄望中收。山連夔蜀誇雄服。地扼襄樊列上游。極浦雨昏陶侃壘。高城月冷庾公樓。漢南柳色依然好。搖落西風感白頭。

趙璞庵枉過吳門惠留寒舍撫今感舊相對黯然因成長律六十韻奉贈

正始何寥落。元音漸散亡。異才能間起。大雅鬱相望。誼合龍雲切。情聯縞紵長。懷新情繾綣。感舊意徬徨。憶昔逢君日。初過選佛場。聞鐘蘭若近。入院貝多香。圖史原同好。詩篇迴不忘。論文摘星漢。談薺溯河梁。傾倒詞源瀉。低徊古義詳。忍寒攜襖被。聽雨並匡牀。正作蕭齋客。還登謝傅堂。園林歸獨樂。山水足相徉。羣從交方盛。名流氣益張。共吟青玉案。不佩紫羅囊。筆擅珊瑚格。杯盛琥珀光。餞春尋柳岸。弔古拂莓牆。滴粉工新詠。裁雲有報章。擘箋朝染翰。促席夜傳觴。作客真忘倦。爲歡亦未央。風流成古昔。歲月去堂堂。鴻爪無留迹。蓬根忽遠揚。江湖成落拓。苜宿總淒涼。岸幘窺牛渚。張帆泝馬當。琵琶商女曲。蘆荻楚人鄉。捧檄仍無奈。投簪苦未遑。頭巾空繫戀。手版太匆忙。碌碌難安枕。棲棲作急裝。歸心懸馬角。世路怯羊腸。暫示維摩疾。羣訶阮籍狂。一官聊自免。三徑未全荒。舊侶漁樵在。閑園松桂芳。勞人初偃仰。短夢已滄桑。元老騎箕去。仙翁馭鶴翔。紫筠迷舊徑。綠野剩空廊。夙雨零朱邸。悲風起白楊。羊曇徒涕淚。衛玠益悽惶。莫問停雲館。還尋履道坊。扣門增黯黯。判袂各佺佺。會合仍難定。漂流且一方。豈期辭海曲。忽欲問吳閫。一笑歡如昨。三秋願已償。剪燈具雞黍。永夜話參商。世已嗤元叔。君偏賞漫郎。菰蘆容嘯傲。騷雅共扶將。擊鉢多儔侶。吹簫盡慨慷。衆流爭浩瀚。天馬獨騰驤。白斛扛秦鼎。千尋拔豫樟。新篇推鮑謝。樂府轢張王。短佩紉蘭蕙。輕裘典鷓鴣。醉醒人世外。歌哭酒壚旁。白眼誰相問。青袍愈可傷。悠悠付蓬蓞。泛泛逐滄浪。水滌吳王苑。花飛白傅塘。靈泉懸石室。芝草秀銀房。勝地殊蕭爽。佳期詎渺茫。烟波宜放棹。蝦菜正堆筐。

晞髮穹崖上。垂綸笠澤陽。論懷同向秀。把臂有嵇康。哀樂原多故。升沈祇自量。歲寒期莫負。珍重鬢毛蒼。

再遊靈谷題句

僧房窈窕白雲封。秋寺無人度午鐘。曾記誌公臺畔路。短筇閒倚六朝松。

紅橋錄別

相逢古寺閱昏朝。禪榻春風伴寂寥。記得無眠聽粥鼓。打窗松竹雨蕭蕭。蒼茫垂柳接長堤。春草王孫去欲迷。後夜楓香亭館裏。亂山殘月聽荒雞。

秦淮水榭偶成

幾度青溪浪蹟游。板橋花月自春秋。銅駝一瞬悲殘劫。冷落人間十四樓。一樹垂楊綠萬條。興亡閱盡是南朝。都將舊苑繁華夢。付與佳人碧玉簫。朱雀航南月未斜。江船迴泊鼓三挝。寒烟漠漠籠沙際。何處秦淮問酒家。午鳩啼破雨廉纖。三尺春潮兩岸添。何處攜香試溫鼎。柳陰庭院棗花簾。

寄江于九湖南

楊子江頭暮雨涼。送君南下楚雲長。孤舟遙夜楓林泊。聽盡猿聲過岳陽。天際君山一帶青。片帆何處弔湘靈。愁心莫聽巴陵笛。楊柳春風滿洞庭。

東平道中

蓮葉東風路幾灣，
蹋波眠起白鷗閒。
魚鱗雲散洞庭闊，
一抹青遮蠶尾山。

重修瀟橋紀事聯句

秦關浩蕩依天險，
渭水蒼茫到海遙。
鼇極深蟠分地絡，
鼉梁高峙建霞標。
銀濤隱撼驚鱗屋，

玉竦斜飛想鵲橋，
憑眺宏規嗟漢代。
摩挲鉅製紀神堯，
朝宗玉帛輸千品。
祖道衣冠集百僚，

三疊陽關朝雨歇，
一聲河滿別魂銷。
芙蓉佳氣通僊仗，
楊柳東風拂苑條。
紅映長林鋪綵纈，

綠齊芳草雜蘅蕭，
晴沙徑僻容鷗占。
碕岸莎平任鶴翹，
廣陌微聞歌緩緩。
迴隄極目水迢迢，

何人簾幕修花譜，
幾輩旗亭問酒瓢。
茸帽衝寒驢背骨，
絲鞭趁曉馬蹄驕。
時移物換徵前史，

戟折沙沈閱幾朝，
鐵馬嘶風悲斷壘。
銅人辭月泣深宵，
池荒興廢寒蕪碧。
燒人昆明劫火焦，

望裏一杭行泛泛，
吟邊獨木步搖搖。
觀濠詎有蒙莊興，
涉洧空傳鄭國謠。
勝地遺墟留宿莽，

清時惠政紀重霄，
旬宣屢駐中丞節。
詎度頻煩使者軺，
與修亭少司空相。
度重事修建道甫，
原隰周

防無壅水，
川涂經畫見乘槎。
千夫應節趨靈鼓，
萬袂連雲競冶銑。
誰遣神人鞭巨石，
卻驚巧

匠結梵榱，
江干歷碌聯鑣騎。
烟際伊啞出浦橈，
鬢鬢危闌排雁齒。
澄澄倒影臥虹腰，
馮夷擊

鼓喧清夜，
織女迴車拂絳綃。
路近隄州思載舫，
春回上苑聽遷喬。
縈紆素練伴雲漢，
映帶嚴

城傍斗杓甫瑰麗詞宜銘析里秋嶢嶢氣已敵凌歊季登臨共美黃圖壯嶼文筆爭誇陸海饒甫礪石千

秋誰比績秋洛陽碑版至今昭季

王宸

字子凝號蓬心太倉人乾隆二十五年舉人官至永州府知府有蓬心詩鈔

蒲褐山房詩話蓬心薙髮侍郎曾孫所繪山水頗能入室美須髯工飲酒為人疎節闊目胸無城府官中書舍人日所居與予對門先為予畫蒲褐山房圖又為予畫惠山竹爐茶卷蓋仿明王孟端舊本而作久之陞為湖南永州太守州山水幽峭又往來於瀟相間繪事益精乾隆庚戌余奉命按事長沙會歲暮蓬心踏雪來訪後為余畫雲樓教觀圖蕭疎蒼翠可謂名家其生平所著有繪林伐材十卷上白黃帝時史皇下逮國朝乾隆時人亦畫史之總龜也

蒲褐山房圖題句

山房本先生松南故居今寓京城宣武坊南以額移署其中頗為幽勝蓋其地即趙天羽給練寄園故址張南華宮詹沈歸愚宗伯先後居此丙戌秋中小坐山房愛其林木掩靄蕭槭點摹圖之並次坡公韻

苦吟咽秋葢旅夢冷秋雨隘巷白板扉常掩西山霧先生對門居談言起幽慕老屋擁蒲褐妙解坡仙語花時設芳樽招列戶外屨冰梅人座清恍然釋塵慮烹茶起瓶笙細響疎林度蕭然寄此身隨地得閒處滌硯繪斯圖下筆生遠悟願從杖履遊時領安禪趣

題畫呈洪庵廉訪

湘水明如鏡。嵐光接翠微。紉蘭思楚珮。看竹款柴扉。烟市人家少。山園菜甲肥。不知身是客。到處欲相依。

畫穀日盍簪圖贈方三刺史介亭

正月晴和風景新。白香山句更當穀日媿靈辰。良朋夜訪添佳興。好會朝期在宿因。簪插髻絲飛絮落。酒拈竹葉斷霞勻。定須爲客成圖畫。莫向塵途去問津。

重過許州示茗柯妹婿

黃蘆衰草起風埃。兩馬單車去復來。頭到今朝難再白。眼經此際嬾頻開。一身珍重惟需藥。千里相尋待舉杯。至戚情深休惜別。魚箋層疊好勤裁。

庚戌除夕示影山姪詩

莫嫌舟次逢除夕。小集賓朋興亦嘉。一盞同添今夜酒。雙燈已報隔年花。岸邊送臘聞傳鼓。江上迎春望使車。惟憶永陽官閣裏。相將絃管笑言譁。

祝 詰

字明甫嘉興人。乾隆二十五年舉人。有西澗堂詩稿。

蒲褐山房詩話。西澗爲豫堂先生子。工畫梅。橫斜偏反。各極自然。直與陳撈山金壽門輩異曲同工。詩學山谷老人。疎瘦苦澀。不肯墮尋常運術。錢嗣伯編修評云。風度閒雅。氣韻高秀。往往尋味於人。

所不味而風致彌佳。超然塵壒之表。

九月八日小集竹隱山房食蟹得八字廿六韻

葦花白湖漭。秋冷光汎汎。時物霜信催。朋尊眼翳刮。荅箸倚灘舟。郭索照夜窺。撥排疎作雨。人伺靜於獺。盈筐近市堆。級草幾輩紮。大者雄戈矛。怒觸手癢痲。小者困拘攣。响沫腹填札。兒童戲縱擒。釜鷺試漑刷。性躁窘烹煮。氣腥雜椒糶。俄看紅輪困。快嚼聲齧齧。嗜或尖團分。健爭螯跪扒。顛預殼負穹。肥膩脂凝臍。聒牙錯交加。鞞指霜空空。外骨碎且投。內黃實而硃。旁佐鄰醯醎。更可蜀薑苗。曲包厚味咀。搜剔秋毫察。作羹瑣屑餘。溜匙滌滲滑。拍浮客相持。故疾吾不殺。近食喜稍稍。無腸怪乙乙。得雋一勝百。失意十常八。庖製糟醕香。凍緘餅疊齧。斫雪誇螯蚌。爬沙陋蠶蝟。惠文增飾殊。馬甲萃美拔。衛身恃銳堅。登俎等刮削。例食菊英泛。醉聽桐絃憂。口腹累何窮。爾雅助癡點。

送項象尊北行疊韻

龍驤刺天梳。鼉吼殷岸鼓。轉粟官司漕。稽程月建午。衿青館餐謀。履素徑竇杜。載籍羅索邱。浮江豁門戶。喔咿枕慶浪。宿留野醺醕。水調發黃頭。靈旗蹇少女。壑填雀鼠壯。氣勃衫襪煦。挈兒歡於家。見客遠得侶。天倉胃次覘。路埃柳間數。近日輿蓋騰。離鄉蛩駝苦。雪霜迫我衰。媒介憐子嫵。沐霧蔚爲文。軋絲絢成組。何憂壁立四。已覺湖吞五。刀鐔盼秋期。篋稿誌物土。

繭蛾

風化室初離。娟飛力不支。前因成夢幻。相偶似情痴。栩栩形同寓。繩繩子亦宜。春愁更何限。鏡裏寫雙眉。

寄幼子德秀

我年踰五十。憐汝未成童。總角髻應短。經時面或豐。幼儀嫻拜跪。難字辨魚蟲。帙亂須頻理。音疎冀遠通。名駒常邁蹟。白玉在良工。幸自無災難。何堪守困蒙。分甘攜弱弟。對燭念衰翁。莫愛新襦煖。還愁旅橐空。田禾秋薄飯。庭菊雨荒叢。甚欲全生理。涼颺起斷蓬。

徐觀海

字雁川。號袖東。錢塘人。乾隆二十五年舉人。官寧州知州。

蒲褐山房詩話。袖東性情瀟灑。工小楷。畫蘭竹尤精。嘗從子方略。爲寫書官。其後在江西爲屬官。衙齋相對。譚詩誦畫。幾忘其爲五斗折腰人也。自予入佐秋官。君亦旋歿。詩集不可復見。卽所存數首。清遠閒放。宛見其人。

集查儉堂觀察凌波小築分韻得送字

春陰罨畫溪。小雨輕寒弄。草堂瞰衆山。蒼翠萬態貢。清讌陪羣公。瀟灑脫塵鞿。殷勤玉局仙。撥雲開新甃。潑刺釣浮條。不煩結魚纜。舉樽吸山綠。跌宕差伯仲。座中振清嘯。迥然響鸞鳳。遙憶載石遊。觀察自粵西歸著有載石 杳冥窮幽洞。仇池穴玲瓏。觸我遊仙夢。兩年踏蠻荒。幾爲弋所中。馳驅古戰場。鳴鏑每高控。悠悠塞上

鴻心事餘懷。惘雄譚夜轉深。不寐雜歌諷。何時逐歸航。蘭槳春波送。

題陳研齋別駕竹礪清吟圖

秋月白。秋風清。山中一夜雨。瀉作鳴琴聲。琴聲落落空萬慮。人在篔簹最深處。科頭一卷倚石吟。時有閒雲自來去。

題丁魯齋畫松歌

畫松好手不易得。誰其作者高士丁。畢宏韋偃去已遠。難將新意追先型。君家貌古心更古。古龍寫出之。而形鬚鬢亂。蟲夜叉髮。颯沓斜撇。鸞皇翎。驚螭卻走瘦蛟舞。怒雷般撼奔雲停。孤根曲節勁如石。其下應有千歲蒼。初疑香影落晴晝。髣髴清嘯藏仙靈。奇情鬱致洵無匹。妙想結構通杳冥。我官於鄂百不有。但餘卷軸羅寒廳。日長藤榻擁書坐。好風謾謾搖疎櫺。夢回忽見蒼髯叟。軒然一笑眼倍青。此時安得有此友。歲寒聊當座右銘。何時攜爾稽山去。飽飯濤聲欹枕聽。

和查榕巢觀察中蓮池見訪原韻

屐齒如傳空谷音。閒情淡遠寄遙岑。卷簾一榻花陰下。坐看白雲初出林。

申兆定

字圖南。號鐵蟾。陽曲人。乾隆二十五年舉人。官定邊知縣。

蒲謁山房詩話。南少日清羸。多病弱不勝衣。歷官湖南衡陽。河南長葛。及陝西大荔朝邑。均以廉聲著聞。然非其好也。中年學道。留心參同悟真。聞涇陽有李半仙者。本大興人。雲游海嶽。得養生術。年可一百四五。許晚居陶復中。衣履脂膩。圖南屏車騎。親謁之。從容扣擊。爲其許可。又工分書。遇有漢魏碑碣。必於鑿缺尋其點畫。凡偏旁波磔。反覆攷證。臨摹數十過。乃已。所撰涵真閣漢碑文字。如鄒閣頌。張壽景君諸碑。跋皆精深詳審。以訂隸釋。隸辨及金石圖之異同。故當自成一書。獨有千古。作令十年。連歸奄忽。其夢入西溪枕上偶賦云云。殆其詩議耶。

夢人西溪枕上偶賦

脉脉西溪路。南枝競報春。如何花底客。竟是夢中身。冷豔猶盈抱。茅檐尙可巡。惱人寒漏急。不得臥香塵。

和澄之醉後聞歌三絕復枉長律次其韻

妙緒頻抽八繭綿。移情終古說成連。不因身在曹劉後。要使神超李杜先。日月坐馳增黑業。篇章潤飾笑華顛。知君慧劍新磨淬。不許塵根一線牽。

玉筍山

崑崙上玉筍。直下窺汨羅。山風激潭水。鳴鳴聞九歌。

桃花紅

仙人種桃樹。花影散春江。浮邱住花叢。隔花聞仙尮。

張應均

字星巖。號東畚。元和人。貢生。官西陽州判。有入蜀草。

蒲褐山房詩話東畚工於山水居京師極爲今相國董公蔗林所賞自入蜀後筆墨尤勝未幾以病告歸家居數十年而效詩不多作近體亦復閑雅東畚本宋魏國公之後家藏南軒官湖北路轉運副使勅書凡十四行一百二十二字上有御書之寶據勅書南軒曾官御史兼秘閣考之本傳未嘗爲御史亦未嘗爲轉運副使此可証宋史之闕也後有程南雲跋云南軒十一世孫居松江有鏡秋峰自號九峰其弟遷居吳門故勅書存於東畚家而九峰不見於松江郡誌附記於此並諗我松之好事者

馬邊草樓夜話

天涯萍梗總浮生。萬里蒼茫愴客情。夢斷江雲迷故國。人隨山雨入邊城。壯懷每向登臨闊。旅感從教閱歷平。珍重交遊今聚首。草樓蕭瑟賦秋聲。

皂角舖

水郭山村隱翠微。人家竹裏對晴暉。紅葩的的秋塘淨。白石粼粼晚渡稀。林際炊烟新稻飯。門前洄嶼舊漁磯。江南風景依然在。客路休嗟未是歸。

山水題賦顧晉莊明府

蜀川歸去漫勾留。自笑身如不繫舟。他日江南山色裏。爲君艤棹荻花洲。

題畫

巒容深淺水雲寒。一片空濛著筆難。卻憶吳山亭子上。翠鬢每向鏡中看。

湖海詩傳卷二十四

胡高望

字希呂，號崑圃，仁和人。乾隆二十六年殿試第二人及第，官至左都御史，謚文恪。

春日就亭卽景

碧蘿掩映小林坳，繞屋平岡迤邐經。一曲蕭江晴入畫，幾層閣岫暖浮青。登臨到處開襟抱，風雅當年見典型。好景無邊添勝賞，佳遊彷彿峴山亭。

校士寧都

春光駘宕過梅川，民物熙和境靜便。膏雨乍收青眼外，人家多住翠微邊。翠微峯距寧都城四十里，金精峯關心芳序塞蘭節，入畫輕陰釀麥天。最喜時平風俗美，星軺周覽記經年。按試諸郡已一周矣。

趙翼

字雲松，號甌北，陽湖人。乾隆二十六年殿試第三人及第，官至貴西道，有甌北集。

蒲褐山房詩話：雲松性情倜儻，才調縱橫，而機警過人，所遇名公卿無不折節下之。初受知於汪文端公，及入中書，直軍機處，傳文忠公尤愛其才，旋以及第，改翰林，數年簡放知府，出守廣西鎮遠。時緬甸用兵，詔選隣省幹才，助蒐軍實，君住永昌，半載會文忠將督兵深入，遣之還粵，又爲李制府所賞，調廣州，并登薦剡，擢貴西道，尋以母老留養，遂不復出。迄今幾三十年，同時與袁子才、蔣心餘、友

善才名亦相等。故心餘序其詩。謂與酹落筆。百怪奔集。奇恣雄麗。不可逼視。子才謂其忽正忽奇。忽莊忽俳。稗史方言。皆可闌入。洵知言也。乾隆辛亥夏。余與慶樹齋尙書。奉使獻事高郵。君時主揚州書院。琴舟見訪。銜杯促膝。竟日而返。蓋其篤舊交嗜譚藝如此。

遊惠山

曉緣梁溪行。波滑一枝櫓。忽聞溪流聲。知是夜來雨。舍舟入林麓。霽色澹天宇。空翠霏濛濛。孤烟起縷縷。葉落風自掃。山缺雲或補。言尋漪瀾堂。寒碧見太古。却訝尺許深。汲綆萬人取。始信一眼泉。中涵滿腹乳。臨流澄水觀。眉髮朗可數。翻嫌塵網身。到此成傖楚。日斜歸路促。勝遊歎莽魯。回首蒼山巔。新月上高樹。

同顧北墅王漱田觀西洋樂器

郊園散直歸。訪奇番人宅。中有虬鬚叟。欽天監正劉松齡等皆西洋人出門敬迓客。來從大西洋。官授羲和職。年深習漢語。無煩舌人譯。引登天主堂。有象繪素壁。靚若姑射仙。科頭不冠幘。云是彼周孔。崇奉自古昔。再遊觀星臺。爽塏上勿囂。玻璃千重鏡。高指遙天碧。日中可見斗。象緯測晨夕。斯須請奏樂。虛室靜生白。初從樓下聽。繁響出空隙。噌吰無射鐘。嘹唳鞑賓鐵。淵淵鼓悲壯。坎坎缶清激。鐸于丁且寧。磬折拊復擊。瑟希有餘鏗。琴澹忽作霹。紫玉鳳唳簫。烟竹龍吟笛。連桐控榻底。頻櫟鉏鋸脊。鞞耳柄獨搖。笙舌炭先炙。吸噓竽調簧。節簇笳赴拍。簾疑老嫗吹。筑豈漸離擲。琵琶鐵撥彈。箏箏銀甲畫。空泉澁箏篴。薄雪飛篳篥。孤倡輒羣和。將喧轉稍寂。萬籟繁會中。縷縷仍貫脈。方疑宮懸備。定有樂工百。豈知登樓觀。一老坐搗擘。一音一鉛

管藏機振關膈。一管一銅絲。引線通骨骼。其下韞風橐。呼吸類潮汐。絲從橐罅縮。風向管孔迫。衆竅乃發響。力透腠理去。清濁別若眉。大小鳴以臆。韻仍判宮商。器弗假匏革。雖難繼韶護。亦頗諧皦釋。白翎調漫雄。朱鷺曲未敵。奇哉創物智。乃出自蠻貊。緬惟華夏初。神聖幾更易。鸞鷲肇律呂。秬黍度寸尺。嶰谷截綠筠。泗濱採浮石。元聲始審定。萬古仰荆獲。迢迢裨海外。何由來取則。俗倫與后夔。姓名且未識。音豈師曠傳。譜非制氏得。始知天地大。到處有開闢。人巧誠太紛。世眼休自窄。域中多墟拘。儒外有物格。流連日將暮。蓮漏報西刻。白鳴鐘歸將寫其聲。畫肚記枕席。

錢充齋觀察遠餉永昌麪作餅大嚼詩以誌惠

久客生計窘。晨起惟啖粥。山行想酒樹。野處訪麪木。嘉惠荷故人。玉屑餽滿籠。貧兒詫驟富。動色到僮僕。於焉商食單。享此非分福。冷淘勞撝旋。水引費撈漉。鱗鱗乏脂豨。腦臍少棧鹿。餽饌法不嫻。餽餽料未著。聞昔蠻荒中。祭必人首戮。武侯南征來。改薦饅頭熟。今行卽其地。厥例正可續。又無起酵具。籠篋枉削竹。繫惟作餅事。力省成易速。鴟夷剌澗泉。鴉嘴鋤野菽。先揉銀泥爛。次納金雍馥。按抄彌罅縫。按據擴邊幅。周輪傲鏡圓。空中宵壁複。火不武而文。功旣翻又覆。逼燄焦有癩。得氣飽如毳。斯須動頤朶。雪膚瑩滿盞。饑口欣過屠。亟趁出熬煨。寧顧齒牙倦。本無書畫黷。一笑戎馬間。將軍不負腹。卻憶豪富家。茲事鬪鼎餽。束皙賦猶陋。吳均說未錄。佳名巨勝殊。雅製曼陀獨。撿蜜雕駝蹄。拌槐蒸兔目。肪求赤髓羊。腴選砥背犢。

膏環圓無端。皦條直不曲。仿古紅綾包。翻新綵花簇。百和工雜糅。千層互連屬。裂作十字勻。釘就五色郁。酥有見風消。薄可映字讀。脆或嚼爲粉。軟或卷成束。視我腐儒餐。奚啻飯脫粟。顧當飢渴中。所願良易足。中流遇一壺。直抵舟萬斛。殷勤謝珍貺。敬誌古誼篤。已增十日糧。況勞千里穀。從軍王仲宣。累人閔仲叔。飢驅彭澤詩。乞米平原牘。生平飢餓氣。不覺滋愧慙。所悲茹淡久。欲語羞再瀆。晉飢惟恃秦。隴得又望蜀。何當更拜嘉。庖人日繼肉。

照陽關歸順州與小鎮安分界處絕壁無路忽山半一洞如城門以通往來

危崖如削鐵。橫列截前路。問道無可尋。陡壁孰能赴。地絕天爲通。神扃在雲霧。初時貿貿行。心疑僕夫悞。黑箐叢篁間。線道屢盤互。攀躋過木杪。始見洞穴露。其深三四丈。其廣十餘步。恰從嶄絕處。橫穿一罅度。圓若城關門。兩頭俯烟樹。地迥去天近。日出光早煦。關名日照陽。應補酈生註。外達交趾國。內連邕管戍。雖似入甕行。不比山竇汚。設無此厚豁。萬古瘴嵐鍋。時清消警備。不藉儲胥護。重閉念勇夫。詩成仍卻顧。

青山莊歌

毘陵城北皆平地。何許林巒疊層翠。路人說是青山莊。門帖新題官賣字。我來出郭偶經行。款戶曾無主。出迎繡闥雕甍空。尙在殘山剩水不勝情。頭白園丁老扶病。爲余縷述資談柄。園是前朝貴介爲。依稀記得延陵姓。後屬安昌相國孫。廿年行樂尤繁盛。相國勳名在廟廊。清貧未有午橋莊。令孫繼起爲方伯。分

陝曾裁召伯棠。罷官歸徙常州住。百畝林扃供散步。入門便陋舊規樞。大笑前人太寒素。已編錢埒買堂
成。拚倒金籬將地步。不覺松杉也改觀。何曾臺榭還如故。繚垣甃異枳編籬。砥室築臨花夾路。十馬馳毬
關作場。百牛拖石排依樹。粉本溪山似嶂懸。壁衣籬瀾皆紗護。一重一掩景迴環。某水某邱途錯互。倚杖
疑探栗里幽。汎舟訝入桃源誤。勝賞經年興不殘。四時花鳥暢遊觀。清音警露鳴仙鶴。浩態嬌春豔牡丹。
西府海棠移釦砌。上林盧橘植雕闌。跳波魚婢能知樂。挂檻鸚哥解勸餐。園林成後教歌舞。子弟兩班工
按譜。法曲猶傳麴部箏。新腔催打花奴鼓。反腰貼地骨玲瓏。擎掌迎風身媚嫵。阿誰棋墅伴壺觴。綈几羅
幘樂未央。幸舍賓朋珠履貴。使房姬妾翠鈿香。傾城妓入籠鵝館。要路官登射鴨堂。熱客倚冰終日計。乞
兒向火一羣忙。主人自顧矜豪放。揮霍不將錢篋障。博局籌償舊帑錢。纏頭錦出新花樣。茶經蟹眼淬旗
槍。食品猩唇調醢醬。蠟淚成堆更燕膏。酒瓶臥壁仍傾釀。笙歌酣倚賞花亭。鎗火醉歸邀月舫。自製當筵
上壽詞。青山與我長無恙。豈知卮漏比泉流。猗頓潛懷折閱憂。已失又思求塞馬。未蹊輒欲奪田牛。豪名
本足招人妒。禍事真成與鬼謀。張樂正期投轄飲。叩門忽報檻車收。填尸園土悲黃犬。回首歡場付爽鳩。
春夢一場那可再。祇今惟有青山在。青山也要屬他人。官價三千聽人貸。猶憶倉皇對簿趨。難憑複壁寄
錙銖。委地圖籤爭剔玉。隨身衣履敢留珠。翻教百口求春貨。那有千金賄獄輸。籍到平泉花木簿。林霏亦
似淚模糊。平生枉使錢如水。此日人情薄於紙。有誰廣柳路旁迎。并少綠珠樓下死。老僕如今也入官。仍

充園戶守荒寒。飢窮全仗遊園客。給一文錢一度看。往日監門梁肉厭。近時失路斗升難。我聞此語心根觸。信有興衰如轉轂。重向林巒曲折尋。繁華彷彿留人目。垂楊影裏釣堪垂。秋樹根邊書可讀。愛山我乏買山資。有山渠少看山福。空餘別廟祀花神。自塑泥身占巖谷。晝寢香消落燕泥。空堂氣冷飛蝙蝠。平津廐庫古曾悲。華屋山邱今莫哭。梓澤風流昔未經。踏春偶到訪池亭。無端一段園丁話。說到傷心不忍聽。日暮歸途回望處。夕陽猶照晚山青。

南珍

維粵宅南位離火。陽明所耀開菁英。凡百瑰璋負奇質。咸不脛走來羊城。天寶旣徵孕毓厚。人巧亦見工力精。不惟其產惟其聚。奇彩耀市目欲瞠。南烹食貨且勿述。試數服玩僕屢更。氈紋吉貝貢入篋。繭絲胡蝶縑滿籬。盤金繡毬龍鳳舞。蹴花文錦苻藻縈。不知鮫人在何處。方空織出涼綃輕。禽羽爲毳獸毛罽。豔殺血染紅猩猩。雕鏤肖形推象齒。圓爲牟尼方觚稜。蕉葉剪裁掩紈扇。椰瓢裝相抵咒觥。奩具斑浮瑇瑁。曆屏風眼活孔雀翎。蟬翼燈清罨霧縠。龍鬚席軟輕桃笙。檀欏斲器訝笏滑。玻璃懸鏡涵水明。復有絕技出海外。能連天咫規璣衡。機括測景針自指。橐籥按刻鐘輒鳴。其他珍異難殫述。砵磈瑪瑙猶嫌儉。蜜蜡淨無雀腦白。琥珀瑩有虬松頰。蒸栗膚腴黃蠟石。落茄花映紫水晶。就中更貴珊瑚樹。鐵網絞得逾球瑛。丹幹磊砢枝鬱律。光賤絳燭高朱櫻。珊瑚以蜡燭紅爲貴。櫻桃紅爲貴。瓊州沈香亦佳品。黎母東洞最擅名。伽楠生結鴨

頭綠。搯之指爪微痕生。是皆貴重不易得。市牙尙有價可評。賞鑿家且置勿道。別購骨董追姬嬴。土花斑
攷古彝鬲。水銀皴辨舊玉珩。晉唐名畫丹碧絹。柴汝祕盜翡翠罌。其晚出者寶益異。金剛鑽及狸貓睛。組
母綠射綵華透。松見紋裂鐵線橫。青金石取烏斯藏。碧霞璽採猛密阮。更有珍珠似明月。月華人螿胚胎
成。合浦六池產有幾。販自番舶來重瀛。重或數銖大徑寸。形體圓滿光品熒。蘭檀雅宜玫瑰飾。玉盤肯逐
琵琶傾。一握便可百千索。賈胡居奇恣取盈。計直不數金三品。誇富何論貝百朋。地大物賡信繁盛。匹夫
懷璧徒硜硜。噫嘻乎。連城照乘古所豔。要祇一得難兼營。豈若此邦備衆美。始信奧區用物宏。從來物聚
於有力。惟購者衆始畢呈。爲問粵中各官吏。其家豈必皆鄭程。朝廷制祿有定額。何以官橐多奇贏。伊余
一雙書生眼。乍睹不覺適適驚。腸飢未踏羊蹄菜。指動忍染龜鼎羹。竭民脂膏飽嗜好。不有人禍將天刑。
吳隱酌泉表素節。包老投硯垂徽聲。雲烟過眼付一笑。蕭然氣味含孤清。

題蘗菴僧遺像

曾住花山最上層。披圖猶見骨峻嶒。立朝章疏批鱗手。易世衣冠削髮僧。故國遺墟傷北望。空門法席演
南能。孤標自是經奇士。莫但相推續佛燈。

哭門人董東亭庶常

十年一第返江關。也算人生衣錦還。到日家惟懸磬在。病來身死亂書間。方修昆陵邑志消埋奇氣虹千尺。零落

殘鷲豹一斑。贏得憐才情不少。京華朋舊淚同潸。
孤露身真落葉如。曾憐少賤帶經鋤。生無薄產常依婦。才可名山未著書。家在一方鴻爪裏。名沈千古貉
邱餘。從知墮地須論命。何物憑君覽揆初。

漫興

紙窗涼逼露華清。顧影蕭然感易生。漸老髣毛撥黑白。就衰筋骨驗陰晴。將車送鬼窮難去。食字求仙候
未成。手剔寒燈清不寐。階前落葉報秋聲。

送童梧岡編修視學湖南兼寄諸桐嶼辰州

蕩函五色麗朝霞。遙指荆南驛路賒。道脈至今稱嶽麓。才人自古到長沙。雲開衡岫占文筆。帆轉湘流過
使槎。大雅扶輪須努力。儒生此職最清華。

行部辰陽禮數寬。有人手版謁征鞍。桐嶼君同年也應劉才子原同調。屈宋衙官恐未安。燕寢香凝杯酒暖。轅門
風靜鼓聲寒。相逢爲道邠鄉老。自少詩朋興漸闌。

聞桐嶼罷官卻寄

一麾出守到辰陽。忽被彈蕉孰中傷。儒術豈應疎撫字。仕途未可恃文章。空留東閣花如雪。可惜中年鬢
未霜。太息春明分手日。曾期治行漢循良。

竹君述菴叢園來殷耳山璞函小集寓齋卽事

老屋三間聚履綦。到來使擬夜歸遲。地非北郭聯吟處。人似西園雅集時。名飲豈須絲竹肉。清談無過畫書詩。只慚蔬韭誇高宴。未免人嗤措大爲。

蕭寺看花僅幾旬。俄驚裘褐戒霜晨。年光眞覺如彈指。著述猶難到等身。五鼎食中無我輩。千秋亭外幾癡人。祇應轟醉過殘臘。此便消寒第一巡。

浮湘

碧天無際水茫茫。泛檝遙臨楚塞長。不比逐臣須禱嶽。從來詞客例浮湘。路經九曲帆頻轉。地爲三閩草亦香。懷古高吟到分夜。一聲清瑟數峰蒼。

永州道上

烟雨瀟湘泛使槎。九疑一半暮雲遮。長途已過峰回雁。寬政今無俗捕蛇。袁渴尙傳遷客記。浯溪難訪漫郎家。篋中剩有舂陵句。留伴孤燈一炷斜。

崑崙關咏古

醜酒軍門正滿壺。嚴關夜半已潛驅。千秋部曲皆番落。今各土司皆狄公從征將校之後也。一片山川尙陣圖。何必梁公爲遠祖。不妨季布是黥奴。經過想見英雄氣。古木靈風叫鷓鴣。

述庵璞函緣事罷官亦從軍來滇卻贈

幾載京華共酒樽。豈期炎徼再相親。翻愁日下無名士。卻喜天南有故人。株累驚心金齒戍。巢痕回首玉堂春。好將戎幕聯詩社。吟徧蠻鄉景物新。

哭果毅阿公病歿於軍

曾從絕域立功回。五百驍兵萬賊摧。回部之役。公以五百兵敗賊萬衆。使相旌旗開幕府。上公劍履畫雲臺。攻心徼外勳垂就。距受降僅數日矣。曳足軍中志可哀。太息金沙江畔路。將星寒落浪花堆。

曾忝軍諮畫策長。血痕親見裏金瘡。可憐病到三遺矢。猶自身衝百戰場。門望高還傳帶礪。國恩深爲紀旂常。獨悲丹旆還都日。故吏無由奠一觴。

慈元殿宋楊太后同帝昺居此。

中土無家寄海隅。數椽椒寢莽榛蕪。遺蹤漫擬陽人聚。塊肉曾攜趙氏孤。臣妾僉名羞作表。公卿負屐儼成圖。最憐涕泣臨危語。何減唐宮麥飯呼。

壬辰冬仲以廣州讞獄舊事吏議左遷特蒙溫旨送部引見聖恩高厚蓋猶不忍廢棄而衰親年已七十有五書來望子甚殷諭令早歸以慰倚閭望因呈乞開府圖公給假旋里擬卽爲終養計途中無事感恩述懷作

一重公案律條訛。鐫秩非關吏議苛。迂拙自慚更事少。聖明猶慮棄才多。恰從順水乘歸櫂。擬乞閒身着釣簑。不是敢辜恩命重。高堂衰鬢已全皤。

多謝諸公苦挽行。

圖公堅欲奏留補山約軒笠民諸公亦多敦勸

實無才可濟蒼生。勤將政補猶形拙。清愛人知己近名。坎坎伐

檀歸客思依依。折柳故人情。翻教不忍輕言別。審酒更番爲治觥。

衙齋無事可消磨。一載閒情付咏歌。老去賀公吳語慣。病來莊鳥越吟多。滄江秋晚衣裁荔。空谷天寒屋補蘿。不覺詩成真作識。篇篇都是憶巖阿。

韓蘄王墓

麒麟高塚占雲墟。異姓眞王百戰餘。勳業未來先臥虎。英雄老去亦騎驢。葬應祕器蒙分賜。績尙豐碑表特書。宋待功臣原不薄。棲霞何事獨誅鋤。

述庵從軍滇蜀閱七八年。凱旋後超擢廷尉。茲乞假歸葬事畢。還朝道經毘陵。停舟話舊賦贈。

烏撒匆匆握別遙。何期相晤在江郊。十年京國詩文契。萬里邊塵患難交。曳履喜公遷棘寺。息機笑我老書巢。停舟不盡離懷訴。坐到斜陽挂樹梢。

滇疆蜀徼佐軍籌。奏凱歸來進秩優。蟻蝨久知生介冑。貂蟬眞見出兜鍪。公蒙恩賜孔雀翎林黃詔特榮先壘。飛

白書應起賜樓。新構第宅卻憶吾家老元叔。與公會共赴星郵。

陸隨絳灌本殊科。誰似先生兩不磨。文苑才偏臨陣勇。戰場歸又著書多。放翁詩滿成都市。劉秩身當曳落河。如此儒冠纔不負。眼看青史入編摩。

南天門

峽束青冥上。嚴扃構次寥。天惟通一線。星可摘三霄。路鑿鉗椎苦。峰排劍戟驕。控臨戎索大。拱衛帝京遙。狹僅容單騎。驅難並兩鑣。地形愁倒馬。風力稱盤雕。險叶泥封谷。危如棧架橋。時清無戍壘。巖迴有僧寮。捲幔霏空翠。炊厨拾斷樵。鐘魚聞上界。沆瀣吸中宵。雲族漫爲海。山支湧似潮。平生登覽興。我欲馭輪飈。

陸錫熊

字健男。號耳山。上海人。乾隆二十六年進士。二十七年召試。賜內閣中書官。官至左副都御史。有篋郵詩集。

蒲褐山房詩話耳山博聞彊記資京絕人。由中書入直軍機。初與予奉勅編通鑑輯覽。頃之命輯永樂大典。復求天下遺書。開四庫館。以薈萃之。校對數百人。謄錄至千餘人。歷十年始成。而君與今大宗伯紀君曉嵐司其總。每進一書。仿劉向曾鞏例。作提要。冠諸簡首。上閱而輒善之。特旨由刑部郎中授翰林。侍講文字。受知駁駁。嚮用典試者三。督學政者一。後因奉天所儲四庫館書。中多脫落舛誤。奏請自往覆校。比至而病歿。時論無不痛惜。平日進御之作。工而不穠。婉而能切。同人推爲莫及。至詩文隨手散佚。後搜篋中得數百首。皆應酬之作。非其稱意者。

橫塞灘

嗟哉橫塞灘。茲險何由奠。山青削兩崖。天白露一線。衆壑競奔流。斜曳萬丈練。劔土濯山根。亂石壘壘見。

水洲列四五。沙卵成高堰。上生芷與蘅。其色頗葱蒨。清流歧數支。觸石珠交濺。縈迴轉似輪。激駛直如箭。崩波恐一決。百丈從後牽。木篙拄兩肩。跳躍左右踐。迂久始過灘。回顧猶驚顫。坦率情所趨。行險理非便。因之悟至道。長嘯得所遣。

舟宿白蓮涇得吳大充之見懷作卽用韻卻寄

停橈向空江。暝烟散叢薄。三更下風露。天宇轉寥廓。故人枉書札。三復停雲作。歡娛罷琴酌。良會久寂寞。伏枕更攬衣。太息感今昨。緘意託修鱗。寒潮正東落。

青瑤池館夜集分賦得石字

涼月松際生。流光滿溪白。開軒引蘭酌。幽襟契泉石。禽翻竹風疎。人語桐露滴。不有池上吟。誰爲永今夕。

鉛山道中追悼蔣心餘前輩作

豫章有名材。千尋挺巖谷。森然到合抱。徑寸受氣足。咸韶發清奏。冠佩好奇服。鶴鸞滿中臺。豪逸天使獨。靈心苦雕鏤。健筆謝邊幅。淒涼桓伊箏。諧笑東方肉。微言參聖諦。餘子但碌碌。遠追正始音。盡洗皇苒曲。寧徒歷西江。詩派繼前躅。文端今歐陽。一見快刮目。承明須著作。藜火照天祿。司空東閣士。彭蔣粲雙玉。故人已龍驤。一老猶驥伏。空呼野才子。去伴古尊宿。晚憐爲貧出。又捧侏儒粟。方乘桓氏驄。竟集賈生鵬。我昔游諸公。杯盤互追逐。交游散風絮。歲月轉車轂。當時二三子。強半在鬼錄。都亭憶分攜。冷月挂疎木。

雖言苦風痺。尙喜按絲竹。心知見無幾。慰語痛在腹。終然厄龍蛇。聞耗淚盈掬。人間讀書種。黃壤葬籛篋。定知三尺墳。夜有紅光燭。偶來通德鄉。山川覽清淑。聊爲投文弔。未遂隻雞哭。鳳毛付超宗。食子宜在穀。他年訪斜川。遺編許重讀。

鄱陽湖

昔讀禹貢書。今泛彭蠡澤。連山盡東趨。大地忽中坼。岷流束襟喉。楚派會圭璧。微茫波濤青。破碎洲嶼黑。網舡綰諸州。津堠通十驛。魚龍閒自舞。天水了不隔。當年戰鄱陽。陣火照山赤。檣艦灰燼滅。銘碣丹青泐。雄圖久銷沉。遺廟空血食。惟餘浩渺觀。一洗芥蒂臆。我來水歸壑。又苦寒飈射。千尋蹴巨浪。七日滯行客。崩崖困掀簸。永夜愁偏側。遙瞻落星戍。悵望柴桑宅。出險會有時。扁舟竟安適。夢醒聞好語。旗尾西北擲。

彭澤縣

大江會九派。驚濤浩無邊。潯陽三舍餘。五日勞洄沿。層崖口危堞。孤城枕江壖。茫茫辨洲樹。稍稍開墟烟。卽景感徂歲。望古懷昔賢。水勢樞陽西。山光義熙前。我因一囊粟。乘此萬里船。所求亮錙銖。忍受旁人憐。造物養不材。飲啄良有緣。但當咏時運。便可歸園田。三復乞食詩。操瓢亦欣然。

桐城江上有懷姚姬傳禮部

江介滯寒景。扁舟汎夕陰。龍眠望巒翠。不覺暝烟沉。眷言同懷子。結廬臥高岑。焚香散貝帙。潔膳娛萱襟。

東華一爲別。種松已成林。昔游曠嘉觀。今塗阻遐尋。相思無日夜。浩與江流深。蘭省夙相要。歲寒亮此心。綢繆十年舊。契闊二毛侵。

三笑堂

開門見南山。松花墮涼雪。言尋虎溪路。一逕趨透折。深堂寂無人。緩帶滌煩熱。幽襟契蓮社。吾愛陶靖節。意行無町畦。曠致縛禪悅。當年三客蹤。草長藜音絕。丹青尙遺姿。巾服儼孤潔。描摹亦駢拇。色障非大徹。法師具天眼。萬象不生滅。虛空本無槁。那事強分別。一笑撒手迴。妙諦不可說。請聽橋下水。猶似廣長舌。

分賦得有竹莊送紀心齋先生南歸

石田老布衣。名著高士錄。當年玩遯占。卻薦適初服。結廬相城里。人境闕巖谷。募疏手寫成。乞種萬竿竹。生絹揚烟霞。賓屢填戶軸。至今想修髯。飄飄映餘綠。如何塵外蹤。乃受畫壁辱。無名挂官府。彌見獨行躅。先生早通籍。甘載寄朝祿。出處跡雖歧。風流趣堪續。昨宵西塞夢。飛落橫塘曲。上書乞身歸。投老此卜築。遙知琅玕林。中買數間屋。閉門聽秋風。蕭森憂寒玉。通泉遠分筧。劖筭晚當肉。逍遙定長年。先後纒清福。應嗤都南濠。但點讀書燭。

題馮星實夢蘇草堂圖

大峨仙人天與遊。夢蘇居士神相酬。鬚眉悅見七百載。鳴止正待三千秋。平生尙友香一瓣。竹屋青燈歲

方晏。鄭箋。矻矻。手自抄。莊蝶。遽遽。目非幻。下峽。以還。渡海前。嬉笑。怒罵。皆詩篇。搜來。稗野。添公案。揀盡。塵沙。得定。詮。心精。感通。如面告。笠屐。翩然。風肅肅。尋春。豈訪。符秀才。聽雨。還偕。老同叔。披帷。一笑。顏色。親。掉頭。不住。機鋒。真。文章。幸脫。元祐禁。襟袖。應貯。眉山春。蓬萊。遊戲。歸何處。壽骨。長身。起餘慕。隨風。咳唾。落尚新。湧地。源泉。默成悟。巧意。丹青。想入微。月梧。烟篠。晚依稀。豪情。湖海。呼能出。真面。廬山。認儻非。開府。生辰。詩滿。紙。學士。高齋。署蘇米。君家。證夢。復草堂。去酌。寒泉。薦芳芷。

蔣丈奕蘭招陪沈歸愚宗伯彭芝庭司馬及諸同學集繡谷送春

荼蘼。風起。晴鳩。啼。曲巷。過雨。生春泥。紅橋。四百。芳草。暮。落絮。飛遍。昌亭西。樓頭。花枝。樓下。雪。流光。匆匆。坐成別。名園。上日。羅衆賓。共惜。江南。好時節。江南。春漲。青接天。十日。正泛。沙棠船。白蕉。之衫。高齒。屐。乘興。來醉。櫻桃。筵。竹梧。交蔭。敞瑤席。黃金。叵羅。持勸客。良辰。勝事。本難期。復見。風流。照泉石。簾光。泛綠。池。水平。碧。羅裊。裊。含烟。清。石牀。洗盞。更盤礴。欲落。不落。斜陽明。東風。無情。鬢成素。多謝。流鶯。喚人住。倒載。狂歌。歸去來。來朝。酒醒。春何處。

遂初園歌呈拙菴吳丈

先生。家本。天都。峯。丹梯。鐵鎖。攀芙蓉。白雲。如海。蕩胸臆。手弄。明月。驂茅龍。十年。夢落。滄江曲。卻向。巖東。縛茅屋。自有。前期。侶。向禽。何妨。混迹。同樵牧。桃花。滿溪。溪水香。柴門。晝掩。山蒼蒼。園林。結構。足佳趣。枳籬。百

曲沿滄浪葛巾方袍自來往。芳逕無人碧苔長。急雨微生竹院涼。暗泉細落松根響。紅橋窈窕碧玉流。輿
酣散髮乘扁舟。仙源路轉豁明鏡。倒影忽浸花間樓。先生平生此休息。林下清風滿泉石。短鍤常攜劇藥
童。方牀頻約圍碁客。西園昨日花亂開。置酒邀我臨高臺。華林魚鳥趣方永。下若尊罍晚更催。相看綠鬢
顏如昨。不用巾箱圖五岳。結習難忘蠟屐情。息機真羨披裘樂。別有江湖憔悴人。年年席帽苦風塵。攜家
橫欲就塘曲。射鴨撈蝦作比鄰。

題晉陽申五兆定山樓聽雪圖卽送其省覲杭州

冥冥寒色低壓檐。千巖萬壑開銀匳。天公昨夜勞玉戲。樵徑絕跡山埋尖。孤茅天外誰所縛。玉虛樓閣清
光添。幽人高枕聽蕭瑟。明窗透影疑冰蟾。橫空曉起發奇賞。四面盡拓蘆花簾。朔風亂吹柳絮落。冬序瞥
見繁花粘。乍如春蠶臥竹箔。食葉上下飢難厭。又如鐵騎驟風雨。銜枚將令森兵鈐。危簷溜折栖鳥起。凍
澗飄入遊魚噉。長松振鬣遠撐突。摻拳亂憂曬龍髯。空山無人萬籟寂。聞根不斷神彌恬。卻思踏雪控金
勒。霹靂應手弓初拈。豪情爭如逸致好。登眺不畏寒威嚴。段橋殘雪景尤絕。山水勝事君能兼。驪歌唱罷
送征棹。知衣空愧塵容黔。

桐廬

信美桐廬縣。初冬似暮秋。人家烏柏樹。客子木綿裘。樂歲高低廩。通川上下舟。宵來試山雪。白映老夫頭。

夜雨簡奕蘭

讀罷離騷意惘然。更堪暝色下江天。小牀怯雨留鐙坐。薄絮欺寒壓夢眠。浮世因緣雙屐外。少年心事一杯前。張郎亦是秋風客。擬向鱸莊問釣船。

瑞洪閒雁

番陽急雪夜淒淒。幾隊哀音落枕齊。夢老慣依邊月迴。羣孤猶怕嶺雲迷。江湖浩蕩驚新侶。秔稻艱難憶故棲。欲寄封君轉惆悵。流黃機畔翠鵲低。

陪瑤華主人遊盤山千相寺分韻得亭字二十韻

疊磴趨中谷。連山拱翠屏。客來扶棧度。騎轉隔橋停。石壓蹲蛟勢。松盤舞鶴形。繁花遲潑雨。絕澗想奔霆。蟻道方緣垤。獅林忽建瓴。雙竿承寶刹。兩扇豁金釘。雲氣晴浮瓦。泉音晝入鈴。香臺禽欲下。講座虎曾聽。海色連平楚。天光動落星。名洞開窻窳。洗鉢貯清泠。田俯僧衣碧。峰交佛髻青。何人崇象設。多事鑿岩扃。相好闕俱足。名言理亦冥。唐燈懸古厂。遼碣剔殘銘。興發還紆策。幽尋更得亭。拈毫逢邂逅。慙几接芳馨。遊許陪飛蓋。才真謝叩莛。流連傳茗椀。指點拓窗櫺。歸路頻迴顧。長吟到薄暝。題詩崔顥在。勝地媿初經。

雨中作

春烟漠漠水初生。隔院遙傳百舌聲。最是客愁消未得。杏花寒雨過清明。

蓉江道中懷人絕句

光祿文章壓輩流。瑯琊宗派鳳麟洲。朝回日日餐蛾綠。鬢影書聲共一樓。

王光祿
鳴盛

錢郎瘦比東陽沈。地近蓬萊會列仙。會到和林訪遺事。斷碑零落兔兒年。

錢侍讀
大昕

定香居士老詩禪。卜宅仍隣古寺前。常說夜遊同謝監。柏陰如藻石幢邊。

王舍人昶時昶寓在寄園而謝
編修壙所居聽鐘山房皆在

忠寺之北兩君月夜常偕勝
侶往坐松下至二三更而歸

鄭郎昨上蓮華頂。濯髮親經玉女盆。手摘明星望鄉國。黃河如線走中原。

鄭禮部
鴻揆

韓莊閘口望微山湖

眉痕淡掃夕陽邊。獨倚危橋望楚天。引起江湖十年夢。亂帆如葉水如烟。

湖海詩傳卷二十五

曹仁虎

字來殷號習庵嘉定人乾隆二十二年召試賜內閣中書二十六年成進士官至侍講學士有詠典
秦中刻燭炙硯諸集

蒲褐山房詩話來殷以聲華名望為都下所推然端靜自守恂恂粥粥不至朝貴薰灼之門其詩初宗四傑七言長篇風華縹麗壯而浸淫于杜韓蘇陸下逮元好問高啟何景明陳子龍及本朝王士禛朱彝尊諸公橫空排募才力富有七律尤高華工整獨出冠時雄渾之語則有雙峽天低連雪嶺五丁地險接維州校尉盡看紅帙首材官齊號黑雲都奸細幾曾誅趙信征人空見老班超紫霧千盤開漢碣碧霞四氣拱秦封西京專闔推橫海東漢登壇數伏波初添蜀郡三城戍更遣秦川四道兵執法烏壘秦御史談經絳帳漢儒林情韻之語則有梨花小院重重樹燕子高樓面面風叱犢聲聞黃稻隴歸鴉影點綠楊村東風樹樹生紅豆南浦迢迢送綠波明聽曲几彈棋地小雪疎梅詠絮天初聽成雷喧白鳥閒看避雨徒元駒澗道水聲疎雨歇江天帆影夕陽多客路正當歸雁後癯心多在落花初白蘋千點鷺初散紅雨一簾鶯亂啼時詩道雜而多端或做白居易或做黃庭堅楊萬里或至做袁宏道信手塗抹率以流易佛巧為能如郭舍人之俳諧鄭五之歇後黃茅白葦彌望皆是及來殷詩出乃奏金石以破蟋蟀之鳴然其集未行世人知之者尙少定例各宮殿門對聯撰自翰林次由工部每至封印後工部堂官率屬敬謹懸掛新春開印後收而謹藏之歲以爲常其體舊者隨時更換乾隆癸未甲申間多係來殷恭撰今其集中所存如皇極左門云九重數斂範陳箕曼羨蕃釐共錫萬國會歸光戴斗蕩平軌路同遵右門云洛籥福紀慶洪延象協居中建五嶽筴祥符徵順敘功俾則大面三斂禧門云輝駢寶券晉雲闈推策純常集暇慶衍璠籌贏解屋闌珍鳥奕流韞斂禧左門云重霄日月燭升恒景運祥開久照八表山川徵樂壽昌期福集新韶右門云作成熙皞驗風從治比春孳夏育祥迓熾昌昭德致符呈乾絡坤維錫慶門云億萬齡錫羨延洪保定自天孔固三千界重熙浚洽祥和與物同春左門云三壺景象駐恆春鈿砌環迎戲福六幕光華徵復且

形宸茂集繁祺右門云珠囊譽緯召麻徵福界垣臨太乙玉燭年華彰瑞應昌辰化溥由庚影壁門
 云川岳獻珍符烟煴闡瑞日星昭景賦紉綬呈華玉琯奏誠和氣調九寓瑤樞徵廣運衡正三階茶
 膳房云得氣先莫長應月呈祥翠萼並迎風五色雲英滋秀草千秋露實熟蟠桃湛露凝甘盈缶甕
 光風布煦應瑤箒液酌衢尊同介景音調解管徧覃禧例此數百言置之盛唐詩內皆絕妙好詞也
 昇平故事自古罕傳足為
 詞林程式故摘錄於此

晚過尙湖

濛濛濕雲昏冉冉涼月吐扁舟向湖波前涂渺何處疎鐘來遠山野火出深樹賓鴻下蒹葭颯沓秋氣暮
 沙寒不見人柔櫓烟中去

熱河懷人詩五首

王公直禁廬歲歲侍獮麋自參滇蜀軍九載歷蠻徼豈惟策勳奇詩文助雄稟昨赴豫章城派振西江調
甫德

鴛湖有一老文苑擅三絕早歲客平津關塞陪車轍閒中談往事酒酣並耳熱余亦慟西州流光感電警

先生客蔣文恪公所每以隨輦同至塞外余於己卯歲官
 中書亦陪文恪公至木蘭嗣後文恪即不復扈蹕矣璋石

河間著作才輿志資編纂初登詞苑班即備屬車選庶常扈從熱河始於先生暨
 錢竹汀以方創輯熱河志也踵事逮末儒依類訂成
 卷餘義在引伸匪曰誇證辨余承先生後增訂熱河志體例一遵原書惟辨老河之非即白狼水黃河之
 非即饒樂水中京長興縣即在大定府城內諸條為前書所未及晚嵐
 錢君桑梓人研席共齟齬踵武向承明依舊魚同隊當君遊塞時惜未聯征轡想像訪遺碑手剔枯苔翳

學士隨蹕來。黌宮值新建。煌煌舍菜儀。几筵侍親盥。文聲翔塞垣。典故具詞館。合有雅頌音。矢詩逾樂泮。

馬伏波銅鼓歌和夢文子夫子

我聞軒轅始作桐鼓曲。靈夔驚鳥張軍容。夏足殷楹遞更變。用供祭祀兼兵戎。周禮鼓人掌六鼓。和以鐸。錡。鐃。鏡。鐘。路。鼗。提。晉。辨。等。級。要。貴。立。動。昭。豐。功。漢。初。樓。車。製。更。異。軍。門。鼓。吹。傳。雄。風。離。牛。坎。馬。各。有。用。茲。獨。奚。取。銅。山。銅。相。傳。得。自。漢。馬。援。駱。越。遺。器。來。南。中。想。當。交。阯。初。叛。日。蜂。屯。蟻。聚。揚。軍。鋒。朱。鳶。駱。將。恃。雄。勇。寇。嶺。外。窺。城。墉。瓊。書。朝。下。伏。波。印。副。用。段。志。兼。劉。隆。平。生。慷。慨。負。大。志。據。鞍。顧。盼。鳴。雕。弓。徑。從。滄。海。趨。浪。泊。樓。船。百。道。壓。艤。幢。斷。崖。暫。暑。控。萬。疊。幽。箐。杳。鶻。迷。千。重。飛。鳶。作。隊。下。墮。水。黑。雲。四。塞。天。濛。濛。金。溪。穴。深。深。不。測。親。率。戰。士。當。其。衝。九。真。遺。賊。悉。蕩。滌。日。南。合。浦。風。烟。通。申。明。漢。律。示。約。束。紛。紛。向。化。輸。蠻。寶。分。茅。嶺。外。定。疆。界。插。天。銅。柱。標。寵。崑。轅。門。晝。啓。獻。方。物。負。戴。絡。繹。來。獐。獐。大。圍。兩。肘。高。四。尺。非。刁。非。斗。非。金。鋪。昔。時。廣。州。始。鑄。此。良。金。上。齊。歸。陶。鎔。千。鈞。重。器。一。朝。就。尅。晨。置。酒。陳。殮。饗。中。庭。高。懸。貫。四。耳。曉。暎。下。射。光。曠。曠。溪。獠。峒。虜。各。奔。赴。項。髻。斜。插。形。鬚。鬆。金。銀。釵。股。競。扣。擊。半。醉。徐。起。歌。嘯。嘯。花。腔。盧。沙。相。間。作。用。以。報。賽。祀。祝。融。一。從。遠。輸。人。漢。室。捆。載。萬。里。馳。花。驄。歸。來。擊。牛。勞。將。卒。鑄。爲。馬。式。煩。良。工。儀。帛。諸。家。備。骨。

相黃駝赤驥高纏駟。工成獻自宣德殿。封侯裂土相始終。何爲此鼓獨未毀。鬼神呵護留炎封。蠻烟朝迷色閃閃。瘴雨夜洗陰雲。驚灘亂石露光怪。白日倒貫普江虹。神物沉埋閱千載。何時却出荆榛叢。氈包席裹致吳下。縵文隱苦花濃。面平腰束下無底。碎乳四散排玲瓏。蝸涎剝蝕備諸狀。瓜皮沉綠丹砂紅。惜無龍螺刻籀篆。豈假饕餮圖姦兇。蟾蜍大小拱左右。識凹款凸中虛虛。雲雷有象間絡索。班班古色盈簾櫳。羊鼎虎彝失貴重。珠盤玉敦羞尊崇。硯山堂中遠塵俗。插架文史羅三冬。巍然此鼓列座右。摩挲拂拭光熊熊。革匱十重巾十襲。聲價不數珪璋琮。我來入門望寶氣。遙見突兀虛廊東。桐魚作桴一奮袖。噌吰鞞鞞驚羣聾。疾雷殷天走霹靂。陰霧覆地趨鸞。連葦輕輿互較轆。快劍短戟爭撞搗。鼓聲震堂堂欲動。似有萬騎奔峒峒。三搗忽停衆響寂。元天仰視高穹窿。狂歌擊節自起舞。令我懷古心忡忡。蠻夷叛服本無定。控御有道歸君公。自從漢家事遠略。喪師失邑無終窮。先零種落居內地。遂使邊境交矛鏑。匈奴二庭及西域。出沒晝夜頻相攻。懸兵迢遞出徼外。飛芻輓粟勞輸供。賴有名將如援輩。相與戮力垂勳庸。惜哉五溪復猖獗。壺頭病困何匆匆。牀前豎子起蜚語。朝宁誰復知孤忠。文犀薏苡事莫辨。矯首耿耿悲填胸。男兒要當志邊野。裹尸馬革真豪雄。卽今西陲諸部勁。秋深牧馬遙傳烽。登壇授鉞遣將帥。旌旗千萬摩蒼穹。陣圖堂堂控蛇鳥。營竈纍纍連蠓螾。金笳鐵角數聲動。士如猛虎駒如龍。遙聞疆場新戰捷。露布已達明光宮。便當捲甲趨絕漠。一鼓直掃龍庭空。區殫域滅始返旆。勒銘夜削青芙蓉。叩關款塞集君

長黃支烏弋咸來同軍中鞞鼓靜不震。五金銷盡歸春農。辟雍簾業振文教。靈囂奏處聲逢逢。千秋青史紀偉績。夫豈不如嬰樂翁。

天台山歌送沈歸愚夫子

天台山高峙吳越。層峯隱現開靈闕。鳥道斜連谷口雲。龍湫暎徹巖前月。赤城拔起何巖嵒。紫霞明滅金芙蓉。靈氣蟠結雄南東。上帝賜與神僊宮。陰厓遠通一線日。絕壑橫臥千年松。盤盤鐵鎖不到頂。但見飛梁峭壁縹緲懸空中。先生本是烟霞客。解組歸來樂泉石。選勝還升陶令輿。探奇更蠟謝公屐。金箱常貯真形圖。輿酣奮袂尋僊都。螺溪幽溪路窈窕。葛嶺察嶺峯模糊。身倚千尋梯。手持九節杖。捫蘿直躡層霄上。白鳳青鸞倏有無。朱幡絳節時來往。微茫滄海水一杯。南瞻雁宕青崔嵬。石梁中斷雙崖開。白虹倒掛奔晴雷。珠簾千層匯玉鏡。石筍萬仞懸瓊臺。松門之西敞靈境。居慶切兩袖天風浮絕磴。斷猿哀鳥左右啼。瑤草淒淒滿幽徑。白雲自散春巖青。氣躡隱乘風行。仙源一別三千齡。碧桃花落寒泉清。層樓十二開瑤京。洞中玉女相逢迎。金漿石髓遞相勸。浩歌一曲凌蓬瀛。烟巒如此堪棲託。笑我天涯空寂寞。採藥僊源路不迷。十年忍負山中約。翠壁丹梯西望遙。何由相伴陟崑巒。惟餘華頂三更夢。遠逐錢塘一夜潮。

消寒第三集遇雪用東坡聚星堂雪詩韻

吾生量怯三蕉葉。不飲還愁負新雪。酒人絡繹隔巷來。把臂狂歌正歡絕。凍輝緣隙紙牕明。幽響墮階冰

柱折那知漏鼓寒。易沉但覺鑪灰澹。將滅此時興。酣一起舞。空地重簾手自掣。空庭風捲白皚皚。銀海光搖亂。醉纈枯腸熱。後欲森芒。妙論參來快。鋸屑惜惜促。坐戀今宵。清景明朝去如瞥。掃庭任招僮僕。噴占瑞宜有老農說。歸來支枕續斷吟。翠被生稜冷於鐵。

曉起雪未止復用前韻柬同人

孤鐺吹火煨濕葉。老屋沉沉閉深雪。同雲侵曉未放晴。佳客不來車轍絕。階前瘦石封漸平。壁上虛絃凍將折。長天一日鏡光遙。幾點浮烟自起滅。喜無野馬近簾飛。時有飢禽爭樹掣。玉妃姿態本天成。不逐濃妝鬪紅纈。迴鸞忽作打腮聲。寂坐閒齋聽騷屑。只愁皓潔難久留。優鉢空花付一瞥。冰甌淪茗太酸寒。風味莫與麤人說。聳肩忍凍發長吟。隔戶丁冬響檐鐵。

雪霽後同人各以聚星堂韻詩見示疊原韻奉酬

遙天斑駁開雲葉。屋角初陽爛晴雪。長鬚剝啄遞詩筒。雒誦臨風各工絕。巷南巷北盈尺泥。欲往還愁屐齒折。喜將妙句當深談。一段清緣難泯滅。柔情不學眠蠶僵。健筆偏驚老鳳掣。忍寒高詠亦足豪。那羨舞茵圍繡纈。京華幕節臘鼓喧。餽歲往來事瑣屑。吾儕作達須及時。激電年華一轉瞥。拍肩命盞歡可尋。又手圍爐話重說。吟成火急遞飛箋。要乞靈丹與點鐵。

再用前韻催同人和作

軟塵海裏萍聚葉。各有雅懷鬪冰雪。崢嶸歲晏課新詩。矮紙書成倍清絕。按節狂歌銅鉢敲。當場醉舞綸巾折。消寒排日泥傳盃。題壁淋漓迹未滅。扶輪巨手推數公。座上驪珠讓先掣。伊余雕刻慚小才。譬若爲花剪碎纈。陽春高唱發聲遲。下和巴音知不屑。由來清景難重摹。樂事賞心總成瞥。閉門定想苦吟勞。開徑還期情話說。偶然摩壘輕致師。莫笑空拳無尺鐵。

同人各以疊韻詩至仍用原韻賦答

新詩工似雕楮葉。合有幽蘭儷白雪。連朝絡繹送蠻牋。硬語盤空何警絕。共知僵臥吟倍豪。那怕苦寒骨欲折。髯公賓從誇汝南。文酒風流未澌滅。友朋勝集古今同。依舊詩壇旌旆掣。傾來寶篋皆琳瑯。織就雲機盡綺纈。撚髭擁鼻足清歡。錦帳羊羔真猥屑。苔岑臭味托心知。石火光陰隨眼瞥。松爐灰煖栢盞香。餞臘咬春有成說。相期倡和過殘年。聲應真同方響鐵。

讀同人聚星堂韻詩各有聚散之感仍疊原韻

冷吟相和蟬抱葉。冷宦相尋鴻印雪。長安聚首多素交。文字招邀真勝絕。胸中塊壘澆易消。腕底鋒芒運難折。新篇落紙盡珠璣。貯向奚囊未磨滅。深爐急盞送殘年。赴壑驚蛇不可掣。歲寒共矢青松心。羞與凡花鬪春纈。卽今幾輩各分攜。三徑人空更酸屑。舊游裙屐漸飄零。游水東流日西瞥。題襟集在期互編。剪燭緣慳忍重說。中年哀樂慣傷情。狂歌擊碎如意鐵。

消寒第四集復遇雪仍用前韻

空中翦水成花葉。送臘連番飛快雪。天公有意助清娛。玉戲縱橫最奇絕。廣庭縛帚掃復盈。老樹連巢壓將折。吾儕文酒有夙緣。肯學灰心斷生滅。衝寒踏凍疲馬嘶。薄暮打門亂雅掣。相逢似跨白霓來。要借芳醪生面纈。閒翻松炭添篆烟。自揀茗芽煮冰屑。夜深不厭捲簾看。作態迴風尙飄瞥。詩情詎待驢背尋。賦筆須從兔園說。漏沉燈煇客告歸。冷逼茸裘如擗鐵。

對雪復用前韻柬同人

空林一夜飄瓊葉。門巷蕭然封凍雪。滿牕虛白映殘書。獨撚冰髭伴幽絕。日光穿瓦相澄鮮。風勢壓籬半倒折。焚香捲幔望轉清。著屐下階痕不滅。眼前萬族各有營。鸞鳩低拾鷹高掣。浮盃越酒綠生鱗。出窰唐花紅吐纈。擁爐兀坐是孤懽。那遣閒愁感羈屑。食前五鼎車八駟。富貴徒供眼斜瞥。玉壺世界隔塵喧。惜少吟朋揮塵說。枯腸搜句耽寂寥。寒硯頻呵堅似鐵。

雪後得王惺園開學書卽用前韻却寄

去年煖寒傾竹葉。夜閣招邀賞初雪。當筵八詠創新題。去歲與惺園同賦雪中八景刻燭爭傳句超絕。苔牋半幅手自書。腕力生稜斂股折。越燕兩地忽分襟。妙蹟弄藏未漫滅。蕭齋清景故依然。獨惜流光如電掣。君今擁傳握文衡。老眼寧愁花眩纈。情懷映月湛冰壺。咳唾隨風霏玉屑。吳山雲樹浙江潮。天末空勞遠望瞥。冷吟

聞醉定誰同。離緒茫茫不可說。梅花想像賦新成。漫道廣平心似鐵。

章江渡頭船一葉。秋水涵天浪如雪。與君分手向江邊。今秋借惺園典江西鄉試惺園即視學浙中以九月二十一日別於南昌城外祖帳驪歌

最淒絕。燕臺南望路超遙。惜別經時心欲折。朝來貽我雙魚函。懷袖摩挲字不滅。十年仙籍舊同登。瀛海靈鼈讓先掣。宵歸院燭照金蓮。曉起宮袍擁紫纈。西牕暇日互招尋。四座從容聽談屑。竹林把臂憶風流。良會匆匆眼空瞥。相思命駕定何因。昔款還從書素說。莫嫌蹤跡易睽離。結契終應比磁鐵。

泊觀音門寄王德甫錢曉徵

風雨青溪渡。會同抱被眠。寒江今夜月。獨上白門船。樹色三山遠。潮聲九派連。酒闌一長嘯。哀雁落雲邊。

秋夜

涼月照高柳。草堂夜氣分。斷鴻空際度。清磬靜中聞。葉落全疑雨。池荒半是雲。彈琴不能寐。蕭瑟感離羣。

寒山

孤磬出林際。空山獨到時。鳥聲新雨霽。松影夕陽遲。落葉留青嶂。寒泉響碧池。何當繼高躅。棲隱向茅茨。

楓橋舟次

楓落東塘路。星河澹碧天。殘鐘烟際寺。遠火月中船。古驛啼烏後。寒山斷雁邊。忽聞歌水調。蕭瑟不成眠。

卞忠貞墓

內史徵兵急。陶公赴救遲。江山多難日。甲冑致身時。碧血魂猶怒。青溪事可悲。冶城松柏路。風雨捲靈旗。大義推溫嶠。清言笑阮孚。重泉猶握爪。八口共捐軀。斷碣荒苔蝕。靈祠落日孤。石城忠孝並。千載有司徒。

懷土德甫錢曉徵

青溪歸櫂悵離羣。禪榻茶烟夜漏分。白露爲霜人乍去。碧天如水雁初聞。三秋客思憐王粲。十字詩名數仲文。準擬蘇臺重話雨。支筇踏遍洞庭雲。

渡江

澄江如練客舟輕。遙指金陵一日程。楚水亂帆時近遠。吳山殘雪半陰晴。濛濛浦樹烟中出。點點沙禽望裏明。無限南朝興廢感。寒潮空到石頭城。

妙嚴公主拜輓

早謝椒塗習唄音。琉璃地上足趺深。生塵不學凌波步。入石偏符面壁心。合向花龕供拂拭。未隨蘇砌付消沉。九蓮明孝定太后曾取入大內復送還寺異代同禪契。長護芳蹤到梵林。

澄江使院答陸青來卽次原韻

小邑猶傳楚相居。空江半壁控南徐。論交喜稅塵中駕。譚藝閒緝篋裏書。冰泮曲池芳草長。雪晴官閣早梅疎。最憐三十三峯好。日日開簾對碧虛。

梁溪道中

芙蓉湖上送行舟。短柳依依滿渡頭。綠水長隄遊客路。青旗小市酒家樓。雨中樹影參差出。烟際山光淺淡浮。回首故園寒食近。天涯日暮引離愁。

題王岡齡新居次韻

一徑初開仲蔚居。雲林清興更誰如。風潭好聽滄浪曲。月几時披笠澤書。戶繞綠蘿添穉竹。坪滋青甲摘新蔬。詩禪畫偈風流在。攜屐頻過野外廬。

韓莊

碧沙萬頃遠烟微。洲渚蕭條釣戶稀。日出神鴉迎櫂舞。風高孤雁掠帆飛。水流王氣連豐沛。山擁晴光入海沂。搖落不堪逢暮節。高隄官柳漫依依。

西苑春望用王德甫吳冲之韻

鴉背宮雲澹不流。蓬山佳氣曉來游。沙邊暗渚通魚籓。樹裏明霞隱鳳樓。尺五天低分勝地。重三節過趁芳遊。依稀憶得江南景。幾陣香綿撲渡頭。千條柳色亞紅闌。步履探春春未殘。曲沼水平三尺漲。芳隄花殿一分寒。風前競載青絲榼。葉底徐調碧玉鞍。不厭閒來頻拄頰。西山濃翠在林端。

韋曲修禊之會以風雨不果賦詩二首志悵并邀諸公同和

上除風景待招尋。聯轡宜過曉郭陰。聽雨聲從殘夢覺。惜花情比憶家深。浮盃枉渚虛高會。穩几閒窗付冷吟。漲遍華嚴川畔水。握蘭何處濯芳襟。

油雲隔斷曙霞紅。尺五天邊話未通。芳草自遮游屐路。落花空惹鬢絲風。仙源幾曲虛無裏。春信連番曉晚中。贏得履綦多勝侶。嘉辰一樣擘牋同。

恭紀皇上肇建辟雍釋奠講學禮成一百二十韻

軒陛垂衣日。虞廷緇瑟時。道原符一揆。治正洽重熙。保合洪鈞化。從容上聖姿。百王兼損益。一統集君師。巍煥超前代。漸摩訖遠陲。龍圖應出水。鳳瑞夙開岐。載考鬻宮制。言崇國學儀。名先徵米廩。典特備蒼姬。育德歸宣教。明倫溯秉彝。士風膠序起。王迹鎬豐追。共識敷文廣。寧容舍業嬉。夏弦遊藝圃。春誦下書帷。棧樸齊翹秀。菁莪並展猗。奏公於樂詠。翼子厥謀詒。俊造升由此。明和義在斯。昔曾傳雅化。今幸值昌期。府事歌惟絃。工虞慶允釐。握符參昊緯。布德偏黔黎。景緒恢前烈。康功救百司。綏猷臻秩秩。建極倍孜孜。闡渥垓紘浹。威稜傲塞馳。巡方臨澤國。問俗到農菑。軌順宗河曲。瀾恬巨澗湄。拓疆通版索。藏富裕茆茨。祕閣全書奉。奎章御集攜。天文昭倬彼。聖德懋祇台。妙協從心矩。深籌復古規。成均洵首善。起化有深裨。四學稽周舊。三廳陋漢遺。明堂稱莫辨。太室號非宜。左右分形異。方圓聚議滋。鴻都書漫集。虎觀典空禋。

縱有浮文飾。何關大道仔。循名期化導。責實愧平治。自立燕都監。猶虛璧水池。崇儒逢聖化。典學企文思。所貴功能創。寧虞制久虧。滌泉盈自足。修綆汲非遲。道統光虞夏。心源接昊羲。識惟歸獨斷。工不待疇咨。爰詔司空建。仍頒內府貲。庀材羅白石。鳩役給朱提。巧引璇源派。寬涵學海漪。旋邱流四繞。象島水中坻。崇殿巋然立。平臺屹不欹。虹梁排蝮蝮。鴛瓦復琉璃。金碧輝瓊牖。丹青麗繡栢。繽紛凝秀藻。鞞鞞映芳芝。四面齊開闔。千尋自亘槐。清嚴森黼辰。洞逞儼罍罍。映碧燭埃塏。迴環抱渺瀰。文瀾來有本。聖澤匯無涯。似砥分塔城。連雲接棟榱。經營占定室。揆度集般倅。教胄嗤梁武。從公隘魯僖。落成昭御記。維誦仰宸詞。制度甯沿襲。淵源泯合離。折中歸正大。取象協崇卑。赫赫鑄豐碣。煌煌煥巨碑。勤倦垂至訓。締造溯不基。典本殊羞者。儀休混養耆。父兄難比事。更老足傳疑。未許鋪張甚。終餘傳會嗤。說祛千載謬。天縱一人知。歲應旃蒙籥。祥開大衍善。億齡增帝秩。五世茂天支。恰值曾元會。彌欣福嘏綏。綿綿榮翠甍。翼翼衍金枝。鳳詔元辰沛。鴻恩溥海彌。官僚頒誥綵。岳瀆薦香匜。啓讌還繩武。臚觀廣錫禧。彤宮羅綺席。鈞庀列龐眉。矍鑠同扶杖。聯翩各捧卮。華筵情衍衍。壽宇樂怡怡。淑景陽春滿。韶光仲月推。瀛洲萌細草。太液渙輕澌。報社先翔亂。遷喬乍轉鷗。濃脂桃暈萼。淺黛柳抽絲。翠律重迎節。青旛漸暖颺。上丁行秩祀。先甲致齋祇。掌故修宗伯。章程飭奉祠。習容何肅肅。觀禮到祁祁。鶴立聯簪綬。鳧趨接履綦。告充陳粗榘。蠲潔列盂齋。省視周卿尹。供張屏隸斯。玉鸞星鳳駕。銀箭夜何其。曉漏速留點。朝陽未展曦。鈞陳嚴鹵簿。禁鑰啓葳蕤。

屆候洪鐘動。凌晨綵仗移。明燈方引隊。曙色欲開烹。子佩還馳道。儒冠跂廣達。祥烟籠瑤蓋。瑞雪導華輶。陟降容皆中。明禋志自持。黃流盈玉瓚。白粲阜明粢。奏管音諧鳳。鳴球典命夔。精誠瞻秉鬯。博碩助陳犧。禮樂看隆備。神人共宴饗。馨香升普淖。儀物會琴麗。講席當陽敞。琅函乙覽披。緝熙彰聖極。行健闡乾維。穆穆倫常具。昭昭晷度垂。功惟存敬止。道自契誠之。徵鼓來踰濟。握衣效肅愷。敷言宣御案。髦俊跽彤墀。盡簪愚蒙聽。難攄淺見窺。牖民真孔易。覺物本無私。翠蹕初旋軫。珠纓尙綴旗。喜看花六出。先卜麥雙歧。命以重申布。恩從百爾施。匪頒均示惠。式晏並宣慈。解額加增廣。官聯錄等差。尙方陳綵幣。儀部具珍醴。慶鸞偕驥首。醴膏盡浹肌。雍容三代禮。保定九如詩。自顧材齊櫟。惟知悃矢葵。觀光陪近侍。拜獻媿先資。忝與分茶賜。榮叨珥筆隨。延洪誠樂只。盛典足昭茲。紀燉音徵雅。敷疇福備箕。庶颺逢景會。抃手頌春祺。

恭頌皇上東巡盛京上陵禮成百韻

并序
代作

乾隆四十三年。歲在著雍閏茂秋七月。聖駕出山海關。邁瀋陽。恭謁三陵。紹聖祖之家法。追懷列祖。繼世垂統。萬年啓佑之成。蠲吉戒塗。經行內地。不行圍。不筵宴。却高麗。扎薩克諸外藩之朝賀。鑾輿肅穆。其帳不移。忝徒無擾。于以省方觀民。廣補助之仁。舉懷柔百神之禮。太常藏事。大孝光昭。甚盛典也。小臣江鄉下士。恭逢皇上龍飛首祚。曾應博學鴻詞科。乾隆十六年。復薦舉經學。自惟學術舛陋。佔畢無成。由直隸河工丞倅。薦陞府道。奉職閩滇。旋以軍需冊籍罣誤。降調。遵例捐

復茲當赴銓之時。恭遇法駕時巡。隆儀載舉。孝思維則。曠越三古。臣不勝揄揚大美。形容盛德之思。又憶五年前奉發雲南。蒙恩召見。溫語垂詢。臣尙能作詩文否。臣今年七十有三。雕蟲末技。結習未忘。瞻就光華。遙睇珥筆侍從之班。夙乎天上。不揣荒疎鄙陋。輒賦五言百韻。叩獻行在。恭呈乙覽。山雞舞彩。儀鳳羽以何年。小草傾陽。効葵衷於此日。臣無任激切屏營之至。謹拜手稽首而獻詩曰。

宗國星畿左。興京遼海東。中天開王氣。奕世襲淳風。弓劍三陵思。山河百戰功。撫時紆永慕。追遠展純衷。孝治光天下。恩膏徧域中。睠茲根本重。稽古典章崇。月出衣冠舊。時巡律度同。燔柴喬嶽峙。奠璧翁河漑。俯念勞民吏。遵途指鎬豐。柳邊停宿帳。碣石記郵筒。水土涼汀便。炊烟蔀屋饒。子來爭汎掃。市集靜喧呶。先甲頒明詔。新秋啟玉驄。和鸞來迤邐。長白望嵯巒。星宿環黃道。烟嵐夾翠隴。巍巍峙龍虎。肅肅守靈籙。玉瓊馨遙薦。珠邱氣自蒼。綿瓜徵繹繹。黛栢列芄芄。展拜橋山下。深惟創業隆。十三戎甲奮。千億帝圖維。應運開堂構。乘時蕩祲孽。義旗揮日耀。雷鼓震天籟。赫矣思謨烈。佳哉望鬱葱。薰蒿動悽愴。靈爽儼矐矐。馬汗猶流石。龍髯不挽弓。風雲長共護。霜露罔時恫。締造不基鞏。凝承寶命隆。餘威助神武。大業益昭融。遠定濛池部。旋除荅徼兇。髦頭掃星燄。亥步極天幃。競引梯山索。頻浮度海舡。龍荒恢版籍。雁塞闢耕墾。玉帛九垓會。車書萬里通。殊勳歸默佑。遺澤衍龐鴻。拱極峯形遶。朝宗水勢淙。祥輝晴縹緲。雲氣曉沖融。

鍾毓傳靈寓苞符翊聖躬精神通沕漠治化契鴻濛紀運長開泰占年屢告豐八方徵輯睦萬姓鮮瘖癡
弭節遵周道留都啓法宮時方際熙皞念益秉謙冲綈服去雕組茨檐謝璧珥不煩賀鶴鰈奚取獻豨豨
寶賚辭藩服笙簧罷瞽矇暫教停晏饗盡遣戢戈冔旋蹕商辰肅懸郊旭日彤扶桑延曉曙若木耀晴空
關勢雄巉巖溟支抱潰泓霏英凝浩露爽籟拂高颺巨浪恬澄練明霞絢綵虹碧霄鴻送唳蓬島鶴開猱
向是神仙窟今爲雨露叢村村收棗柿處處足葵菘築圃登新稼盈場記束稷溝塍紛綺繡礪壑響玲瓏
疊岫浮濃翠輕塵簇軟紅珠囊光奕奕玉燭照熊熊法祖真緹武臨民每達聰乾行周不息兌澤沛無窮
喜洽謳衢子歡生擊壤翁農歌溢阡陌帝謂接崆峒微賤慙臣質生成托化工經纒貽祖父志卽立孩童
砥行希原季虛聲媿賈終制科叨薦剡賢榜隔飛舄素抱常傾葢生涯類轉蓬防河爲小吏負土竭愚忞
所幸邀綸綵真看脫鞵籠七閩紆印綬六詔駐車輟治仰東西漢賢師大小馮詩書化椎魯牒訴息隴江
地產稱殷富人情率愿侗最宜宣德意相慶靖邊戎盈縮籌軍糈辛勤問鞠窮機絲嫺熨女甌粟饜蠻僮
僮俛期無數馳驅急在公涓埃虛報効文籍坐迷惘鑄級原非枉歸田詎有痾未甘儕散櫟猶是戀宸楓
自揣年非壯兼愁智復憊之無字粗識亥豕誤能攻欣遇文明代宏搜典冊藁冀分藜閣火勝縮虎符銅
咫尺天顏近汪洋聖度洪矢音聊見志發覆願披忠祇自耽蟲篆何曾識豹懿庶幾清問及萬一下乘充
寒意同枯柳清音出爨桐珠光借魚目鴛鴦策霜鬢荆璞憐三獻羔皮飾五綬遙瞻雲紉縵欣迓鬱瓏瓏

至治昭巍煥。元音覺贖聾。敢言供著作。祈與牖顛蒙。重趼隨班馬。長吟等砌蟲。十年濡賦筆。百韻上詩筩。祝擬籌添海。呼宜響效嵩。迎鑾方濟濟。抱悃轉忡忡。葑菲如堪採。稊糠實待龔。擊轅呈里曲。翹首望高穹。

覺生寺大鐘聯句

華鐘鎮祇園。曹仁廓然容萬斛。佞佛成祖營。青浦王役徒少師督。激電移歲時。上海趙文傳燈閱涼燠。探

勝據遠懷。南匯吳省趁閒討遺躅。車遲會城阿。江寧嚴長寺聳大道曲。豐碑蛟螭蟠。平湖沈巍座龍象蹴。

周遭庖廡。上海陸錫錯立枯松榭。駸薛鋪城塔。仁倒茄麗樓袂。威神屏方良。初怪偉圖忽僚。流鈴夏郎

當。文法鼓震塗毒。繡繒內家旛。省琳笈中禁軸。幽響飄迦陵。長妙香散篤耨。眈眈廣院呀。初屹屹岑樓轟

鼇柱擎坤維。錫雁堂仿乾竺。風櫺亞差參。仁露棋盤歷碌。上枕腰彎環。初綠壁脚刁子。蟻穿窬以深。文螺

旋往而復。趨趨筍簾橫。省帖帖蒲牢伏。其圍四尋餘。長厥徑三仞足。重八千衡贏。初高十六尺縮。積石儲

糜困。錫量祛越方幅。頂同孟體圓。仁身作鏡光煜。辨名殊重唇。初取象類大腹。排纒饕餐蹲。文介冢虹蜺

束昂俄夔首撐。省瑣碎虬紋簇。哆張陋釜鷺。長雄踣喙蕭鬣。有銑兼有鉦。初非錔亦非錫。中懸廬肖穹。錫

下覆室成覆。熊熊景常歛。仁黝黝色轉沃。烟煜湧帝青。初繚繞暈官綠。含霜九芒寒。文炫日五采昱。鋒棱

沙畫錐。省縵理錦交縷。重爲遶匝行。長共作迴環讀。華嚴緋寶函。初般若譯珠積。品經貝葉傳。錫真偈蓮

花續體變盧佉文。仁語想釋伽囑。蠡紐危自垂。初鯨桴怒相觸。雷音走隆隆。文麗韻汜謾謾。應大昭小鳴。

省中左羽右喙。豈立號立橫。明長乃滿阬滿谷。日動氣必宣。初維空聲斯蓄。警宵分雞籌。錫報午聞魚粥。旅

魂感恫悼。仁山鬼拜蹕跼。大地咸震醒。初諸天正清穆。聲聞豁塵襟。文喟息稽故牘。主鬯藐孱孫。省操戈

恣悍叔。時方息龍爭。明長事忽符燕啄。腹心寄齊黃。初羽翼剪代蜀。葛藟忘庇根。錫椒聊使盈劑。啓疆假以

權。仁睨器求所欲。連營諸將驍。初入幕一翁禿。讖誇瓦墮空。文計詭壁藏複。飛鸞韞脫鷹。省跳突原走鹿。

歌風北方強。明長占繇南國盛。臨江勢已成。初割地議空瀆。郭門喧征犖。錫陵闕閃戰轟。宮中傳披緇。仁殿

上儼受籙。周公輔誰欺。初和尙誤難贖。紀年付革除。文鉤黨窮訊鞠。著緋衷刃趨。省要經投筆哭。跽呼冤

哉烹。明長狼籍弱之肉。株連榜姓名。初羅織籍家族。兩仗修羅宮。錫列鋸波吒獄。孰雪重泉窓。仁莫逃一字

惡。魯弓假不歸。初周鼎遷重卜。鑄鐵悔六州。文貢金來九牧。象功愧和平。省懣禍懲殺戮。大慈見應噴。明長

宏願持較篤。濁劫經刀兵。初道場會水陸。咨考工庀材。錫命將作救屬。銅調牝牡和。仁火扇文武熔。製器

僱工能。初揮毫學士獨。一磔復一波。文三薰更三沐。幅整資臨摹。省環圓試鏤鑿。搏泥外渾淪。明長化蠟中

滲漉。封冶長庚監。初開鑪太乙矚。瀉液凝碧烟。錫騰輝燦朱旭。咒鱗降蜿蜒。仁封蚌塾殼棘。審音析毫釐。

和中度辨黍粟。雉梁高引絙。文飛架圓轉輓。大衆謹譖揚。省萃靈駭馳逐。漫將殺魄招。明長而使陰魔服。解

脫驅二災。初祈求迓百福。真諦參每煩。錫善根種非宿。是爲有漏因。仁詎稱無重祝。縱依淨土安。初終俾

吉金辱。疚心積孽多。文彈指流光促。沈埋痛瓜蔓。省倉卒報榆木。十朝舊物貽。明長萬壽崇基築。明代是鐘

本貯大內

後移漢經廠萬歷五年建萬壽寺於西直門外移賜出從紫閣初移來近蒼麓聽周釋界千錫撞選僧彌

鐘於寺日俾六僧擊之見野獲編及帝京景物略

六喧寂任禪緣虎廢興易世局鴛舍藏至今初虎分禁自夙鳴鐘遂臥鐘于地見燕京游覽志不宜地隨毫

社遷哲世閱秦灰速啞棄堆泥沙欽價眠蔽樸橄剋苦過客塵明擲礫游童扑代已變滄桑初物仍寄輦

穀流傳四丁訛燕邱紀聞云是鐘鑄造及徙置萬壽寺年月日時皆四呵護六甲肅景運逢轉輪仁昌時

協調燭提唱通人天初秉持徹道俗闡法開化城哲棲真榜靈囿挽以千馬車欽貯之萬鱗屋奏殊辟雍

叢長陳擬房序玉帝臨星罕移初聖作奎章燭正覺發顛蒙錫多生遂熙育仁水源功德滋初雲氣吉祥

郁文毋愴憑弔情且暢登臨目長新詩如叩莛初用補春明錄錫

顧震

字葦田錢塘人乾隆二十二年召試賜內閣中書二十六年成進士官至刑部員外郎有一得齋詩

稿

蒲褐山房詩話葦田能詩尤工書法極為梁文莊公所賞
丁酉科充江南副考官與今石菴相國同事號稱得人

湖灣種魚圖爲朱青湖賦

南湖水綠春雨初春波活活涵菰蒲潛鱗作隊自踴躍揚鬣鼓鬣相吹噓漸看和氣滿大澤水蟲懷子占多魚覆巢殺胎傳禮經意豈獨貸漁人漁漁人生計良獨殊浮家泛宅一葉如長竿大網意未足更有筌

留翼罽罽與眾攔截中流若環堵。鳴榔鼓柁窮朝晡。一寸二寸粥於市。腥風涎雨充庖廚。我嘗當食投箸起。可憐堆盤疊疊踰蟲蛆。暴殄天物古所戒。況復剝腸剖腹奚止千萬餘。魚生分台供刀俎。惜哉胡不寬斯須。古來畫工多好事。但繪溪山漁樂圖。漁家樂兮魚族泣。大小得失分錙銖。青湖居士寄興遠。不向烟波稱釣徒。買得魚苗種湖水。資其欲富師陶朱。祝渠永離網罟厄。子復生子或有蛟龍儲。我來披圖一軒渠。悠然想見魚樂乎。相看時作種魚想。生意滿懷魚滿湖。

看菊和申拂珊少京兆

移得東籬菊滿堂。招邀裙屐爲花忙。曲屏護處香彌冷。細竹扶將幹不傷。插鬢任看風落帽。捲簾尤愛月窺牆。休疑昨夜寒颺急。此卉由來是傲霜。

吳玉綸

初名琦。字廷韓。號香亭。固始人。乾隆二十六年進士。官至兵部侍郎。降編修。有香圃詩鈔。

過函谷

雄勝稱天險。乘春事遠遊。千山關函谷。一線入秦州。烟雨愁鞍馬。風沙滿驛樓。計程無幾日。萱草可忘憂。

華陰道上

嵯峨飛度碧雲環。百二雄封指顧間。白帝降精凝華嶽。黃河倒影射潼關。秦州車馬勞孤客。楚國風花改

舊顏。此去曲江亭上望。春波泛處浴鷗閒。

山下晚行

谷口無人野逕斜。秋風蕭瑟感年華。四山落葉亂飛鳥。萬樹遠松明夕霞。屢聽霜鐘尋古刹。擬沽春釀問誰家。歸來巖畔寒星掛。倚杖空林數暮鴉。

秋閨怨

龍沙今夜月如何。香霧雲鬢怨綺羅。一段別愁君記取。玲瓏畫閣夜涼多。刀頭有約事全非。斷續砧聲雁早飛。落日胡笳秋色冷。塞垣何處寄征衣。

李文藻

字素伯。號南礪。益都人。乾隆二十六年進士。官至□□知州。有恩平潮陽桂林諸集。

蒲褐山房詩話。素伯窮經志古。肆力於漢唐註疏。以粵東縣令。游陞州牧。引見來京。聞余有惠氏易漢學諸書。至余寓舍。借鈔大暑中漫膚多汗。沾漬衣襟。不以爲苦也。詩不多作。亦頗工隱。如觀音巖諸詩。尤爲雄健。惜年未中壽。歿于粵西。其餘著作無可表見者。嘗約其友人周編修書倉。取經史著述之未甚傳于世者。刻爲貸園叢書。而素伯歿其後。遂不能續。今所傳者。止此十二種而已。

觀音巖三十韻

曉至觀音巖。橫舟試屣腳。洞門呀然闢。攝衣闔重鑰。白日忽昏夜。明燈僅微燭。拊楣山鼠飛。唾地谷神諾。屢折迷所向。踏石畏朽索。一竅開絕頂。俯瞰得寥廓。奔瀧圍佛几。來朝萬青嶠。形肖巖不有。獅象龍鳳鶴。

鍾乳當檐垂。旛蓋倒蓮萼。輪困寫毫光。珠玉飾簾幕。造物施供養。萬古無銷鑠。毫柄導我下。具茗半山閣。軒豁遊大廈。息定興磅礴。拂蘚睇高壁。文字爭寄託。韓蘇所未到。此景遂寂寞。再下出洞口。乃見飴山作。南遊爲美莊。川巖入詩橐。磨勒得此三。南山連碧落。恂悅新城篇。片石誰爲鑿。回舟更仰首。萬仞一斧削。絳縵尺寸異。渲染朱綠錯。五丁猶夙聞。何人布丹腹。下有蛟螭蟠。上絕猿猱躍。松桂挂石棧。飛鳥偶附著。對此一長嘯。迥然滿崖壑。卻悔初來時。峭帆疾于鶚。夜夜蓬島夢。年年文書縛。山英留奇勝。及歸踐昔約。烟霞浮篷窗。兒女亦駭愕。行廚問薪米。將爲十日泊。

寄鄧謙持

見說炎方惡。此來殊不然。連山甘蔗地。細雨荔枝天。珠翠羊城市。笙歌艇戶船。紛紛恣清賞。天乞壯游緣。嘉應州

丁橋

風物隨方異。梅州二月天。沿溪鴉舅樹。近郭蜩螻船。山色暮愁裏。雨聲寒食前。還須求老酒。爛醉寫蠻箋。翠鳥鳴沙觜。紅泉轉樹腰。行人將午飯。驛舍及丁橋。筍轎蠻兒舉。衣箱僮婦挑。何人教引灌。辛苦見秧苗。逼除有事澄海

昨宵身世落鴻濛。溪郭山城扁舶通。涼到有聲榕葉雨。綠來無際麥苗風。蠻酋拍水春先滿。瘴果登盤歲

又終。明日歸來須痛飲。屠蘇酌後忽成翁。

惠定宇九經古義刻成寄示周書倉二十韻

紛紛數經義。吳下見顛門。紅豆無凡子。青箱有肖孫。心窮周易奧。化破夏書渾。僞傳成齋粉。多文挾本根。堯年誰與語。魯殿歸然存。亥豕因形識。蟲魚視掌論。障塵憑卻埽。疑獄仗平反。許慎勳同策。丁鴻義最繁。授徒開絳帳。仰屋謝朱軒。鐘鼓宣洪響。鍼砭到病源。直回秦室火。終食孔庭幡。世悟唐儒陋。人推漢學尊。前身應左史。接武或東原。翠軸勞郵寄。花廳快手翻。鬢緣聽訟白。眼到勘書昏。鈔版從蠻微。傳家異兔園。諸生得津筏。絕業在乾坤。聖詔求遺籍。神州貢幾幡。千官品庖饌。四庫盡瑤琨。此帙寧磨滅。煩君獻九關。

嵇承謙

字受之。無錫人。文恭公長子。乾隆二十六年進士。官至侍讀。有一枝直廬使軺蕉雨諸集。

舟行感興

我生嗜山水。一一記所見。昨歸望龍山。如識故人面。澄泉滴寒乳。霜嶺明晚茜。山靈知我思。風雨態屢變。攀躋未踰月。扁舟溯鄰甸。朝陽莅鳳岡。到處復留緬。

奉和弇山中丞前輩東湖翫月元韻

閉門校藝春如夢。微雨生涼夜似秋。綠徧東陽植畔柳。清歌落日快初遊。余以校士至鳳翔。市月竣事。太守田公邀遊湖上。爲竟日歡。

鎖院敲吟憶古仙。照牀明月鎮無眠。桃花潭水深情在。五馬春風小駐年。

蔣雍植

字秦樹。號漁村。懷寧人。乾隆十六年召試。賜舉人。二十六年成進士。官編修。

春草次袁存齋韻

東風作意草芊綿。綠徧郊原又一年。遊興任尋澆酒地。客愁多在賣錫天。曾盤塞北千羣馬。尙憶湖南萬里船。何處銷魂最惆悵。蘼蕪山下夕陽邊。

吳興宗

字繼羣。江南華亭人。大興籍。乾隆二十六年進士。官安徽太平府通判。有記里編。

苧城懷古

不泛天隨宅。誰尋范蠡湖。暮潮隨月滿。漁火隔江孤。蘆葦思窮士。烟波問釣徒。腐儒江漢客。一棹溯三吳。

馮應榴

字星實。桐鄉人。乾隆二十六年進士。官至鴻臚寺卿。

蒲褐山房詩話。星實英敏豁達。有幹濟才。既以江西布政使罷歸。益肆力於典籍。舉人養吾侍御注。李玉溪詩。最爲精贖。君師其意。以蘇文忠公詩注疏。外尙多。遂取王梅溪施輔之查初白諸本。合抄之。以考其是非得失。所探正史而外。凡叢書脞說。可爲證據者。靡不蒐討。余撰金石萃編。載文忠石刻頗多。兼以後賢題跋。君亦攬取之。以爲助。亦可徵其精審已。

題陸璞堂臬使適園灌畦圖

灌園逃聘稱知幾。季世自合甘憂違。東坡種稻拾瓦礫。愍勤亦在投閑時。先生生逢堯舜代。釋耒通籍依形闈。文章政事互彪炳。霖雨方佐深仁滋。忽然繪圖擬學圃。適園取義何淵微。承家七葉植德厚。培溉要使昌條枝。更俾子孫識至味。勿以梁肉忘耕菑。蔽根始可百事做。澤物免令羣生飢。卷端自題屢致意。豈容淺見尋常窺。而我披圖轉悵觸。夙歎陳跡懷京畿。空宅東西初邂逅。平泉花木同因依。余始交先生於邱寓又並出于文襄師門下自從賓館脫粟輟。重感池塘夢草希。我復歸田謀菽水。露芽霜甲貧難肥。仄聞雲間望彌重。清卿典膳增光輝。西江稂莠鋤削盡。旋來吾浙郇膏施。剪蔬雖虛故人召。拔薤已見頽風移。今年蠶花倍告稔。秋成飽飯良可祈。只餘隴蜀惡未刈。崆峒麥熟遑休師。宣房底績並緩報。哀鴻中夜猶鳴飛。願君滲漉普垓壤。無徒自適耽其私。

哭陸朗夫中丞前輩八十韻

白日驚雷震。騎箕信忽傳。悲深湘竹淚。淒絕楚琴絃。未答平生誼。終虛後會緣。才微漸述誅。德備漏言詮。盛壯馳英譽。孤寒奮大賢。機雲推人洛。鄒樂重游燕。孰進王孫飯。曾無子敬甌。高冠瞻獨立。峻骨恥人憐。韓愈書稀上。歐陽鑒最先。公爲家君門下士固知千里足。必遇九方甄。榴官中書公卽薦入樞禁。自後同直宿扈蹕者凡五年。媿我竽吹濫。拜度支遷。汲引勤無倦。迂疎愛獨偏。爨焦勞拂拭。冶躍藉陶甄。

從公武接聯。星廬常並帳。花苑每連韉。健筆凝如鐵。冲懷靜若淵。儉甘公膳飽。暖戀故裘便。下直耽吟誦。

羣書好貫穿。八分家學邃。尊翁虔實先生精五色彩毫鮮。幾載相攜手。同方罕比肩。一麾樓現蜃。三接斗

移躔。雨露從茲渥。冰霜自昔堅。公出守登州。次年東巡。屢蒙召對。由是駁駁嚮用矣。浦珠還郡吐。官燭能宵燃。所至能安堵。寧惟不

愛錢。護真同襁褓。辱但示蒲鞭。信諫言雖懇。平反獄必研。公守濟南。曾力爭一疑獄。為之昭雪。忠看王馭吐。威仰賈帷褰。

西寧觀察。請奉太夫人南歸。即赴任。上為嘉許。改調運河。俾便迎養。歷晉藩。臬均不離山左。鈴略消羣盜。公於王倫作亂時。率屬防守。城籥仍以時啓閉。源流訂百川。公著運

書。恩教依色笑。績更著旬宣。度量涵溟澥。丰標峙岱巔。途方異冰炭。行豈汗腥氈。局以知難退。操因自守

全。萱闈暉欲報。蓉闕悃仍懸。公以太夫人年高。乞養。優詔允准。去有床留壁。歸惟石壓舷。鴛湖隣暫卜。鶴算景長延。謝客

餘羊仲。窮經儼服虔。貴猶親杖履。契益協蘭荃。坐久春風霽。談深夜月圓。慰衰供藥物。候疾問餐眠。公篤

誼。久而孝鳥鳴初急。哀鴻瘼未蠲。故官從特起。優詔為行權。公居太夫人憂時。以河防未竣。特詔奪情。仍任東藩。山左輿歌遍。衡陽

關寄專。單車衡岳雨。襆被洞庭船。列戟門疑水。焚香事告天。自然翔鸞駕。詎待效鷹鷂。稂莠芟畦隴。和甘

被市廛。謨猷垂可久。勳業溯無前。隔朔書曾達。兼旬疾未痊。公於六月朔日。手書寄榴述病狀。且云別有會心。不以為苦。去來原了徹。

往復轉纏綿。妖異徵棲鵬。愁非視跼為。民肥身已瘠。眷厚報寧涓。回首鄉關遠。崇朝館舍捐。舉扶安第席。

占卜罷筮箒。軫惜層霄切。湘藩以公發告。上批諭可惜。悲號四境連。愁遣無一老。盡瘁竟重泉。竹是銜恩植。碑緣墮淚

鐫。賻金貽舊掾。甘薯採遺編。公官山東臬司時。編甘薯錄一書。為備荒之策。邇因豫東被旱。大吏以公書進呈。上閱之嘉嘆。特勅刊布勸民種蒔。而公歿已月餘矣。想像靈

輻發蕭條素旄旋。妻孥仍異縣。墓舍少良田。清白堪遺後。逍遙定證仙。全歸公已矣。隻影我潸然。樗櫟材成散。蝸鳩性賦顯。屏藩司重任。邱岳積前愆。苦蘗膏如此。良箴勗慎旃。同期心黽勉。互戒俗輕儇。繫帶還襪職。褰韉促赴邊。自慚官守曠。敢怨命途遄。申命邀寬大。餘生予滌湔。汗漿哀病驥。飲露咽疎蟬。縲紲先解。檣因事奪職軍臺効力公以俸廉助贖雲羅網又牽。路岐增悵惘。雁遠託勤拳。銜結中懷矢。追維萬慮煎。託孤心肯負。撫抱痛應填。知己今誰偶。招魂路幾千。寢門迷渺渺。芻束乏戔戔。永輟床頭瑟。重披篋裏牋。黃墟過寂寞。白髮洒潺湲。有恨成終古。無朋伴老年。衡茅他日返。漬酒認荒阡。

崔龍見

字幔亭。永濟人。乾隆二十六年進士。官荆宜施道。

癸卯冬暮杭州無軒司訓屬和芝山甥題湘管齋圖元韻

廿年作吏無老屋。官退恰如鮎上竹。竭來從事古餘杭。雪霽湖山積寒玉。太邱把臂恨較晚。眉宇軒然照人綠。休嗟冷落滯春盤。會見幽蘭出香谷。問君高齋何所有。萬个琅玕悅心目。好事能藏漢代碑。君藏漢碑多善

本集古蚤著歐陽錄。近刻有寓賞編爲言愛畫通神解。吾甥弄翰差免俗。芝山三爲之圖卷中題識盡英賢。絕藝同工非

異曲。庭有懸魚今哲匠。君爲太守鄭楓人先生門下士延賓賓館肯令坐客食無肉。待尋湘管諧素心。朱笠亭大令爲作素心閣圖勝覽他

時傳祝穆。

春雨次趙味辛舍人韻

好雨及芳時。疎梅半着枝。雲低沾袂重。苔淺上階遲。烟柳張思曼。風花江總持。陽和霄漢意。留待舍人詩。

儲祕書

字玉函。宜興人。乾隆二十六年進士。官至黃州知府。有緘石齋詩稿。

蒲褐山房詩話。玉函好游汗漫。兩度嶺南。中年後始中甲科。數載省郎。一麾出守。尋以罷官歸卒。其詩淺而實腴。清而不激。正如素練。輕雅宜時。用五言有鞭絲紅稻雨。帆影白蘋秋。竹陰清石磴。花色淡秋衣。亂鴉盤古塔。凍鷗聚閑門。海月迎人滿。山花背客妍。苔階微露白。竹屋亂烟青。玉梅殘夜雪。銀燭小樓春。映暗漁燈小。江空戍角高。雪屋寒炊黍。風燈夜剪蔬。七言有野雨舟橫新水渡。晚涼人在綠陰村。雨色盡歸山一角。春光恰到柳三眠。客長先覺涼風至。鄉思空隨夜月盈。衣袖尚存慈母綫。盤殮重剪故園蔬。故園重見花如雪。舊雨相看鬢有絲。綠蔭邨邊孤寺掩。春陰牆角一花明。倚闌有母心空切。負郭無田計總非。燭殘客舍聽蛩語。葉滿長安送馬蹄。同人每傳誦之。又工倚聲。見予所探國朝詞綜。與其鄉任曾貽史承謙相埒。

枕石軒小集贈澤周

老屋倚城根。幽人此高寄。冷然琴聲罷。剝啄時一至。散帙坐涼軒。披襟受空翠。微月映花叢。林亭淡春意。清譚易淹留。薄酌不成醉。願言共晨夕。永謝塵中事。

瀨江道中

扁舟越寒溪。篷窗正愁絕。餘霞散復收。遠火明更滅。匪叫一天霜。漁歸半帆月。舟人指前灘。灘水空陳蹟。我行歎飄蓬。望望烟波闊。濁酒聊自斟。羈懷那可說。平生對清景。強半在行役。

過友人山居

招尋出城南。迤邐翠微路。峯陰豁清曉。花氣釀春暮。濃綠罨山村。鶯啼不知處。連塍宿麥秀。隔竹新泉注。雞犬何翛然。幽人此間住。摘蔬留客飯。就石安茶具。習習松下風。遲遲晷景度。晏坐竟忘言。羲皇靜中遇。

西城觀冰歌

層城兀峙西河灣。茫茫千頃浮波瀾。城頭三日北風吼。雪花如掌愁雪繁。朝來風定水亦結。大地凍合琉璃盤。蓬萊宮闕在人世。晶光照耀陵心顏。點染但見亂鴉黑。空明遠映霜楓丹。銅峯一帶忽無影。罨畫竟作生綃看。我昔客游歲云暮。層冰嵯峨寒燕關。行人利涉務巧製。冰牀絡繹紛河干。臨流不作老狐聽。宛然車轂交迴環。可惜南人不解此。膠舟歷歷蘆花灘。檣摧櫓折納手坐。瓶空粒盡愁眉攢。前村有酒沾不得。咫尺徒歌行路難。

臺莊雨次

松花明驛路。客子尙披裘。山鳥呼泥滑。人家過麥秋。遠遊忘節序。多雨憶田疇。照眼清淮近。飄然一葉舟。

丙子元日

楚岸光風轉。輕帆拂曉懸。江流開霽色。山郭入香烟。故國猶千里。征途又一年。梅花曾有約。計日盼歸船。

寄跡

竟日衡門掩。蕭然客館清。竹烟寒不起。松雪夜微明。煮茗消殘漏。攤書戀短檠。蹉跎歸未得。愁絕歲崢嶸。

松陵舟中漫興

路入松陵百里餘。霜皁木葉未全疎。風帆零亂頽陽外。漁火荒寒小雪初。旅食苦無鱸作膾。吟情惟有雁斜書。經旬醉臥孤篷底。誰道清遊勝索居。

桐廬道中

山遶桐江碧四圍。輕舟日日弄清暉。人家一帶緣烏桕。帆影相連入翠微。到處灘聲經雨驟。等閒魚味及秋肥。高蹤輸與羊裘叟。一片吟情屬釣磯。

九日抵廣州

搔首南天對夕暉。越王臺畔卸征衣。峩嶷樓觀臨滄海。縹緲人烟接翠微。鄉信更無鴻雁達。秋風祇有鷓鴣飛。今朝正是重陽節。何處東籬採菊歸。

春日懷故園

天涯節序近傳柑。嶺外梅花未許探。最憶故園風日好。霏霏香雪石亭南。

沈士駿

字文聲。長洲人。乾隆二十六年進士。官編修。

塞下曲

邊城木落雁南飛，
颯颯金飈塞馬肥。
今夜李陵臺上月，
照人何處搗寒衣。

湖海詩傳卷二十六

趙文哲

字升之。號璞函。上海人。乾隆二十七年召試。賜內閣中書。殉金川難。卹贈光祿寺少卿。有媿雅堂。婿隅等集。

蒲褐山房詩話。升之賦才英敏。少在申江書院。得凌少司馬指授。論詩以新城為主。既而與張策時。凌祖錫。汪韓懷。吳企晉。同學。至蘇州。又與予及鳳喈來。殷互相砥礪。於唐宋元明本朝大家名家。無所不效。亦無所不工。自入內閣。直機地。益爲于文襄公所賞。暨借予入滇。蜀得江山之助。所作尤變化新奇。至其外佳句。可摘者。如藕花香遠隨蘭棹。桐樹陰清滿葛衫。層層露檻全臨水。葉葉風帆直到門。迹異騷人吟楚些。趣同傲吏託齊諧。中年絲竹愁兒女。少日橙梨憶弟兄。白髮已虛鉛鼎術。青山空憶草堂賞。牽得碧蘿能補屋。穿來黃竹解擊箱。秋風遠度關門樹。曉日晴開嶽井蓮。老去評量絲竹肉。客來贈答影形神。夕陽沽酒柴桑路。夜雨題詩苦竹州。出世尙仍居士服。浮家擬署散人銜。矢石餘生嗟已老。詞章小技愧非尊。晚歲蟲魚空著述。故山猿鶴漫移文。羽林卒勁排鷓鴣。上苑書稀斷雁鴻。亦炎洲之翡翠。渤海之珊瑚。採擷不能窮也。

鄭學齋詩爲王德甫作

秦灰漢始噓。孔壁魯乃壞。五經日再中。萬古破昏靄。都講滿石渠。同源異流派。精學推小毛。曲臺屬大戴。田因高弟傳。伏藉嬌女對。胥靡申所羞。巫蠱孔猶晦。式悲歌驪駒。固困刺緘殺。餘子列儒林。無譏比自郇。

東京稍凌遲。鰲輓競雕繪。圓橋聽已非。倚席講斯懈。板蕩及董逃。兵甲日犇駭。鬻宮逢採薪。射圃見鋤菜。零縑製騰囊。大帛作帷蓋。天未喪斯文。川岳秀靈在。偉哉後鄭公。通德卜門大。髻年恥就吏。耕養甘負耒。游學走四方。竟豫更燕代。於時馬扶風。皋比意頗忤。絲竹列絳紗。三年不廻睩。目送吾道東。贈言發深喟。六藝論既通。七緯學豈外。九章窮纖毫。三統究元會。遂鍼左邱盲。復起穀梁廢。文成百萬言。決若江河沛。傳家按禮經。趨庭著明誠。自言苦萍浮。典籍率腐敗。寫定藏名山。日暮遠靡屆。妖夢驚龍蛇。仰止失衡岱。景侯實幹材。駁難逞狂喙。如何宋諸儒。高談氣矜邁。占易先後殊。陳書古今悖。春秋惟刻深。鄭衛盡淫穢。訓詁束高閣。膽決吁可怪。篁墩劇披猖。栗主竟裁汰。撼樹同蚍蜉。亂苗等秕稗。一髮懸千鈞。後死心孔痲。王郎大雅材。風華被江介。餘事稱詩人。咸韶掩離韎。逢時每途窮。汲古獨津逮。青箱抱遺經。力欲掃榛薈。沈酣笑積蟬。慎重疑觸蠱。妙或能解頤。快真過爬背。時見抗手來。伉伉壓流輩。圓泖水迴羅。橫雲山點黛。中有一畝宮。差勝三間廡。高懸禁扁書。體勢重金雍。平生北學心。昌言震聾聵。子亦鄙章句。結習久未瘥。志寧逐鷄翔。謗可任蟬喝。敢慚莛叩鐘。竊喜針引芥。君能張吾軍。鼓衰期可再。頗聞澱湖陰。孔林接香界。故物留壁環。勝地絕塵壻。心非戀菴鱸。謀已叶善蔡。問奇來叩門。春風長書帶。

京江曉發

夢醒江月斜。隱隱數柔艣。舟人覺潮生。掛帆逐前侶。霏霏水氣滋。靄靄露華聚。偶因白鷺飛。烟中辨洲渚。

須臾散初陽。已見瓜州樹。汀花何漠漠。隔江夜來雨。山迴露碓牀。岸迴隱漁鼓。微風來炊烟。人家渺無所。羈心信多感。景物矧如許。三嘆卽長途。勞生念終古。

江上復遇金棕亭同人永濟寺登觀音巖眺望作時金將赴廣陵

微雨青楓寒。羈禽去遙裔。悠悠渡江船。日暮更愁繫。別君水上樓。逢君山間寺。意外得攜手。塵蹤暫同憩。入門杪攢陰。風葉時一墜。商飈從西來。傾聽浩無際。埋策肆遐矚。荆豫宛相次。崖傾隱頽陽。谷邃振涼吹。樹杪榜歌喧。烟中樵響逝。離合洵不常。身世矢相棄。何處廣陵思。殘鐘隔江至。

烏石灘

灘行日百憂。駭此水底石。烏石獨人立。鬥水出奇力。一撇修蛇赴。千盤怒馬勒。旋渦倒來深。陷作飢蛟宅。往往月黑時。磨牙伺羈魄。長年亦飽經。既至色如墨。入險萬夫謀。險絕聲轉寂。百丈細於絲。性命輕一擲。我生抱區區。踐此世路窄。太行偶然移。銜木竟無益。齋心報則殊。元天自幽默。毋恃呂梁游。風波浩無極。

過桃源初上一灘名毛甕子

灘流清可憐。阻石形勢變。一望江空濛。如雨復如霰。槎牙數峯峙。中各通一線。石立水亦立。飛浪搏人面。水中八尺筍。水際百丈絳。遙遙相叫呼。有若赴急難。當其入險時。出死力與戰。昔稱倒水巖。靈秀桃川冠。龍溪碧玉流。茂竹紛可玩。灘上爲甕子峯。峯與倒水巖相望。卽水經注所云沅水東歷三石澗。幽景不我秀。若削成。茂竹傾娟。致可愛玩者也。龍家溪亦經此。南注于沅水。

娛徒令飽憂患。何處漁仙菴。聞鐘起三歎。

大風過芝草白榕諸灘

夜雨聲蕭疎。晝雨勢稠密。山川水雲中。凝望渺如一。今日灘稍平。得雨翻蕩潏。小舟駕長風。輕矯故無匹。水石自毫縱。狃勝犯倉卒。中流一洄游。長年爲股栗。豈知十幅帆。空際破狂猛。篙櫓未及施。州里速傳驛。竟以不戰勝。此理陰符述。貪天亦何功。靜念爽若失。行人幸無恙。何啻破冢出。

日暮風更橫。去橫空與水搏。水亦飛怒濤。直向柁樓落。風水自相鬪。吾命果安託。瓶盞鏗有聲。衣履濕難著。低蒲二三葉。一走不可縛。緣溪石巉嶮。未敢著吾脚。進止兩無計。指顧徒駭愕。天憐我淹滯。亦增灘勢惡。送以飽帆風。使知壯遊樂。惜無萬斛舟。橫海截蛟鱗。小楸薄於紙。豈足試盤錯。繫纜餘驚魂。言就荒戍柝。一望波連山。徒侶何處泊。是夕與僕人舟相失

鷓鴣灘

遠聞水鳴灘。近望雲點墨。真如千鷓鴣。出沒浪花白。立如怒將飛。拳如倦且息。踏沙去遲遲。嬉雨來拍拍。散布整復斜。羣居雙或隻。一片清瑤流。蹴踏成碎碧。因之生鷺濤。橫空大於席。扁舟簸其間。一波更三磔。大灘苦浩淼。小灘苦偪仄。有大鷓鴣小鷓鴣二灘相連茲鳥又何知。矧乃水中石。安得并州翦。翦此蔽江翼。

牟珠洞

黔之洞最奇。我所游未快。羈蹤歲將徂。勝踐日斯邁。名徵牟尼珠。地納須彌芥。款戶朝烟霏。穿穴午曦曬。一柱聳琳宮。四隅圍石砦。像設因自然。跌宕城不壞。初入洞有石柱中懸柱上環刻佛像乳泉薦晨供。籟韻傳夕唄。惜無宗

雷緣。永謝向禽債。尋幽利在需。鼓勇受以夬。乍窺窈兮深。稍進迫且隘。冲融冬氣藏。闢慘夜分屆。攜策替

桃筇。呼炬投菅蒯。層級雲作梯。重關水爲界。滑屢仰難留。頽冠俯欲罨。先行試一童。後至挈兩价。由竇意

未慙。自崖興寧敗。回旋任屢探。要害輒交搯。憑虛馭神尻。歷險破天械。苔衣青可裯。草帶碧堪髻。硿硿轉

元颺。沆瀣流素瀼。犖礪退之詩。模糊巨然畫。物態信瑰奇。山心轉清灑。窮搜足開輶。樂事爪爬疥。逝將抉

靈扁。詎俟揲吉卦。潛窟何窅冥。驚濤忽澎湃。虺虺春奮霆。嚶嚶秋起噫。象罔珠自沈。支祈鎖誰解。洞中石

者凡三十一人呼爲天門第一門高二尺許第二門僅尺餘匍匐乃入流泉漫溢幸不深至第三門則高及一丈中懸石柱宛如椽闌號曰玉龍其下水聲如雷云有神物潛焉卽之深墨無階梯可下游者皆自

匡而返矣凜乎客不從。甚矣吾旣憊。途窮去還遲。徑捷出翻註。興盡懸後期。觀止發長喟。闕略經遺桑。荒唐史

徵稗。撫景縈征魂。揣稱資旅話。其穹疊岑樓。其廣敞官廡。狹者封丸泥。低者覆土簣。砥平或無頗。縫裂或

有殺。每每錯原田。泱泱繞溝澮。虛中鳴鐘鏞。剡上列珪玠。清癯儒樞衣。嚴毅士環介。陰嵎伏於菟。邃室居

大蔡。晉爨搏而蹠。邱鷄鬪已鍛。躑躅涉波豕。淋漓渡水排。位置無定姿。皴抹亦殊派。衛公失品題。米老徒

起拜。曷爲落鬼區。竟使近蠻寨。旣阻問津懷。枉負垂堂誠。浮生小淹泊。造物大狡獪。屬思窮千形。落筆凌

百怪。如見天門開。天矯玉龍挂。

己丑元日同德甫至螺峯圓通寺禮佛用東坡同遊羅浮道院及栖禪精舍詩韻

白髮又一年。風波幸初揭。曉齋足音絕。靜玩爐煙細。昨夢了無痕。非來亦非逝。相攜訪名藍。因巒疊雲砌。入門向圓蒲。悲涕滴征袂。病葉依孤根。傷禽護餘毳。亦知天地間。金石尙同弊。倘乞去一袈裟。聊與娛晚歲。蓋頭把香茅。被體褰芳荔。南中春早融。帶雪秀蘭蕙。不待桃花紅。已覺隔塵世。嗟此叢垢軀。佛香爲除禊。天親與無著。豈必皆兄弟。再拜叩導師。吾駕何時稅。

冒雨行老秧田道中啼猿滿山率爾成咏

一峯十萬樹。一樹四五猿。一猿千百聲。雜以風雨喧。一日十二時。一程三十里。一軍六千人。盡在猿聲裏。爾猿有何悲。子啼續母啼。爾本斷腸物。不關生別離。三朝復三暮。一鳴更一躍。好似征夫苦。翻唱從軍樂。

客夜同德甫碧夢重訪魯梅作

古梅如枯僧。一蒲伏清衆。又如清都仙。紛紜翳白鳳。脫身兵燹外。孤逸天所縱。憶昨吾獨游。歲寒盟許共。幽娛澹忘言。未敢恣吟諷。相思忽經年。重來挾二仲。匹諸訪古歡。有介禮斯重。脫我黃皮袴。卸君紫絲鞵。入門意翛然。何處著廉從。撫柯互盤桓。自倒粉盜甕。石骨青有稜。苔膚碧無縫。天根茁冰雪。鋤月孰能種。疎花僅數點。已有幽禽哢。想見爛漫時。一片白雲凍。詩慚水部何。心比廣平宋。遲遲喚歸鞭。愛忍薄寒中。空齋酒忽醒。永夕竟何夢。

庚寅除夕碧夢和東坡粲字韻詩見示賦此答之

一燈花忽圓。雙髻雪將半。誦君守歲詩。動我臨觴歎。愁隨老俱至。人與世相玩。閨楊已頻厄。社櫟原自散。同臨戎馬場。似遇漁樵伴。使令互僮奴。招尋雜昏旦。苦語口銜碑。歡笑頭沒案。驚看桃符新。倦聽爆竹亂。國門隔朝謁。家廟廢薦盥。去日何忽忽。歸期反緩緩。病驥詎受銜。窮魚猶在貫。餘生吾就衰。斯志孰起懦。成虧任鼓琴。輕重付懸炭。勞歌有促節。羈迹無定館。昨惠越酒醇。大勝燕玉暖。近連致紹興酒甚佳醉中泣最多。試驗枕非粲。

檢家書感懷寄內再次前韻

我家五畝宅。水竹居其半。就荒今幾年。空抱歸與嘆。昨開君素書。淚浣不忍玩。上言勉加餐。下言勤服散。懷哉卜刀環。老作春耘伴。憶昔入館初。息壤傳戒旦。鮎魚一上竿。幾至充食案。可憐箜篌曲。力挽中流亂。君實我諍友。何止奉匱盥。自從謫天涯。思君帶趨緩。況聞懸磬室。一錢辭朽貫。平生飛揚念。到此坐頽懦。今夕復何夕。誰餉紅羅炭。徒吟北門詩。尚守西河館。終期攜手去。言就茆簷暖。若準二歲刑。明日免輸粲。

予以戊子小
除日抵滇

東充齋德甫三次前韻

桐音曷以哀。其尾焦已半。亦如傷心人。未語先慊歎。三年走關塞。戈甲若服玩。引領望休兵。春田快牛散。

逐臣果安求。庶趁歌衢伴。譬諸無日者。永夜亦思旦。錢王我石交。旅食每同案。爲民呼號亟。謂充齋爲母方寸亂。謂述庵餘事但指口。涕淚日忘盥。深知時命窮。反苦歲月緩。炯然壯士肝。金石尙堪貫。此身戰場餘。敢逐懦夫懦。柳子說捕蛇。白傳紀賣炭。感事良區區。尙欲陳史館。今時秦階平。願布春臺暖。書生輒大言。一任三軍粲。

寄懷習菴白華耳山四次前韻

昔人貴讀書。僅求袁豹半。同岑得三友。乃有望洋歎。我老學殖荒。空對日景玩。槁瘁似左徒。疎懶此中散。豈能挾鉛槧。來與老兵伴。自顧本薄植。斧斤復旦旦。公等大雅材。作吏傍香案。同聲奏朱弦。洋洋曲將亂。神聽和且平。庸以侑清盥。三年吾不見。如病失和緩。古歡復有幾。夷險心一貫。苦憶臨歧言。誦之激頑懦。天涯一寸腸。日夜攪冰炭。定知柏葉尊。時過藤花館。予京寓有古藤一株勉旃問字人。豈特借餘暖。兒子乘淵近受業習庵白華之門絨詩致綢繆。何夕見此粲。

永昌得錢辛楣學士書卻寄八次前韻

易羅水一勺。鯉魚無尺半。素書從何來。釋我當食歎。讀罷置懷袖。分作三歲玩。學士今儒宗。品地壓黃散。憶昔春明門。蕭然素心伴。著述樞馬班。寤歌接伊旦。矢之蒼松枝。貽以青玉案。敬奉穆如篇。每許起爲亂。自從歸子舍。眷戀雞鳴盥。頗聞庭誥勤。趨朝戒毋緩。去住迹未歧。出處道本貫。吾衰果何爲。自以憤勵慙。

杜牧有罪言。近已學吞炭。空留喻蜀文。曷足付芸館。思歸亦良苦。尙念挾纊暖。君如終惠存。曷彼門子粲。
來書過誇兒子
乘潮近狀故云。

感遇九次前韻

子美吏隱兼。長康癡點半。今吾定何如。自笑還自歎。遇事論短長。久欲愧陸玩。又愧殷伯道。避賢趁行散。
咄咄坐書空。獨與形影伴。已爲斷尾雞。何苦強知且。覆鹿試追求。盜羊可并案。睡訝歸夢濃。無奈啼鴉亂。
平生一片心。不用洗玉盥。誰令州閭會。雅琴彈擘緩。薰蕕強從同。涇渭反相貫。可憐臣精銷。曷敢諱衰悞。
微命輕鴻毛。日試陰陽炭。此身果安歸。故園亦假館。壺水自知寒。熨火自知暖。孰通繫表言。千載望荀粲。

乞畫一百二十四韻寄贈王健爲明府

風篔

昨開君素書。如共翦燈語。磊磊見意氣。綿綿感心腑。斐然情文兼。風格近典午。手熏蘅荃蓀。步節珩璜瑤。
恍披光明錦。必出天孫杼。所悲生同岑。廿載晤言阻。自我從軍行。幸近花封古。君亦奉符檄。橐管趨幕府。
謂言握手易。互作窮塞主。懸匏繫何爲。漂萍泊無所。合并尙愆期。張角逢六五。知君意鄭重。不在加餐努。
平生抱區區。思爲知己吐。岷川浪奔雷。昔嶺雪飛暑。中隔一千里。日夕枉延佇。況我飽憂患。偶幸脫網罟。
三寸舌猶在。敢使禍重賈。鬱茲塊壘胸。五岳莽撐拄。今吾竊有請。能事君儻許。清門擅丹青。幾輩入堂廡。
兩髯尤絕倫。謂君與羅兄
蓬心舍人久重懷瓊佔。昔聞唐退傅。屏風競毫楮。東坡笠屐圖。逸韻播蠻土。願學誠太妄。

匪徒異出處。爲君述舊遊。歲月駭飛弩。頭顱愧人看。俾肉嗟自拊。惟餘好奇懷。頰毫或有取。浣花牋十樣。

君畫準此數。一圖虎山橋。探梅倚柔艣。帽簷壓風雪。指點問邨酤。鄧尉探梅圖第一一圖雲林寺。冷泉澣衣苧。畫

夢隨輕颺。引入萬松去。雲林銷夏圖第二更憶幸已秋。卸帆自孤嶼。遂登雁宕山。瑰恠圖經著。天台雄潮東。持比

乃邾莒。宴坐臨靈湫。百面震雷鼓。璇扃窅沈沈。白氣裊一縷。我向諾巨那。乞石平似礎。入山兩汗脚。快洗

碧玉乳。癡龍且安眠。亦莫敢爾侮。此圖重于鼎。君以弱腕舉。筆勢挾瀑勢。紙外拗餘怒。龍湫濯足圖第三是皆少

賤日。吳越視庭戶。水餐就漁磯。岩宿寄樵鷗。相於結汐社。還往足鷄黍。詩多正始音。淳悶同祝嘏。一從落

人海。此樂不我與。繡衣被廟儀。瓊粒竊倉鼠。抗塵復走俗。顧影中自憊。維時關西館。著作盛鷄序。史鑑評

千秋。方輿考三輔。子在館承修通鑑輯覽及一統志蓋纂輯直隸省甫竣而罷我實預編輯。燒盡如椽炬。修書圖第四其年帝秋獮。清蹕忝

陪扈。于田馬蕭蕭。在圉鹿麇麇。對仗揮制草。動色飲飛伍。塞垣簪筆圖第五校書天祿劉。賦射華林庾。二事試入

畫。差足洗寒窶。噫嘻遇何常。升沈難逆覩。芳蘭曷爲鋤。叢桂奚以斧。獻玉詎招刑。投珠胡見拒。得馬焉足

憑。亡羊寧尙補。一跌六七年。荷戈走邊圉。敢辭辱泥塗。聊比越草莽。單車乍離燕。短襪旋過楚。曉臨弄珠

臯。暮托捐佩浦。驟聞隣船笛。嘹唳出汀渚。湖天月忽落。楓林颯寒雨。衝烟哀狝鳴。跋水瘦蛟舞。未出玉門

關。已使感羈旅。何如青衫人。送客江之滸。夜船聞笛圖第六泊入征南軍。王事念靡盬。病來全似痞。食至半疑蠱。

嗟哉筋力衰。魍魅恐難禦。行行大金江。毒漲沸如煮。助以擷鷓風。萬室失保聚。我駕獨木舟。簸蕩身軀僂。

乃箭紛滿眼。浮髻礙洲激。一葦犯黑來。勢已等騎虎。貌焉六尺軀。輕抵窮蟬羽。金江兩渡圖第七。生還真偶然。仍

逐防秋侶。瘴鄉居何陋。敦樸擬鄒魯。借箸幸多暇。雅歌從去。去征虜。謂大宗伯城南湧珠泉。日涉比園墅。泉在

永昌城外古壘。壘蛻地穴。若可穿以組。孰云泡易滅。宛在玉盤貯。庶幾濠上觀。藉遣謫居緒。泉圖第八。蜀孽

兩金川。僻處越塗禹。山名怨則鬪蠻觸。昵則倚蛩駘。誰築籌邊樓。而不備桑杜。王赫斯有征。重臣寄心膂。我

亦承賜環。星言赴益部。昨冬掃一窟。檻車繫其父。圖籍無可收。安問故鐘簾。降人接踵至。哀涕被奎踞。一

刀尺有咫。擎獻自蠻豎。其詞劇嘍麗。略不辨儂汝。譯者以臆對。匪云實篋宮。紈牛與露犬。件繫在軍簿。感

此不殺恩。願供香一炷。報之雙錦段。燭下數摩撫。霜華何棱棱。冷氣逼眉宇。十步五步間。鬼物近斯沮。誓

將兩酋血。爲刀旌厥武。蠻人獻刀圖第九。君圖此四者。所遭果孰愈。荼蓼將同根。非辛亦卽苦。行年四十九。志已

絕華膺。生還豈不懷。海畔有環堵。我家非素封。義方秉遺矩。泉明勤責子。康樂善述祖。誓慕右軍文。思歸

季倫敍。東臯卜丙舍。前場後爲圃。春及童抱耒。秋至婢舂杵。白頭好兄弟。佳日速肥羜。淵也稍嗜學。不競

紫囊賭。一經授先生。津逮在訓詁。毛鄭如可作。中流藉砥柱。沒齒迺無憾。願宏責良鉅。圖成當息壤。不死

天所予。丙舍授詩圖第十。君畫過王宰。我詩慚杜甫。發函定絕倒。筆墨代編紉。蒙莊說畫師。盤礴動當宁。問君一

揮酒。呼醉盡幾甌。經營極意匠。擺脫宜和譜。他時眎哲曷。難着顛崖樹。

灘石多怪偉。近所見則嵌空秀削。大類吾鄉太湖石。特林立溪岸。間不以少見珍耳。得詩一首。

楚南謂多石。斯語殊憤詫。灘行始信然。怪很亦可怕。自過雄谿路。瓏玲見頻咤。十里更五里。目賞苦無暇。峨峨冠劍偉。冉冉笑鬢姪。梯雲疊三成。夾水垂兩架。俯峙如鼎甬。仰承若鬘髻。古苔繡一片。必裂四五罅。玉樹灣之東。晴江見虹跨。土人呼爲仙人橋。低懸半月彎。橫鎖兩溪汊。千峯雪消時。玉龍走其下。何殊藍橋瀑。跳盪各雄霸。旁有峯數朶。未肯出彼勝。頗米透縐瘦。三品總無價。我鄉笠澤湖。水石互冲瀉。鼉渚龍渚間。蚺蛙誇入化。方此真小巫。甲乙非旅亞。惜哉落炎荒。僅當障水壩。浮泥擺枯蘆。野火延老柘。棲烟烏斯巢。避雨牛所舍。往往放逐人。於此發悲訝。我獨賀石遭。幸不置臺榭。神物本難馴。寧堪入罟獲。未聞壺公壺。可以籠岱華。大小豈殊觀。盛衰常代謝。平泉無百年。秋風遍耕稼。土花何斑斑。當日覆歌帕。石丈苦無言。輒遭腐儒罵。不如好江山。蒼蒼閱冬夏。五溪況無瘴。風景比杜灞。此中豈少人。筆力柳州駕。爲石發奇偉。光怪斗南射。終當一訪之。息壤歸帆卸。

大池灘

小池連大池。蛟龍有重坎。騎虎勢難下。決進豈吾膽。日落風蕭蕭。四顧墨雲靄。濤頭倒如山。相戒勿輕撼。四舟一心力。循環互牽攬。爭此命一絲。諱踣聲慘慘。我舟最後發。忽遇石角岷。百丈罨急流。舟如斷蘆颯。一夫出應募。懸絳踏幽窩。翻身雪浪中。微見一燈閃。挾石負而趨。一步猶一險。前舟見相賀。到岸鼓音紉。急傾斗酒勞。驚定生百感。安得百萬夫。習流號勇敢。

宿汝川縣作

朝發尤溪驛。夕宿汝川縣。山城小於斗。紛沓市廛變。赴赴羽林軍。顧盼炫乘傳。圉人牽馬來。一躍走如電。回首呵下駟。槽櫪差既遍。徵求到芻菱。鞭撻及丞掾。誠哉好身手。我欲觀一戰。憐余館未定。躑躅日已晏。幸逢查使君。謂儉故人真戀戀。殷勤掃塵榻。咄嗟辦廚膳。燈前兩白頭。絕塞得重見。妻孥何足問。身在尙疑幻。軍行事一槩。欲言自傷賤。鬱然壯士肝。聞雞感明旦。

有買得古碧玉小印者文曰文雲孫余謂此信國公舊署名也爲作長歌以諗好古者

正氣迴薄化紫雲。夢蘭吐瑞嘉名分。燕臺血埋千載碧。誰斲琬琰遺雕文。猩紅欲滴古翠剝。嫩于苔色圓于簣。蕭然眉宇撲蒼潤。令我懷古心拳勦。文山白哲美如玉。妙年銳意窮皇墳。玉帶生研最奇古。應有小印留書芸。集英射策炳龜鑑。御筆第一書劉蕢。天門榜開非肇錫。比諸正則稱靈均。一從麗江領戎幕。飛書草檄馳千軍。押成鳳尾自鈐記。懸知血淚縈朱紋。黃冠歸鄉苦未得。衣帶銘語空斷斷。晞髮客去碎如意。織綾婢老霑羅裙。巾箱舊玩散榛莽。時見寶氣騰蝸蠃。井中心史亦已出。此印足直金盈斤。流傳估客辨真贗。異名小字疑紛紜。君不見六陵雙匣厄羊馬。玉瓶銅鬲隨妖氛。區區片石以人重。不與鬲角同漂焚。段司農笏屬國節。今無其物猶餘芬。摩挲三嘆叫朱鳥。天龍天矯捎蒼雲。

蘇武牧羝圖

白日欲沒黃雲徂。海氣直撼豎巫閭。烏頭不白馬角無。牧羝求乳何爲乎。咄咄子卿意良瘡。湯蘂甘之非
董茶。手持秃節六載餘。上林雁斷無來書。傳聞故園久荒蕪。保宮老母愁桑榆。爭船觸柱兄弟誅。飄零何
處求妻孥。同來吏士各羈孤。相逢不敢鼓嚙胡。丁年匆匆雪髻須。兜離窈停難久居。人生到此誰不渝。君
獨奚爲抱區區。陰山八月雪載途。朔風如刃摧肌膚。野鼠掘盡百草枯。羊飢人飢聲淚俱。仰天一慟雲模
糊。羈禽離獸爲叫呼。隴西將種亦丈夫。曹柯之盟豈盡誣。哀哉椎髻穹廬趨。草間苟活羣羊如。河梁置酒
空爾娛。刀環餘語何其愚。不有子卿全厥軀。將使夷狄輕中都。嗚呼自昔保秦資廟謨。四夷爲守言非虛。
漢家邊患惟匈奴。奔狼突豕兼封狐。犁庭絕幕計已疏。和親況復金繒輸。譬諸朽索御渥駒。安能俯首馴
薪芻。嗟彼使者亦何辜。雲中區脫經崎嶇。虜虜睢睢更盱盱。片言立使肝腦塗。宛王懸頭南越屠。窮荒難
拯冤魂蘇。生綃慘淡誰所摹。決皆恍惚馳伊吾。題詩勿用相嘆吁。君不見麒麟閣上懸新圖。

凌祖錫招同諸子集沉香禪院卽席述舊爲長歌

客居近市塵土欺。況逢三伏炎官威。手搖紈扇臥冰簟。猶似深飢遭蒸炊。板扉剝啄來舊雨。雙眼一豁開
金篋。時張策時過訪西園公子雅愛客。青援折簡旋招攜。摒擋琴尊過蕭寺。不用飛蓋相追隨。幾年不到舊遊地。
僧雖據座稱傳衣。須臾列席向小閣。依然四面松風吹。浮瓜沉李破甘碧。勅斷葱蒜兼羊豕。狂歌起舞樂
復樂。半酣話舊生酒悲。憶與諸君共盤礴。意氣傲儻誰能羈。封侯似可談笑得。便思決起排天達。十擲輒

健豈關拙。一錢不直安足嗤。就中吳郎晉企盛文藻。蠻牋醉墨何淋漓。尋芳一曲交唱和。井華汲處能歌之。自從人事變桑海。相去咫尺同天涯。餘生憂患百無用。曳尾久已甘塗泥。少年綺語亦懺盡。鑪香經卷差相宜。人生離多會苦少。好夢一斷無由追。相逢有酒不盡醉。明朝歧路徒相思。感余區區呼更酌。不知主客當爲誰。起行松陰看月出。清影照鬢涼絲絲。

憂旱

重光之春苦雨恆。三農無麥愁薪蒸。五月六月復癩旱。火雲終日峯崢嶸。漶娑女媛自拜舞。勃谿鳩婦空飛鳴。高田盡成龜兆坼。深溝或作釜氣蒸。諸司皇皇休百務。郊宮索祭嗟難憑。三吳賦稅稱重地。漕船百萬輸神京。承平日久患人滿。斗米二百錢有贏。春葦作飯不得飽。須臾毋死祈西成。驕陽何意更肆虐。坐見無路呼癸庚。洪範五行昔曾考。雨暘休咎皆有徵。我皇御宇重邦本。豳風無逸陳丹青。屬車今年指吳會。比於先王春省耕。賜租賜爵恩屢沛。至今閭井猶歡聲。一隅告災詎爲害。天地覆載無殊情。流民定許監門繪。盛世寧有宏羊烹。天心人事一訴感。佇見甘雨隨風零。溟溟汎汎徧千里。共卜高廩多藏秬。窮儒此意幾悵望。步檐愁見昏中星。

題蕭尺木畫關山行旅圖

有山漸漸水迢迢。有車班班馬蕭蕭。行人攜持雜負戴。十里五里相周遭。蜿蜒或如蟻緣垤。翩翻或作鳥

赴巢帽影遙看出復沒。郵程那計昏連朝。關山突兀人眼底。秦城蜀棧窮岩嶽。誰披絹素寫絕景。蕭梁王孫能事饒。王孫奇跡留采石。長江東逝魂難招。斯卷傳是盛年筆。金碧界畫分秋毫。蘭亭本在特自喜。用白記中斜行細字親題標。十縑購得置小閣。日日坐對形神超。男兒墮地射弧矢。帷房妻子非吾曹。況復時艱苦謀食。那得閉戶歌逍遙。年來多病畏行旅。生涯落拓棲衡茅。飛禽兩翼雖暫踢。終思決起衝風颭。曳裾彈鋏詎忍此。藥囊卜肆從所操。名山大川徧游覽。歸事著述亦足豪。因觀妙蹟發遐想。一笑吾豈風中匏。

沈衡山進獅岡歌

腥風怒生沙石走。日落荒林動雷吼。老熊野兕無處逃。短後蠻奴揮赤手。佩刀出鞘山爲開。白超蹴踏飛塵埃。馴習控御別有道。長鞭短箠何有哉。疏勒康居萬萬里。方物由來載青史。良工粉本何代傳。咫尺風雲驅筆底。得非慶戰林邑軍。羣飛星瓦百獸奔。又疑狼山遇神物。一擊金精空咆哮。人強獸強差足當。坐使重鎗入宮闕。嗚呼柔遠古有經。不享其贄臣其氓。聖朝冠帶被海外。雕題鑿齒皆來庭。前年泰西重譯貢。趨朝稽首詞屏營。白牛香象誰比數。珍怪往往難爲名。至尊儉德豈寶此。卻之無以慰厥誠。天馬歌應陋漢代。旅葵書直宏周京。惜哉衡山身已殞。職貢未圖輸立本。文采風流空爾思。白頭愁賦丹青引。

錢王射潮圖歌

前水後水勢莫當。突如萬馬勝軍裝。江斐倚笑鮫妾舞。作氣八九吞錢塘。天目異人經百戰。閉門天子那堪羨。錦袍玉帶歸去來。父老椎牛縱高宴。樟亭酒罷意氣雄。歌詩慷慨驚龍宮。勁弓毒矢屹相向。海若股栗迴長風。是時臨江萬木亞。雪嶺銀城蔽空下。白日欲墮蒼天高。大旗不翻聲鼓啞。疾雷一聲齊發機。修羅刀箭紛而馳。金湯永鎮蛟蜃窟。真勝十萬熊羆師。潮生潮落悲人代。壯觀丹青動深慨。金券已消陵谷遷。鐵幢猶峙江山在。今古興亡同一漚。江南白雁恨悠悠。千載曲江傳弭節。梁園枚叔擅風流。

繡谷送春歌爲蔣紹初升枚作

我來闔閭城。春水桃花生。蘇臺萬楊柳。聽盡流鶯聲。江樓十日吹細雨。流光堂堂背人去。蔣侯跌宕多好懷。不惜張筵送芳序。華堂沈沈簾幙開。葡萄香滿黃金罍。崇蘭汎午竹交蔭。鳴鳩乳燕參差來。興酣促坐銀塘曲。前歌聲長後歌續。清淺蓬萊又一時。尊前長願顏如玉。前已卯繡谷送春詩。尤侍講西堂首倡。而歸愚師以諸生與焉。今師年八十有七。白首健在。復爲斯集。主盟洵佳話也。東風作顛花亂飛。白日欲斜客告歸。天涯作達且爲樂。回首鄉園櫻筍稀。

樂戶行

明末流賊張獻忠入荊州。自稱西王。時惠邸樂戶有瓊枝曼僊者。以色藝擅名。獻忠召以侑酒。瓊枝罵賊不屈。賊脅以刃。瓊枝罵愈厲。曰。汝技止此耳。吾何畏。羣賊樹之以飼犬。而曼僊則極其技能。爲獻忠所寵。遂乘間置毒於酒。以進。獻忠昵之。令先飲。曼僊色變不得辭。飲之立斃。獻忠覺其

毒亦礫其屍。

獻賊來。城門開。王早遁。官乞哀。西王府中晝宴啓。侑觴才人自朱邸。獻賊喜。瓊枝怒。樂戶雖賤非賊伍。玉肌白刃兩如雪。一笑相從飛碧血。獻賊怒。曼仙喜。樂戶誠賤堪賊餌。酖賊不飲令先飲。恨不宵來殺諸枕。噫吁嘻。罵賊賊怒一死輕。古有之雷海青。昵賊賊喜一死遲。古有之高漸離。堂堂兩樂工。千載耀青史。不謂江陵城。更有弱女子。

宿南堤河卽事

白沙碧波抱幽渚。天與征人養痾處。時于南初差。故行獨後。緣坡障以老楓樹。萬馬中宵自西去。無燭無月微有星。秋深露濃隔帳零。溪禽不知有客宿。時傍巾屨行伶俜。坐久漸復見諸景。對岸雲林致幽迥。葦華無風忽動搖。知是賣鹽夜歸艇。夷人多持鹽。來出售軍營。炎飈瘴雨十日淹。一夕清境清如恬。且支水枕百髮外。萬一夢到江之南。

猛拱土司進四象詩

王師征緬次猛拱。誕告諸夷爾毋恐。誅無赦者篡逆種。緬逆攬駁之父。竄藉牙。本以篡弒得踞其地。爾克共將受天寵。夷官感泣手雙收。攜厥配來錦帕攏。琥珀作瑱貫耳孔。蠻布花裙名曰桶。厥音嘍麗性愚侗。苦言隣寇肆牢籠。索米求金日苛冗。大旱望雲愁蟠蝥。公今來及秋瓜擘。無數啼嬰飢得漣。氓安田廬魄安冢。欲報之德乏球

琪有馴象四放秋瓏。兩牙彎環形擁腫。願進闕下誠忭悚。重錡不繫繩五總。以肱麾之行接踵。弓刀如山屹不動。曰跪則跪立則疎。賜以霞沐江濤洶。警與降臣勉萎拳。伏流不見背峯聳。一躍風雷四蹄湧。步伐儼然承誠董。非鞭箠之駕無要。九閭仙仗環陸棋。列象巍峨寶瓶捧。諸邦任土歲有奉。四象寧增玉塔重。鑿爾效順志頗勇。封章上聞不汝壅。錫以佩囊刀玳瑁。過望之喜逾得隴。聖清釀化極鴻濛。元甲瑠戈革包鞬。朱波彈丸壘中蠓。厥考盜兵始作俑。子弗幹蠱轉詢詢。獸之不如頑且僭。縛以尺組拔以拳。萬里頭顛象肩擁。象也聞之起而踴。

和雲巖先生雨後書懷見示之作卽次原韻

唾壺談麈被阿錫。幕府清嚴亞夫壁。偶盤駿馬挽雕弓。一手能生雙霹靂。軍中好整復好暇。不覺流光箭同激。瘴鄉入夏每愁霖。天漏沈沈幾重幕。今年旣雨晴更佳。露井風檐氣清寂。虛窻倚幌見螢流。暗牖藏燈任蛾覓。依然在受降城。一曲梅花聽吹笛。先生籌筆向戊夜。對景無端予心戚。昨聞京圻頗顛旱。壁牲禮徧山川滌。麥秋已過黍方華。麤飯殘年須飽喫。北門吾尙不憂貧。王事知公甘我適。防秋正調八關兵。屈指師期火朝覲。尊前偶乏刺閨書。閑數銅籤傍階滴。南樓涼月興何如。清嘯一聲曾卻敵。

放言一篇再疊前韻呈雲巖先生

蟻封何物膺九錦。蝸角有時破十壁。浮盃水欲傲滄溟。敗鼓音思掩霹靂。土龍行雨鞭安施。木雁凌風機

所激羣游擾攘蝨在禪。宴處啁啾燕依幕。鏡懸暗室混妍媸。鐘設聾鄉泯諠寂。醉裏驚蛇影易留。夢中藏鹿蹤難覓。邪蒿未必盡勝梁。纓竹何曾皆中笛。早聞抨雀走珠丸。頻訝割雞揮玉戚。鶴頸雖長豈用裁。鷺毛自潔寧煩滌。丹霞曳佩手誰縫。白石療飢煮孰喫。絲纏蠶老究何爲。紙破蠅飛亦焉適。肺肝吳越詎相知。眉陔邱山莫予覲。不求道術證九還。不向禪宗分一滴。放筆聊成天問篇。知公轉語鋒無敵。

充齋以和章東示四疊前韻

吟筒入手百朋錫。快似旗亭爭畫壁。賞花在昔笑徘徊。擊鉢吾今窮霹靂。公然撲伐勢不支。猝爾窮追變反激。枯腸隱隱轉車輪。駭汗徐徐拭巾幕。是時殘蠟對飄搖。此地酸醬伴岑寂。思當將斷逕忽通。句到初圓力難覓。遂令疏越清廟絃。却儷蕭寥釣船笛。年來蹤跡判升沈。老去情懷共欣戚。鄉關何事苦思量。兵甲幾時真洗滌。余髮種種愁頻搔。臣口期期恨如喫。用鄧艾口吃事借作喫但求飲酒千日醉。誰遣舂糧萬里適。路雙歧處我未迴。垣一方間人莫覲。罪言不緣鞞鐸發。血淚寧爲琵琶滴。小詩角鬪何足道。毒手老拳詫相敵。

擬宮怨五疊前韻

芳名憶自茗華錫。采殿春風扇椒壁。門前不灑竹枝鹽。日日宮車馳霹靂。爲誦周南第一篇。據魯詩說脫簪待罪詞偏激。君王不念有齋女。入廟曾尸六尊幕。執扇先秋忍棄捐。銀壺永夜聽悽寂。可憐庭樹影朦朧。夕

陽惟有寒雅覓。却望昭陽火照筵。有人醉弄寧王笛。瓊枝壁月奉宸歡。粉確脂田覃外戚。自搜薰篋賜衣存。零落蛛埃難澣滌。閑愛鸚哥解誦經。朝朝紅豆親調喫。深知永巷亦君恩。敢向僊家怨淪適。餘生輸與帳中人。珊珊猶望翻來覲。長門買賦少黃金。親拂瑤牋注銅滴。他時一鑑倘重陳。曾料莫敖必輕啟。

充齋枉顧復出一章見贈六疊前韻奉酬兼謝其頻致佳酒

飛將軍號君執錫。一轍翩然馳趙壁。我時堅臥若弗聞。大似嬰兒對霹靂。平生萬事甘讓人。詩句新來洗豪激。聲如土鼓不成摻。質比匏樽豈須羈。偶然拈韻佇興成。時鳥候蟲共喧寂。無人愛處君獨賞。纔放晨衙走相覓。瘴鄉流宕兩人慣。揮淚非因轅寄笛。上冬憶我戰場回。虞陛初傳舞千戚。蠻邦筐篚何足陳。鄙屋瘡痍要親滌。逢君把酒語慨慷。未藉此官一生喫。一篇臣結春陵行。俗吏聞之驚適適。文章風義君能兼。寢饋應知古人覲。獨慙我與世相遺。日向牀頭丐餘滴。肺腑連宵芒角生。乘醉衝愁無堅敵。

寓齋卽事柬述菴七疊前韻

圓跣無蒲手無錫。結夏何如僧面壁。平生但蓄無絃琴。不愛奇聲傳霹靂。官齋清絕清似水。一刺不通非有激。林颺吹鬢涼絲絲。花霧侵衣陰羃羃。檐端雙鵲曉聲乾。簾外一鳩午語寂。蒼苔雨後三巡封。除却羊求蹤孰覓。人到中年感易生。酒壚豈爲隣家笛。故園昨寄萬里書。情話依然共親戚。青衫只道淚痕多。戰血那知今未滌。多謝加餐勸我勤。惠州飯許東坡喫。華胥聞說勝鈞天。假道應從醉鄉適。九衢處處有堯

樽酒德誰能使民觀。莊子民可使觀比來曹事都不知。拄頰西山秋欲滴。相將料理苦吟身。縛袴橫刀再臨敵。

寄博晰齋八疊前韻

英蕩函從香案錫。誰遣衝炎走銅壁。瘴雲如墨雨如漿。夜夜馬蹄生霹靂。歸來遇我騰衝城。卻怪北山詩太激。人將白髮自蕭散。雨過黃梅轉蒙霧。不辭著屐來取別。書借一瓿供破寂。予在騰越值晰齋自塞上回。蘇行贈我書數十册。去歲征南幕府開。參軍在座君能覓。玉門生入事如夢。軟脚筵開鬪箏笛。聽到陽關第四聲。年少何堪也悽戚。晰齋有歌者朱琇色藝冠一時。予于永昌屢見之。近已攜歸大理矣。天涯去住總難料。未許征衣塵土滌。杜陵依舊客諸侯。對酒真憐不能喫。杜詩對酒不能喫。君今且看點蒼山。試茗分香興清適。畫欄桂樹又秋風。花下何人展嘉覲。玲瓏休唱樂天詩。燭淚還愁替人滴。借問維摩病若何。定知談笑熊羆敵。晰齋薄病初起。

同年朱子穎太守遠訪軍中行帳話舊有感作

陣雲頽空溪水吼。礮火橫飛大于斗。白頭自甘枕戈甲。寧料此間握君手。憶君召對在御苑。詢及先臣霽顏久。奉詔作畫羣公驚。盤礴一揮筆如帚。聞君昨歲游峨眉。伏虎岩前掉臂走。佛燈懸處照無寐。欲借禪床穴雙肘。君今蹤跡更奇絕。閑作寓公謝官守。夕烽連山箭滿眼。君不來觀亦无咎。君言壯志雖漸衰。未肯帷車學新婦。蜀中邊患我頗悉。如掣鯨鯢歸敵笥。十年養癰不一決。兪扁之工亦何有。軍興百事如蠅

毛又苦咄嗟思辦取。可憐轉粟十萬夫。盡是春田把鋤耩。臣甫北征憤最切。臣結春陵意偏厚。南臺寺名病起匹馬行。不獨軍容觀細柳。借籌應作李左車。劇孟何堪掛君口。相逢剪燭話未已。卻恨郛筒難致酒。與君論交在夙昔。風節相期頗不苟。戰場兩處所見同。瘴海三年得生偶。軍旅之事雖未學。出入兵間得八九。惟聖有訓戰必慎。行兵所戒勝毋徂。參軍長揖敢自傲。萬感橫胸鬱堆阜。夜來偏師肆賊壘。裹血人歸認誰某。終生長纓今在否。上陣何時縛小醜。氈廬風雪對嘆息。錯比剡谿來訪友。

十二月十三日斑斕山紀事

連峯若環斷若玦。羊腸一絲天際豁。賊礮屹然不可拔。如獠之狂鼠之黠。一軍拒左遏賊衝。及山之半布成列。一軍右上盪其腦。腑瞰礮樓蟻在埵。朔風獵獵翻大旗。指點元戎中乘鉞。是時窮冬天苦寒。堅冰欲鼓山石裂。萬人裹甲如裹鐵。噤不成聲喉捲舌。豈知挾纜在一言。始信拊循勝鞭撻。鎗丸似雨烟似墨。一卒飛騰刀滾雪。上礮無梯下無穴。以肉鬪石怒衝髮。何來援賊氣甚囂。短兵一接魂魄奪。殺人無聲亦無形。人在陣雲自出沒。生擒一賊挾兩頭。歸謁和門略陳說。生囚死馘互拴縛。一片模糊刃餘血。惜汝小醜特在險。問天此險爲誰設。負嵎之獸且莫櫻。游釜之魚寧久活。詰朝再戰竊有請。若徇三軍須此卒。

秋日過水竹居

松竹日蕭瑟。重來徑不分。林霏寒作雨。池水靜生雲。地下悲知己。天涯惜離羣。臨風清淚迸。落葉暮紛紛。

宋玉宅

哀怨靈均弟。風流子美師。江山留舊宅。雲雨托微辭。過楚吾何適。經秋客更悲。蘭成今白髮。腸斷結茅期。

春感

江樓一望草芊芊。寒食東風欲禁烟。柳外誰家閒試馬。花前有客倦聞鶻。春愁似水當三月。好夢如雲已十年。贏得髻絲今漸改。生涯禪榻自蕭然。

送德甫入都

幾載昌亭載酒從。過江才地孰齊蹤。凌雲新賦推司馬。對日雄談屬士龍。斜月宮花迴夕佩。輕烟禁柳逐晨鐘。金臺舊侶知無恙。爲道蒹鱸興轉濃。

酬王德甫見贈次韻

廿年香火感深盟。萬里猶爲並轡行。尙憶牽衣同拜母。眞從戴笠早稱兄。驚看蹤跡如逃劫。忽對詩篇似隔生。爲話故園心轉壯。要令絕域遍春耕。

渡漳水同德甫

風煙極目浩縱橫。晚渡牽船客共爭。流急勢先吞滏衛。地雄氣尙帶幽并。一宵候館知安託。十月輿梁苦未成。僅葺其半云須十一月始成。每到印須動遙感。清漳夾宅負平生。

泊襄陽同德甫

岸樹川花望不分。煙波如畫碧紛紛。渡江帆帶樊城雨。倚堞樓含峴首雲。漢上題思追勝事。襄陽傳欲續遺聞。魚梁洲畔饒雞黍。衡宇他時好共君。

自漢水放舟南下卽事二首

襆被同登漢上槎。六年不聽榜謳鴉。容身已喜如居室。入夢渾疑是到家。斜日趁墟宵喚酒。輕烟壓水午鳴茶。南遷我久忘官樣。慙見船頭候吏譁。碧波翠蠟一程程。細雨斜風撲面迎。沙步閑容村特臥。烟帆低傍渚禽行。潤留硯墨吟初罷。寒勒篝香夢未成。忽憶吳中十年事。夜船燈火按銀箏。

夜渡毛口河趨阿都田作

夜航無槳趁懸繩。一縷溪烟漾水澄。村曲尙聞關市柝。峯坳先見驛樓燈。宵晴平野星光散。候暖空山石氣蒸。料得天涯掩閨者。夢魂隨我度峻嶒。

宿亦資孔驛

過此卽雲南境

踏盡黔山碧萬層。荒郵還作借單僧。生花燭短渾無燄。刺水衾寒忽有梭。永夜夢多情恹恹。殘年詩少意蒼騰。偶然折得苔枝在。伴我吟窻瘦不勝。

次猛拱印事

江煙江雨捲雙旂。蠻塞居然汜小休。林下偶逢歸塞馬。軍中失馬者往往於林箐中得之行間爭飽犒師牛。諸夷頭目迎

入虎踞關

近關僕馬盡歡聲。戶杼場春寫太平。賣劍便思爲佃客。棄繻何用識書生。誰封抔土無留碣。近關新築壘。云皆彼年

荷葉

幾日田田碧一窪。空亭倚遍石欄斜。池塘人靜影臨水。風露曉涼香勝花。未許衝波依舫屋。最宜聽雨隔窗紗。分明載酒曾遊處。兩板紅橋綠半遮。

苔

一重門掩一重簾。逕草塔莎一色添。軟碧圓時裊可藉。薦紅碎處屐同黏。端居盡日芳塵斷。逆旅先秋舊雨淹。逋客新來行迹絕。翠痕不掃倍纖纖。

茶烟

庭院沈沈午悄然。風爐帖妥屋西偏。更無人影惟簾影。纔和香煙又藥煙。偶著瓶花縈未定。忽吹髻髮量

初圓心知不自勞。薪出絕愛低回病榻邊。

禽語

芳林入夏碧如雲。格磔鉤翰總不分。醉倚短筇閑獨聽。夢迴單枕遠初聞。偶然斷續隨朝雨。幾處高低度夕曛。知我機心忘已盡。一枝借得兩欣欣。

遷寓

白頭瘴海已三年。傳舍無端竟五遷。真遣卜居依鶴觀。寓對白鶴觀。恰合東坡惠州故事。故云。差欣汲飲近龍泉。寓在龍泉門內。去湧

珠泉數十武耳。補茅屋老秋風勁。得樹庭空午日圓。衰病不堪重借箸。枕戈時復枕書眠。

復遷居舊寓感懷四首

一雨新苔上戟門。重來蕭寂似山邨。磨牛踏處依陳迹。巢燕栖時掃舊痕。悞喜南樓聞躡屐。忍忘東閣對開尊。秋風起後庭花盡。惟有親栽菊尚存。

防秋羽檄白紛紛。拄頰看山到夕曛。拂策已知居莫定。迴車誰料路還分。季鷹漫決歸吳計。司馬空傳難蜀文。尙擬短衣從夜獵。灞陵爭識故將軍。

羅雀門庭刺孰通。一樽孤酌雨聲中。心依短燭灰將盡。身對殘碁劫未終。獨向風飈悲退鷁。偶從泥雪認羈鴻。單衾無限春明夢。夜夜常隨馬首東。

斗大山城鼓笳中宵人倚步欄斜敢因去國忘傾蓋不爲懷鄉計及瓜幕府正聞籌筆數征途深愧贈
鞭賒時巴錕輝員外將隨副將軍巡邊故云殘書襖被安排了自對寒燈拭劍花

屏陵呂侯祠

地控荆湘此最雄英名猶在霸圖空生能開卷分陰業死得封侯尺土功竟遣白衣來北岸渾忘赤壁縱
東風油江遙接蠟磯水嗚咽還應怨阿蒙

澧州道中寄程荆南衡州

澧水東流下洞庭蒸湘亦抱合江亭如何遠浦捐芳佩不共佳人醉淥醑難後夢魂頻錯迕病餘書問費
丁寧篷牕獨聽蕭蕭雨官燭無花也淚零

行帳病中補山同年枉顧夜話有詩見示次韻酬之

身似殘弓不上檠黃楊暮節鷓初程尊前語咽胸埋壘帳外人歸血洗兵病枕自營求艾計戰場頻作贈
鞭行時員外郎薩□□太笑談忽聽穿林礮驚閃秋燈一穗橫行帳距賊寨一里許賊人獻丸時從帳上過

夜雨再次前韻索補山和之

昌黎詩裏一燈檠未了江湖聽雨程萬里重爲衝瘴客五更來共臥瘡兵蕭條沙壠邨雞斷颯沓風林陣
馬行料得子荆感秋草軍籌傳處句縱橫

至隴川宿錢充齋觀察寓舍連得王述菴比部惠書並用槃字倡和詩韻賦詩見懷四疊前韻卻寄兼邀充齋和之

入關初翦故人槃互誦君書筭驛程身病獨成歧路客語長半爲夾江兵昨宵聞礮知猶戰虎踞關距老里昨宿此猶聞軍營大礮之聲明日扶輿悵獨行馬革平生心未已得歸翻苦涕縱橫

槃字韻詩倡於補山予凡五疊頃述菴復郵寄五章索和督促甚力意在迫我於險無言不讎賦此卻寄餘四篇皆卽景成題總不越一夕中事並挑補山和之

天上彤弓已在槃日方南至客東程時緬甸具箋乞降大兵已撤至虎踞關仲宣賦尙嗟懷土子美詩應快洗兵老去忽驚殘歲改生還准約故人行昨聞鐵索橋邊路處處梅花馬首橫

聞補山將至詩以迎之

雄劍藏械弩弛槃梅花篋裏一程程揚鞭已歷三千里出萬仞關由猛拱猛養歷新街老官屯入虎踞關約三千餘里磨盾眞過十萬兵話到蘼蕪祛薄病來書言有腹疾歸逢楊柳送遄行最愁後夜西牕燭未是離筵淚欲橫

和述菴五詩未竟而燭忽燼枕上占此

閃碧燿紅怪出槃用趙當遇燈槃怪事忿忿詩債誤嚴程遷延已自迴三舍悉索猶堪備五兵隔屋荒雞還冷伏綠牀黠鼠早微行思君坐待殘宵月又到梅窗弄影橫

辛卯十月二十日蒙恩復官參佐蜀中軍事感遇摠忱得詩四首寄京師及故鄉知舊

刺聞書裏八行馳。戊幄來宣感涕滋。再入中書嗟我老。三登啓事愧人知。予自從軍入滇。前相國春和傅公。前將軍雲岩阿公。及今將軍

溫公前後凡三經補履矣。素心正集蓮花幕。清夢先依藥樹枝。對仗哦詩磨盾檄。一官前後總恩私。

身在軍中被詔溫。除官免謁選曹尊。凡奉特旨遷除者。例免謁選。夜舂米更喧麤婢。月給錢還乞穉孫。十載踏迴牛磨

跡。予自壬午服官。至今辛卯。恰十年。九重掃膳鳳巢痕。中書舍人。有兼司經局正字者。一人。予前適除此職。近見邸抄。已議裁矣。似與坡公詩意適相比附也。他時曝背茅

檐底。半話金鑾半玉門。

借箸頻煩對夜分。居然長揖作參軍。橫戈雜虜忘蒙澤。調鼎元臣念策勳。未遣邊城休宿甲。猶聞閭井望

春耘。近從父老聽明詔。揮涕爭傳旰食勤。已屢降明詔。諭以屢念戎行。不得已用兵之故。讀者無不感奮泣下。

獨上高城攬夕暉。霞旌霜戟自成圍。長纓肯讓終生請。神筆思憑葛相揮。玉壘陣雲初壓帳。金江戰血尙

霑衣。此南大金江在緬甸境。予已丑隨征。屢經度此。誰知矢石林中客。已許餘生對紫薇。

暮至尤溪

兩崖一綫走陰森。班馬凌兢有戒心。雪似凍鴉翻絕壁。石如飢虎攫空林。橫橋入市人聲雜。候館懸燈夜

色深。不用繼庖煩長吏。龍溪茗椀豁愁襟。尤溪一名龍溪。茶最佳。

雲巖先生兵抵美諾追陪夜話有感而作次家雲松韻

茄鼓聲沈劍氣寒。依然奉席接衿鞶。喜心倒極驚三捷。歧路依違愧一官。主簿參軍從位置。兒童走卒問平安。細論兩戰場中事。白髮門生感萬端。

永昌寓舍卽事書懷一百韻寄京師及吳中故人

萬里程初屆。三年跡乍淹。力猶衝瘴癘。身已混閭閻。相愧逢梁舉。居思卜楚詹。坐愁書咄咄。臥病夢譚譚。蓋達風何陋。哀牢地最炎。迅湍飛弩駭。亂石淬刀銛。霧煖紅浮箒。煙昏綠繞柵。漂搖蕩掛蛭。擁腫樹藏蚘。廢堡墻攢刺。荒衢屋覆苫。冬畚雷競競。夏岫雪囊囊。林密稀窺景。嵐濃屢送釀。四時涼燠互。一日雨暘兼。況值軍興久。頻聞戍守添。傳符荆屬粵。馳檄蜀通黔。黔陽廣韻作黠陽市價騰芻秣。邊儲雜菽糠。轉輸連下邑。勦

勉徧窮簷。路險舟輻絕。城巖節鉞嚴。材官紛槩戟。文士競輶鈴。僧舍除庖福。氓廬借釜鬻。授餐真雜沓。供帳極叢纖。量俞沽邨釀。論銖鬻井鹽。寸牋逾重錦。尺布抵輕緜。照壁松枝炬。傾甌麥顆飴。不緣勤撫恤。何以免危阨。地主誰承乏。天涯且屬饜。豬肝人肯累。蝸殼我寧嫌。頽翮嗟棲幕。驚鱗幸脫羶。迂疎招話厲。放浪付姑婆。食至疑逢蠱。悲來似發疔。鄉心彌愴恍。旅話自喁險。耆舊吳中盛。風華海內密。承家餘研削。求友得針砭。于野才偏聚。斯文任敢謙。知名緣鯉素。寄興托貂襜。學必崇純樸。言還絕僞諛。正聲刪促節。法服破輕襪。貞梓原從繹。文瑤亦受礪。劉蕭蘭郁郁。芟稗稻稭稭。砥柱瀾須障。傳薪火未燭。鐘暗桐使應。磁熱芥能黏。矻矻忘餐寢。依依共苦甜。開園偕躡履。閉閣對施幘。茗淪明瓷椀。香分斷漆奩。靜看春盎盎。閒

覺晝厭厭。汲古情斯縱。探幽意詎廉。靈崖青婀娜。震澤碧澶湑。大小尋雙渚。東西訪二崦。軟輿穿曉竹。短艇繫秋葦。蕤盃連波盱。菘筐帶露劉。廚珍多水族。饌法半湯爛。跌宕燈重剪。勾留鼓再敲。翻枯容汚袖。捧硯試題翰。辯逞雕龍口。談掀磔蝟髯。世人應共嫉。吾道豈終潛。梧藹初停鳳。竿修遂上鮎。田間先釋屣。日下各乘幘。鎖闔鏘垂珮。玫瑰滴漏籤。丹泥封尚濕。紫穎削頻尖。周雅歌差馬。秦風咏載獫。每秋陪扈蹕。趁曉許提漿。斷澗圍犇鹿。平原逐突臧。衝飈駕落穀。赴響雉投籊。列幄榮頽齒。歸裝詫積臙。班仍趨鷓鷯。歲忽換烏蟾。勝侶多多善。清游處處欣。銷寒移密室。道暑就長欄。唐寺評花擔。燕臺問酒帘。壯懷從濩落。素抱忍恹儉。聚鐵翻成錯。銘金竟失筭。戎行承譴薄。參佐藉謀僉。尤悔人難寡。疵瑕俗競擗。由來稱俊達。所往被汗濶。放逐愁形槁。譏讒痛骨鉞。書騰梁苑獄。章飲朔方鉗。辱及中山贖。哀深大史閤。索琴詞款款。憶鶴淚漼漼。廢棄予猶幸。栖遲趣轉恬。茲行殊汗漫。回想尙甜澹。遷客如蛩駘。謂述同心比鶼鶼。三楹纒賃屋。一桁旋鈎簾。垣矮峯爲障。階虛水出濂。當關無小鷁。支榻有枯□。病久知宵永。眠遲愛日暹。團團侵惟上。薰芳尤少於。晉從廣韻。薏粥僮能糝。芹菹僕解醃。勤常調藥餌。懶更疊芸幘。浴滑宜高屐。梅橫碍側幣。偶然行得得。聊爾喜沾沾。獨有孤衷鬱。終期醜類殲。笳音晨自聽。星象夜頻覘。推轂元臣出。揚旌屬國瞻。先聲驅纓燹。宏願靖黎黔。盪決去予筭。飄揚貝胃綬。溟濤沈斷梗。崑燄燎荒葢。寶井亡殘幕。金樓失破闔。夾砧啼僮僕。繁組狀髻鬋。蛇豕棧威掃。梯航化澤漸。風驟歸壠輓。霜劍冶耕鎌。抱牘籌空借。磨崖筆試拈。腐儒

搔白髮幾欲訊筵占。

楊枝十二韻

本是銷魂種。年年綰別離。一株當二月。萬縷復千絲。栽處應天上。攀來每路歧。未歸陶令宅。頻夢謝家池。態倚疎簾勝。陰籠曲檻宜。濃疑掃眉黛。弱欲鬪腰支。著雨憐初起。臨風愛小垂。金城悲此地。玉殿憶當時。細馬看還繫。流鶯聽乍移。尊前人不見。笛裏客相思。我往成搖落。誰來屬護持。香山戀樊素。只爲是楊枝。

副將軍阿公振旅回永昌時屆歲除官齋尊酒追溯用兵顛末述事抒情輒成聯句八十韻亦勞者思歌之義也

詔撤三年戌。升人依萬里城。受降唐節度。甫振旅漢營平。尙藉邊籌遠。升旋逢歲籥更。星霜回暮節。甫烽

火息嚴程。蓮幕叨陪侍。升椒盤快合并。紀勳詞磊落。甫感事意迴縈。在昔承恩命。升於茲習義征。重邀王

母福。甫益勵丈人貞。公初受命督師啓行時詣皇太后宮請安賞穴竄將窮鼠。升波翻未剪鯨。先聞傾鼎

餽。甫繼悍結冠纓。倉猝殲于遂。升消搖散在彭。以上叙楊制府應瑒貽誤軍事及將軍明改弦軍政肅。甫

挾纊士心傾。戎略書詩裕。升儲胥竹木羸。習勞曾運甓。甫肄武亦開棚。分埽騰驅駱。升排困積稜秬。威真

敷絕檄。甫念愈軫疲氓。勢可乘因壘。升功偏待秉衡。以下叙經略赴滇統師進討各取儀容諸將攝。甫號

令一軍驚。借箸師中協。升飛符闔外行。周咨常旁午。甫祕算必先庚。吉日應徐卜。升凶門詎急爭。深燈輸

惘惘甫德側席費論評薪恐難移突升棋虞易下枰終朝惟仰屋甫德前路邊揚旌萬仞嚴關峙時公由銅壁

燭督造戰艦而經略由萬仞關渡大金江收撫猛拱以通西路升之千重駭浪橫蠻雲凝作嶂甫德淫雨積為阮振策經途速升浮杳問渡

輕幸牽巾櫛戀甫德得使櫬輿迎猛拱其小妻遂率眾詣軍門降因勇決空羣醜升平安屬使倅遠期姬且鳥甫德

來就亞夫營時公已逆駐新街屢遣夷人問此地雙江抱壘暮江自東來匯于大金江斜對哈維公隻手

撐夾鈇親戮叛時隴川人蘇明燦段世瑞來往賊插羽亟徵兵削柿高檣矗升鎔金巨礮轟何須然斷鎖

絕勝渡浮罌乘舩馳溫嶠甫德揚麾挈顛榮阿補堂東西連玉帳甫德水陸應銅鉦會合歡初

沸升飛騰氣已盈非緣欺小敵甫德直與奪先聲姑蔑收空壁升餘皇徒斷浜猿窮斯就縛甫德禽逸乃遭押

此叙十月十日新街水戰擊敗賊兵獲其舟甫德風陣催帆飽升霜棧淬劍瑩官屯趨浩蕩甫德賊柵列崢嶸以下

叙進駐老官屯甫德當轍塘宜捕升藏岫虎莫攫越蛙徒自式甫德衛鶴那堪令忠蓋通神鬼升思勤邁父兄有

言皆激奮甫德無物不輸誠瘵癘寒猶熾升瘡痍力轉勅鎗烟摧拉雜甫德機石擊鏗訇執銳兼持燧升臨衝

競挽棚梯危懸碧漢甫德隧曲穴青坪俘卒聯徽纆升逋夷驗刺鯨時舟師生獲十餘賊并有自寨逸出來

下游援漸絕甫德中夜謀頻偵裏血方酣戰升炊餒遂乞盟老官屯被圍既久舟師又斷其南來救援賊寨

卑辭函鏤貝甫德吉語應占蕙公赴滇時途中遇善筮者筮得時值文淵病升羣欽諸葛名時經略抱病緬

至誠孚裸虜甫德大義洽豪英表飭幾全握升韜鈴術盡屏盤根衷獨苦甫德省括計彌精待振虞階舞

之升徵調傳相羹。旋師符勅諭。甫德請令爲娶悍。軍中方受降。中旨納款求陳幣。之升據忱謝宰牲。權呼喧爨焚。

甫德感泣遍柴荆。臘後蛩催織。滇中冬候蟲聲。春前犢試耕。視看消枉矢。甫德瑞定表華萃。遠譯風諧律。時頁

使將平故升之。新郊雪散霽。滇中少雲而連朝。四山積素。朝天歸上輔。甫德計日近元正。九日起程赴闕。班管停

磨盾。之升瑠弓罷繫繫。薦辛挑細菜。甫德透甲劈香橙。泥飲蛆浮瓮。之升徵歌雁語箏。燕私蒙款款。甫德鴻論劇觥

觥。烏本期頭白。之升魚還念尾頰。仲宣仍逆旅。甫德元叔剩餘生。夢寐嗟相對。之升然疑忍共明。追思從袴褶。甫德

誓欲掃機槍。匪尚犁庭績。之升終酬攬轡情。居恆時若厲。甫德履險道能亨。偉節強哉矯。之升嘉謨展也成。畫圖

垂紫閣。甫德譽望溢丹瀛。猷壯推方叔。之升知深荷晏嬰。願從元白後。甫德驃樂載同賡。緬甸即古驃國。唐韋臯

徵之白樂天皆有詩紀事升之

